

वेदमन्त्राः

Colophon

This document was typeset using Xe_{La}TeX, and uses the Siddhanta font extensively. It also uses several \LaTeX macros designed by *H. L. Prasād*. Practically all the encoding was done with the help of Ajit Krishnan's mudgala IME (<http://www.aupasana.com/>).

Acknowledgements

The initial ITRANS encodings of some of these texts were obtained from <http://sanskritdocuments.org/> and <https://sa.wikisource.org/>. Thanks are also due to Ulrich Stiehl (<http://sanskritweb.de/>) for hosting a wonderful resource for Yajur Veda, and also generously sharing the original Kathaka texts edited by Subramania Sarma. See also <http://stotrasamhita.github.io/about/>

FOR PERSONAL USE ONLY
NOT FOR COMMERCIAL PRINTING/DISTRIBUTION

अनुक्रमणिका

लघुन्यासः	1
श्री-रुद्रध्यानम्	1
देवता-स्थापनम्	2
श्रीरुद्रजपः	4
ध्यानम्	5
रुद्रप्रश्नः	7
चमकप्रश्नः	15
पुरुषसूक्तम्	20
नारायणसूक्तम्	22
विष्णुसूक्तम्	23
भूसूक्तम्	24
दुर्गा सूक्तम्	26
श्रीसूक्तम्	27
मेधासूक्तम्	29
रुद्रसूक्तम्	30
वरुणसूक्तम्	31
ब्रह्मसूक्तम्	32
भाग्यसूक्तम्	32
पवमानसूक्तम्	33

आयुष्यसूक्तम्	36
नवग्रहसूक्तम्	38
नक्षत्रसूक्तम्	41
गणपत्यथर्वशीर्षोपनिषत्	48
मृत्युञ्जयहोम-मन्त्राः	52
महान्यासः	55
पञ्चाङ्गरुद्रन्यासः रावणोक्ता पञ्चाङ्गप्रार्थना-सहितम्	55
पञ्चाङ्गमुखन्यासः रावणोक्ता पञ्चमुखप्रार्थना-सहितम्	57
केशादिपादान्त (प्रथमो) न्यासः	59
मूर्धादिपादान्त दशाक्षरी दशाङ्ग (द्वितीयो) न्यासः	65
पादादिमूर्धान्त पञ्चाङ्ग (तृतीयो) न्यासः	65
हंसगायत्री	66
दिक् सम्पुटन्यासः	67
षोडशाङ्गरौद्रीकरणम्	72
गुह्यादि मस्तकान्तं षडङ्ग (चतुर्थो) न्यासः	76
आत्मरक्षा	77
शिवसङ्कल्पः	78
पुरुषसूक्तम्	83
उत्तरनारायणम्	85
अप्रतिरथम्	86
प्रतिपूरुषम् (सं०)	87
प्रतिपूरुषम् (ब्रा०)	88
शतरुद्रीयम् (सं०)	89
शतरुद्रीयम् (ब्रा०)	92
पञ्चाङ्गम्	93
अष्टाङ्ग-नमस्काराः	94
लघुन्यासे श्री-रुद्रध्यानम्	95
लघुन्यासे देवता-स्थापनम्	96
आत्मपूजा	98
कलशेषु साम्बपरमेश्वर ध्यानम्	98

षोडशोपचार पूजा	99
श्रीरुद्रनाम त्रिशती	103
प्रदक्षिणम्	110
नमस्काराः	111
चमकानुवाकैः प्रार्थना	113
प्रार्थना	118
श्रीरुद्रजपः	118
ध्यानम्	119
रुद्रप्रश्नः	121
चमकप्रश्नः	128
रुद्रपदपाठः	136
मन्त्रपुष्पम्	147
दशशान्तयः	149

॥ लघुन्यासः ॥

॥ श्री-रुद्रध्यानम् ॥

अथाऽऽत्मानं शिवात्मानं श्री-रुद्र रूपं ध्यायेत्॥

शुद्धस्फटिकसङ्काशं त्रिनेत्रं पञ्चवक्त्रकम्।
गङ्गाधरं दशभुजं सर्वाभरणभूषितम्॥

नीलग्रीवं शशाङ्काङ्कं नागयज्ञोपवीतिनम्।
व्याघ्रचर्मोत्तरीयं च वरेण्यमभयप्रदम्॥

कमण्डल्वक्षसूत्राणां धारिणं शूलपाणिनम्।
ज्वलन्तं पिङ्गलजटाशिखामुद्योतधारिणम्॥

वृषस्कन्धसमारूढम् उमादेहार्धधारिणम्।
अमृते नाप्नुतं शान्तं दिव्यभोगसमन्वितम्॥

दिग्देवता समायुक्तं सुरासुरनमस्कृतम्।
नित्यं च शाश्वतं शुद्धं ध्रुवमक्षरमव्ययम्॥

सर्वव्यापिनमीशानं रुद्रं वै विश्वरूपिणम्।
एवं ध्यात्वा द्विजः सम्यक् ततो यजनमारभेत्॥

अथातो रुद्र स्नानार्चनाभिषेकविधिं व्याख्यास्यामः।
आदित एव तीर्थे स्नात्वा उदेत्य शुचिः प्रयतो ब्रह्मचारी
शुक्लवासा ईशानस्य प्रतिकृतिं कृत्वा तस्य दक्षिणप्रत्यग्देशे
देवाभिमुखः स्थित्वा आत्मनि देवताः स्थापयेत्॥

॥ देवता-स्थापनम् ॥

प्रजनने ब्रह्मा तिष्ठतु। पादयोर्विष्णुस्तिष्ठतु। हस्तयोर्हरस्तिष्ठतु।
बाह्वोरिन्द्रस्तिष्ठतु। जठरे अग्निस्तिष्ठतु। हृदये शिवस्तिष्ठतु।
कण्ठे वसवस्तिष्ठन्तु। वक्त्रे सरस्वती तिष्ठतु। नासिकयोर्-
वायुस्तिष्ठतु। नयनयोश्चन्द्रादित्यौ तिष्ठेताम्। कर्णयोरश्विनौ
तिष्ठेताम्। ललाटे रुद्रास्तिष्ठन्तु। मूर्ध्यादित्यास्तिष्ठन्तु।
शिरसि महादेवस्तिष्ठतु। शिखायां वामदेवस्तिष्ठतु।
पृष्ठे पिनाकी तिष्ठतु। पुरतः शूली तिष्ठतु। पार्श्वयोः
शिवाशङ्करौ तिष्ठेताम्। सर्वतो वायुस्तिष्ठतु। ततो बहिः
सर्वतोऽग्निज्वालामाला-परिवृतस्तिष्ठतु। सर्वेष्वङ्गेषु सर्वा
देवता यथास्थानं तिष्ठन्तु। मां रक्षन्तु। [सर्वान् महाजनान्
सकुटुम्बं रक्षन्तु॥]

अ॒ग्नि॒र्मे वा॒चि श्रि॒तः। वा॒ग्घृ॒दये। हृ॒दयं॑ मयि॑। अ॒हम॒मृतै॑।
अ॒मृतं॑ ब्रह्म॑णि। (जिह्वा)

वा॒यु॒र्मे प्रा॒णे श्रि॒तः। प्रा॒णो हृ॒दये। हृ॒दयं॑ मयि॑। अ॒हम॒मृतै॑।
अ॒मृतं॑ ब्रह्म॑णि। (नासिका)

सू॒र्यो मे चक्षु॑षि श्रि॒तः। चक्षु॑र्हृ॒दये। हृ॒दयं॑ मयि॑।
अ॒हम॒मृतै॑। अ॒मृतं॑ ब्रह्म॑णि। (नेत्रे)

च॒न्द्रमा॑ मे म॒नसि॑ श्रि॒तः। म॒नो हृ॒दये। हृ॒दयं॑ मयि॑।
अ॒हम॒मृतै॑। अ॒मृतं॑ ब्रह्म॑णि। (वक्षः)

दिशो॑ मे श्रोत्रे॑ श्रिताः। श्रोत्र॑ꣳ हृदये। हृदयं॑ मयि॑।
अ॒हम॒मृते॑। अ॒मृतं॑ ब्रह्म॑णि। (श्रोत्रे)

आपो॑ मे रेत॑सि श्रिताः। रेतो॑ हृदये। हृदयं॑ मयि॑।
अ॒हम॒मृते॑। अ॒मृतं॑ ब्रह्म॑णि। (गुह्यम्)

पृथि॒वी मे शरी॑रे श्रिता। शरी॑रꣳ हृदये। हृदयं॑ मयि॑।
अ॒हम॒मृते॑। अ॒मृतं॑ ब्रह्म॑णि। (शरीरम्)

ओष॑धि॒वन्स्प॒तयो॑ मे लोम॑सु श्रिताः। लोमा॑नि हृदये।
हृदयं॑ मयि॑। अ॒हम॒मृते॑। अ॒मृतं॑ ब्रह्म॑णि। (लोमानि)

इन्द्रो॑ मे बले॑ श्रितः। बलꣳ हृदये। हृदयं॑ मयि॑। अ॒हम॒मृते॑।
अ॒मृतं॑ ब्रह्म॑णि। (बाहू)

पर्ज॑न्यो मे मूर्ध्नि॑ श्रितः। मूर्धा॑ हृदये। हृदयं॑ मयि॑।
अ॒हम॒मृते॑। अ॒मृतं॑ ब्रह्म॑णि। (शिरः)

ईशा॑नो मे मन्यो॑ श्रितः। मन्यु॑रहृदये। हृदयं॑ मयि॑।
अ॒हम॒मृते॑। अ॒मृतं॑ ब्रह्म॑णि। (हृदयम्)

आ॒त्मा म॑ आ॒त्मनि॑ श्रितः। आ॒त्मा हृदये। हृदयं॑ मयि॑।
अ॒हम॒मृते॑। अ॒मृतं॑ ब्रह्म॑णि। (हृदयम्)

पुन॑र्म आ॒त्मा पुन॑रायुरागा॑त्। पुनः॑ प्राणः पुन॑राकू॒तमागा॑त्।
वैश्वान॑रो रश्मिभि॑र्वावृधा॑नः। अ॒न्तस्तिष्ठ॑त्व॒मृत॑स्य गो॒पाः॥
(सर्वा॑ण्यङ्गानि संस्पृश्य स्थापनं कृत्वा मानसै॑राराधयेत्॥)



॥ श्रीरुद्रजपः ॥

अस्य श्री-रुद्राध्याय-प्रश्न-महामन्त्रस्य। अघोर ऋषिः।
अनुष्टुप् छन्दः। सङ्कर्षणमूर्तिस्वरूपो योऽसावादित्यः
परमपुरुषः स एष रुद्रो देवता॥

नमः शिवायेति बीजम्। शिवतरायेति शक्तिः।
महादेवायेति कीलकम्।
श्री-साम्बसदाशिवप्रसादसिद्ध्यर्थे जपे विनियोगः॥

॥ करन्यासः ॥

ॐ अग्निहोत्रात्मने अङ्गुष्ठाभ्यां नमः।
दर्शपूर्णमासात्मने तर्जनीभ्यां नमः।
चातुर्मास्यात्मने मध्यमाभ्यां नमः।
निरूढपशुबन्धात्मने अनामिकाभ्यां नमः।
ज्योतिष्टोमात्मने कनिष्ठिकाभ्यां नमः।
सर्वक्रत्वात्मने करतलकरपृष्ठाभ्यां नमः।

॥ अङ्गन्यासः ॥

अग्निहोत्रात्मने हृदयाय नमः।
दर्शपूर्णमासात्मने शिरसे स्वाहा।
चातुर्मास्यात्मने शिखायै वषट्।
निरूढपशुबन्धात्मने कवचाय हुं।

ज्योतिष्टोमात्मने नेत्रत्रयाय वौषट्।
 सर्वक्रत्वात्मने अस्त्राय फट्।
 भूर्भुवस्सुवरोमिति दिग्बन्धः।

॥ ध्यानम् ॥

आपाताल-नभः-स्थलान्त-भुवन-ब्रह्माण्डमाविस्फुरत्
 ज्योतिः स्फाटिक-लिङ्ग-मौलि-विलसत्-पूर्णेन्दु-वान्तामृतैः।
 अस्तोकाप्लुतमेकमीशमनिशं रुद्रानुवाकान् जपन्
 ध्यायेदीप्सितसिद्धये ध्रुवपदं विप्रोऽभिषिञ्चेच्छिवम्॥
 ब्रह्माण्ड-व्याप्त-देहा भसित-हिमरुचा भासमाना भुजङ्गैः
 कण्ठे कालाः कपर्दा-कलित-शशि-कलाश्चण्ड-कोदण्ड-हस्ताः।
 त्र्यक्षा रुद्राक्षमालाः प्रकटित-विभवाः शाम्भवा मूर्तिभेदाः
 रुद्राः श्रीरुद्रसूक्त-प्रकटित-विभवा नः प्रयच्छन्तु सौख्यम्॥

॥ पञ्चपूजा ॥

लं पृथिव्यात्मने गन्धं समर्पयामि।
 हं आकाशात्मने पूष्पैः पूजयामि।
 यं वाय्वात्मने धूपमाग्रापयामि।
 रं अग्न्यात्मने दीपं दर्शयामि।
 वं अमृतात्मने अमृतं महानैवेद्यं निवेदयामि।
 सं सर्वात्मने सर्वोपचारपूजां समर्पयामि।

ॐ गुणानां त्वा गुणपतिं हवामहे कविं कवीनामुप-

मश्र॑वस्तमम्।

ज्ये॒ष्ठ॒राजं॑ ब्रह्म॑णां ब्रह्म॑णस्पत॒ आ नः॑ शृ॒ण्वन्नृ॑तिभिः॒ सीद॑
साद॑नम्॥

ॐ महा॑गणपतये॒ नमः॑॥

शं च॑ मे॒ मय॑श्च मे॒ प्रि॒यं च॑ मे॒ऽनु॒का॒मश्च॑ मे॒ का॒मश्च॑ मे॒
सौम॑न॒सश्च॑ मे॒ भ॒द्रं च॑ मे॒ श्रेय॑श्च मे॒ वस्य॑श्च मे॒ यश॑श्च मे॒ भग॑श्च
मे॒ द्रवि॑णं च मे॒ य॒न्ता च॑ मे॒ ध॒र्ता च॑ मे॒ क्षे॒मश्च॑ मे॒ धृ॒तिश्च॑ मे॒
वि॒श्वं च॑ मे॒ मह॑श्च मे॒ सं॒वि॒च्च॑ मे॒ ज्ञा॒त्रं च॑ मे॒ सू॒श्च मे॒ प्र॒सू॒श्च
मे॒ सी॒रं च॑ मे॒ ल॒यश्च॑ मे॒ ऋ॒तं च॑ मे॒ऽमृ॒तं च॑ मे॒ऽय॒क्ष्मं च॑
मे॒ऽना॑मयच्च मे॒ जी॒वातु॑श्च मे॒ दी॒र्घायु॑त्वं च॑ मे॒ऽन॒मि॒त्रं च॑ मे॒ऽभ॑यं
च मे॒ सु॒गं च॑ मे॒ शय॑नं च मे॒ सू॒षा च॑ मे॒ सु॒दि॒नं च॑ मे॒॥३॥

॥ ॐ शान्तिः॑ शान्तिः॑ शान्तिः॑॥



॥ रुद्रप्रश्नः ॥

ॐ गुणानां त्वा गुणपतिः॑ हवामहे कविं कवीनामुपमश्र-
वस्तमम्। ज्येष्ठराजं ब्रह्मणां ब्रह्मणस्पत आ नः शृण्वन्नृतिभिः
सीद सादनम्॥

ॐ महागणपतये नमः॥

ॐ नमो भगवते रुद्राय॥

नमस्ते रुद्र मन्यवं उतो त इषवे नमः। नमस्ते अस्तु
धन्वने बाहुभ्यामुत ते नमः॥ या त इषुः शिवतमा शिवं
बभूव ते धनुः। शिवा शरव्या या तव तया नो रुद्र मृडय॥
या ते रुद्र शिवा तनूरघोराऽपापकाशिनी। तया नस्तनुवा
शन्तमया गिरिशन्ताभिचाकशीहि॥ यामिषु गिरिशन्त हस्ते
बिभर्ष्यस्तवे। शिवा गिरित्र तां कुरु मा हिंसीः पुरुषं
जगत्॥ शिवेन वचसा त्वा गिरिशाच्छावदामसि। यथा
नः सर्वमिज्जगदयक्ष्मः सुमना असत्॥ अध्यवोचदधिवक्ता
प्रथमो दैव्यो भिषक्। अहींश्च सर्वाञ्जम्भयन्त्सर्वाश्च
यातुधान्यः॥ असौ यस्ताम्रो अरुण उत बभ्रुः सुमङ्गलः।
ये चेमाः रुद्रा अभितो दिक्षु श्रिताः सहस्रशोऽवैषाः हेडं
ईमहे॥ असौ योऽवसर्पति नीलग्रीवो विलोहितः। उत्तैनं
गोपा अदृशन्नदृशन्नुदहार्यः॥ उत्तैनं विश्वा भूतानि स दृष्टो
मृडयाति नः। नमो अस्तु नीलग्रीवाय सहस्राक्षाय मीढुषे॥
अथो ये अस्य सत्वानोऽहं तेभ्योऽकरं नमः। प्र मुञ्च

धन्वं॑न॒स्त्वमु॒भयो॒रार्त्वि॑योज्याम्॥ याश्च॑ ते ह॒स्त इ॒षवः॑ परा॒
 ता भ॑गवो वप। अ॒व॒त॒त्य ध॒नुस्त्व॑ सह॒स्राक्ष॑ श॒तैषु॑धे॥
 नि॒शीर्य॑ श॒ल्यानां॑ मु॒खा शि॒वो नः॑ सु॒मना॑ भव। वि॒ज्यं
 धनुः॑ क॒पर्दि॑नो वि॒शल्यो॑ बा॒णवा॑ उ॒त॥ अ॒ने॒शन्न॒स्ये॒षव॑
 आ॒भुर॑स्य नि॒षङ्ग॑थिः। या ते॑ हे॒तिर्मी॑दुष्ट॒म ह॒स्ते ब॒भूव॑
 ते धनुः॑॥ तया॒ऽस्मान् वि॒श्वत॒स्त्वम॑य॒क्ष्मया॑ परि॒भुज।
 नम॑स्ते अ॒स्त्वायु॑धा॒याना॑त॒ताय॑ धृ॒ष्णवै॑॥ उ॒भाभ्या॑मु॒त ते
 नमो॑ बा॒हुभ्या॑ तव॒ धन्व॑ने। परि॑ ते धन्व॑नो हे॒तिर॒स्मान्वृ॑णक्तु
 वि॒श्वतः॑॥ अथो॒ य इ॒षुधि॑स्तवा॒ऽऽरे॑ अ॒स्मन्नि धे॑हि तम्॥१॥

नम॑स्ते अस्तु भगवन् विश्वेश्व॒राय॑ महादे॒वाय॑ त्र्यम्ब॒काय॑
 त्रिपुरा॑न्त॒काय॑ त्रि॒काला॑ग्नि॒काला॑य॒ काला॑ग्निरु॒द्राय॑
 नील॑क॒ण्ठाय॑ मृ॒त्युञ्ज॑याय॒ सर्वेश्व॑राय॒ सदा॑शि॒वाय॑
 श्रीम॑न्महादे॒वाय॑ नमः॑॥

नमो॑ हि॒र॒ण्यबा॑हवे सेना॒न्यै दि॒शां च॒ पत॑ये॒ नमो॑ नमो॑
 वृ॒क्षेभ्यो॑ हरि॒केशे॑भ्यः पशू॒नां पत॑ये॒ नमो॑ नमः॑ स॒स्मिञ्ज॑राय॒
 त्विषी॑मते पथी॒नां पत॑ये॒ नमो॑ नमो॑ ब॒भ्रुशा॑य॒ वि॒व्याधि॑ने॒
 ऽन्ना॑नां पत॑ये॒ नमो॑ नमो॑ हरि॒केशा॑योपवी॒तिने॑ पु॒ष्टानां॑
 पत॑ये॒ नमो॑ नमो॑ भ॒वस्य॑ हे॒त्यै जग॑तां पत॑ये॒ नमो॑ नमो॑
 रु॒द्राया॑त॒तावि॑ने॒ क्षेत्रा॑णां पत॑ये॒ नमो॑ नमः॑ सू॒ताया॑ह॒न्त्याय॑
 वना॑नां पत॑ये॒ नमो॑ नमो॑ रोहि॑ताय स्थ॒पत॑ये वृ॒क्षाणां॑ पत॑ये॒

नमो॒ नमो॑ म॒न्त्रिणै॑ वाणि॒जाय॒ कक्षा॑णां पत॑ये नमो॒ नमो॑
 भुव॑न्तये॒ वारि॑वस्कृ॒तायौष॑धीनां पत॑ये नमो॒ नम॑ उ॒च्चैर्घोषा॑-
 याऽऽक्र॑न्दय॑ते पत्नी॑नां पत॑ये नमो॒ नमः॑ कृ॒त्स्नवी॒ताय॒ धाव॑ते
 सत्त्वं॑नां पत॑ये नमः॑॥२॥

नमः॑ सह॑मानाय नि॒व्याधि॑नं आ॒व्याधि॑नीनां पत॑ये नमो॒
 नमः॑ ककु॒भाय॑ निष॒ङ्गिणै॑ स्ते॒नानां॑ पत॑ये नमो॒ नमो॑ निष॒ङ्गिणै॑
 इषु॑धि॒मते॒ तस्क॑राणां पत॑ये नमो॒ नमो॑ व॒ञ्चते॑ परि॒वञ्च॑ते
 स्तायू॑नां पत॑ये नमो॒ नमो॑ नि॒चेर॑वे परि॒चरा॑यार॒ण्यानां॑ पत॑ये
 नमो॒ नमः॑ सू॒कावि॑भ्यो जिघा॑स॒द्भ्यो मु॑ष्ण॒तां पत॑ये नमो॒
 नमो॑ऽसि॒मद्भ्यो॒ नक्तं॑ चर॒द्भ्यः प्र॑कृ॒न्तानां॑ पत॑ये नमो॒ नम॑
 उ॒ष्णीषि॑णै॒ गिरि॑च॒राय॑ कुलु॒श्चानां॑ पत॑ये नमो॒ नम॑ इषु॑म॒द्भ्यो
 धन्वा॑वि॒भ्यश्च॑ वो नमो॒ नम॑ आ॒तन्वा॑नेभ्यः प्र॒ति॒धा॒नेभ्यश्च॑ वो
 नमो॒ नम॑ आ॒यच्छ॑द्भ्यो वि॒सृज॑द्भ्यश्च वो नमो॒ नमो॑ऽस्य॑द्भ्यो
 वि॒ध्य॑द्भ्यश्च वो नमो॒ नम॑ आ॒सी॒नेभ्यः॑ श॒या॒नेभ्यश्च॑ वो नमो॒
 नमः॑ स्व॒पद्भ्यो॒ जाग्र॑द्भ्यश्च वो नमो॒ नम॑ स्तिष्ठ॑द्भ्यो धाव॑द्भ्यश्च
 वो नमो॒ नमः॑ स॒भाभ्यः॑ स॒भाप॑तिभ्यश्च वो नमो॒ नमो॑
 अ॒श्वेभ्यो॑ऽश्व॑पतिभ्यश्च वो नमः॑॥३॥

नम॑ आ॒व्याधि॑नी॒भ्यो वि॒विध्य॑न्तीभ्यश्च वो नमो॒
 नम॑ उ॒गणा॑भ्यस्तृ॒हती॑भ्यश्च वो नमो॒ नमो॑ गृ॒त्सेभ्यो॑
 गृ॒त्सप॑तिभ्यश्च वो नमो॒ नमो॑ ब्रा॒तै॒भ्यो ब्रा॒तप॑तिभ्यश्च वो
 नमो॒ नमो॑ ग॒णेभ्यो॑ ग॒णप॑तिभ्यश्च वो नमो॒ नमो॑ वि॒रूपे॑भ्यो

वि॒श्वरू॑पेभ्यश्च वो॒ नमो॒ नमो॑ म॒हद्भ्यः॑, क्षु॒ल्लके॑भ्यश्च वो॒ नमो॒
 नमो॑ र॒थिभ्यो॑ऽर॒थेभ्यश्च॑ वो॒ नमो॒ नमो॑ र॒थेभ्यो॑ र॒थप॑तिभ्यश्च
 वो॒ नमो॒ नमः॑ से॒नाभ्यः॑ से॒नानि॑भ्यश्च वो॒ नमो॒ नमः॑, क्ष॒त्तृभ्यः॑
 स॒ङ्गही॑तृभ्यश्च वो॒ नमो॒ नम॑स्तक्ष॒भ्यो र॑थका॒रेभ्यश्च॑ वो॒ नमो॒
 नमः॑ कु॒ला॒लेभ्यः॑ क॒र्मरि॑भ्यश्च वो॒ नमो॒ नमः॑ पु॒ञ्जिष्टे॑भ्यो
 निषा॒देभ्यश्च॑ वो॒ नमो॒ नम॑ इषु॒कृद्भ्यो॑ धन्व॒कृद्भ्यश्च॑ वो॒ नमो॒
 नमो॑ मृ॒गयु॑भ्यः श्व॒निभ्यश्च॑ वो॒ नमो॒ नमः॑ श्व॒भ्यः श्वप॑तिभ्यश्च
 वो॒ नमः॑ ॥ ४ ॥

नमो॑ भ॒वाय॑ च रु॒द्राय॑ च॒ नमः॑ श॒र्वाय॑ च पशु॒पत॑ये च॒
 नमो॑ नील॒ग्रीवा॑य च शि॒ति॒कण्ठा॑य च॒ नमः॑ क॒पर्दि॑ने च॒
 व्यु॑प्तके॒शाय॑ च॒ नमः॑ सह॒स्राक्ष॑ाय च श॒तध॑न्वने च॒ नमो॑
 गि॒रि॒शा॒य च॑ शि॒पि॒वि॒ष्टाय॑ च॒ नमो॑ मी॒ढुष्ट॑माय॒ चेष्म॑ते च॒
 नमो॑ ह्र॒स्वाय॑ च वा॒मना॑य च॒ नमो॑ बृ॒हते॑ च॒ वर्षी॑यसे च॒
 नमो॑ वृ॒द्धाय॑ च सं॒वृध्व॑ने च॒ नमो॑ अ॒ग्रि॒याय॑ च प्रथ॒माय॑ च॒
 नम॑ आ॒शवे॑ चाजि॒राय॑ च॒ नमः॑ शीघ्रि॒याय॑ च॒ शी॒भ्याय॑ च॒
 नम॑ ऊ॒र्म्याय॑ चाव॒स्वन्या॑य च॒ नमः॑ स्रो॒त॒स्याय॑ च॒ द्वी॒प्याय॑
 च ॥ ५ ॥

नमो॑ ज्ये॒ष्ठाय॑ च क॒नि॒ष्ठाय॑ च॒ नमः॑ पू॒र्वजा॑य चाप॒रजा॑य च॒
 नमो॑ मध्य॒माय॑ चाप॒गल्भा॑य च॒ नमो॑ जघ॒न्याय॑ च॒ बु॒ध्रि॒याय॑
 च॒ नमः॑ सो॒भ्याय॑ च प्र॒तिस॒र्याय॑ च॒ नमो॑ या॒म्याय॑ च॒ क्षे॒म्याय॑
 च॒ नम॑ उ॒र्वर्या॑य च॒ ख॒ल्याय॑ च॒ नमः॑ श्लो॒क्याय॑ चावसा॒न्याय॑

च नमो वन्याय च कक्ष्याय च नमः श्रवाय च प्रतिश्रवाय
 च नमः आशुषेणाय चाशुरथाय च नमः शूराय चावभिन्दते
 च नमो वर्मिणे च वरूथिने च नमो बिल्मिने च कवचिने
 च नमः श्रुताय च श्रुतसेनाय च॥६॥

नमो दुन्दुभ्याय चाऽऽहन्याय च नमो धृष्णवे च प्रमृशाय
 च नमो दूताय च प्रहिताय च नमो निषङ्गिणे चेषुधिमतै च
 नमस्तीक्ष्णेषवे चाऽऽयुधिने च नमः स्वायुधाय च सुधन्वने
 च नमः सुत्याय च पथ्याय च नमः काट्याय च नीप्याय
 च नमः सूद्याय च सरस्याय च नमो नाद्याय च वैशन्ताय
 च नमः कूप्याय चावट्याय च नमो वर्ष्याय चावर्ष्याय च
 नमो मेघ्याय च विद्युत्याय च नमः ईध्रियाय चाऽऽतप्याय च
 नमो वात्याय च रेष्मियाय च नमो वास्तव्याय च वास्तुपाय
 च॥७॥

नमः सोमाय च रुद्राय च नमस्ताम्राय चारुणाय च नमः
 शङ्गाय च पशुपतये च नमः उग्राय च भीमाय च नमो
 अग्रेवधाय च दूरेवधाय च नमो हन्त्रे च हनीयसे च नमो
 वृक्षेभ्यो हरिकेशेभ्यो नमस्ताराय नमः शम्भवे च मयोभवे च
 नमः शङ्कराय च मयस्कुराय च नमः शिवाय च शिवतराय
 च नमस्तीर्थ्याय च कूल्याय च नमः पार्याय चावार्याय च
 नमः प्रतरणाय चोत्तरणाय च नमः आतार्याय चाऽऽलाद्याय

च नमः शष्प्याय च फेन्याय च नमः सिकत्याय च प्रवाह्याय
च॥८॥

नम इरिण्याय च प्रपथ्याय च नमः किंशिलाय च
क्षयणाय च नमः कपर्दिने च पुलस्तये च नमो गोष्ठ्याय
च गृह्याय च नमस्तल्प्याय च गेह्याय च नमः काट्याय
च गह्वरेष्ठाय च नमो हृदय्याय च निवेष्याय च नमः
पांस्रव्याय च रजस्याय च नमः शुष्क्याय च हरित्याय
च नमो लोप्याय चोलप्याय च नम ऊर्व्याय च सूम्याय च
नमः पुण्याय च पर्णशद्याय च नमोऽपगुरमाणाय चाभिघ्नते
च नम आख्विदते च प्रख्विदते च नमो वः किरिकेभ्यो
देवानां हृदयेभ्यो नमो विक्षीणकेभ्यो नमो विचिन्वत्केभ्यो
नम अनिर्हृतेभ्यो नम आमीवत्केभ्यः॥९॥

द्रापे अन्धसस्पते दरिद्रन्नीललोहित। एषां पुरुषाणामेषां
पशूनां मा भेर्माऽरो मो एषां किं चनाऽऽममत्॥ या तै रुद्र
शिवा तनूः शिवा विश्वाहभेषजी। शिवा रुद्रस्य भेषजी तया
नो मृड जीवसे॥ इमां रुद्राय तवसे कपर्दिने क्षयद्वीराय
प्रभरामहे मतिम्॥ यथा नः शमसद्विपदे चतुष्पदे विश्वं
पुष्टं ग्रामे अस्मिन्ननातुरम्॥ मृडा नो रुद्रोत नो मयस्कृधि
क्षयद्वीराय नमसा विधेम ते। यच्छं च योश्च मनुरायजे पिता
तदश्याम तव रुद्र प्रणीतौ॥ मा नो महान्तमुत मा नो अर्भकं
मा न उक्षन्तमुत मा न उक्षितम्। मा नो वधीः पितरं मोत

मातरं प्रिया मा नस्तनुवो रुद्र रीरिषः॥ मा नस्तोके तनये मा
 न आयुषि मा नो गोषु मा नो अश्वेषु रीरिषः। वीरान्मा नो
 रुद्र भामितो वधीरहविष्मन्तो नमसा विधेम ते॥ आरात्ते गोघ्न
 उत पूरुषघ्ने क्षयद्वीराय सुम्रमस्मे ते अस्तु। रक्षा च नो अधि
 च देव ब्रह्मधा च नः शर्म यच्छ द्विबर्हाः॥ स्तुहि श्रुतं गर्तसदं
 युवानं मृगं न भीममुपहतुमुग्रम्। मृडा जरित्रे रुद्र स्तवानो
 अन्यं ते अस्मन्नि वपन्तु सेनाः॥ परिणो रुद्रस्य हेतिर्वृणक्तु
 परि त्वेषस्य दुर्मतिरघायोः। अव स्थिरा मघवञ्चस्तनुष्व
 मीढ्वस्तोकाय तनयाय मृडय॥ मीढुष्टम् शिवतम शिवो नः
 सुमना भव। परमे वृक्ष आयुधं निधाय कृत्तिं वसान् आ
 चर पिनाकं बिभ्रदा गहि॥ विकिरिद विलोहित नमस्ते
 अस्तु भगवः। यास्ते सहस्रं हेतयोऽन्यमस्मन्नि वपन्तु ताः॥
 सहस्राणि सहस्रधा बाहुवोस्तव हेतयः। तासामीशानो भगवः
 पराचीना मुखा कृधि॥१०॥

सहस्राणि सहस्रशो ये रुद्रा अधि भूम्याम्। तेषां
 सहस्रयोजनेऽव धन्वानि तन्मसि॥ अस्मिन् महत्यर्णवे-
 ऽन्तरिक्षे भवा अधि॥ नीलग्रीवाः शितिकण्ठाः शर्वा
 अधः, क्षमाचराः॥ नीलग्रीवाः शितिकण्ठा दिवः रुद्रा
 उपश्रिताः॥ ये वृक्षेषु सस्मिञ्च नीलग्रीवा विलोहिताः॥
 ये भूतानामधिपतयो विशिखासः कपर्दिनः॥ ये अन्त्रेषु
 विविध्यन्ति पात्रेषु पिबन्तो जनान्॥ ये पथां पथिरक्षय

ऐलबृदा यव्युधः॥ ये तीर्थानि प्रचरन्ति सूकावन्तो
 निषङ्गिणः॥ य एतावन्तश्च भूयांसश्च दिशो रुद्रा
 वितस्थिरे॥ तेषां सहस्रयोजनेऽव धन्वानि तन्मसि॥
 नमो रुद्रेभ्यो ये पृथिव्यां येऽन्तरिक्षे ये दिवि येषामन्नं
 वातो वर्षमिषवस्तेभ्यो दश प्राचीर्दश दक्षिणा दश
 प्रतीचीर्दशोदीचीर्दशोर्ध्वास्तेभ्यो नमस्ते नो मृडयन्तु ते यं
 द्विष्मो यश्च नो द्वेष्टि तं वो जम्भे दधामि॥११॥

त्र्यम्बकं यजामहे सुगन्धिं पुष्टिवर्धनम्। उर्वारुकमिव
 बन्धनान्मृत्योर्मुक्षीय माऽमृतात्॥ यो रुद्रो अग्नौ यो अप्सु
 य ओषधीषु यो रुद्रो विश्वा भुवनाऽऽविवेश तस्मै रुद्राय
 नमो अस्तु॥ तमुष्टुहि यः स्विषुः सुधन्वा यो विश्वस्य
 क्षयति भेषजस्य।

(ऋक्) यक्ष्वा॑महे सौ॑म॒न॒साय॑ रु॒द्रं नमो॑भिर्दे॒वमसुरं
 दुव॑स्य॥ अ॒यं मे ह॑स्तो भ॒गवान॑यं मे भ॒गव॑त्तरः। अ॒यं मे
 विश्व॑भेष॒जोऽयं शि॒वाभि॑मर्शनः॥

ये ते सहस्रम॒युतं पाशा॑ मृत्यो॒ मर्त्या॑य॒ हन्त॑वे। तान्
 य॒ज्ञस्य॑ मा॒यया॑ सर्वा॒नव॑ यजामहे। मृत्यवे॒ स्वाहा॑ मृत्यवे॒
 स्वाहा॑॥ ओं नमो भगवते रुद्राय विष्णवे मृत्यु॒र्मे पा॒हि।
 प्राणानां ग्रन्थिरसि रुद्रो मां विशान्तकः। तेनान्नेना॑प्याय॒स्व॥
 नमो रुद्राय विष्णवे मृत्यु॒र्मे पा॒हि॥

॥ॐ शान्तिः॒ शान्तिः॒ शान्तिः॑॥

॥ चमकप्रश्नः ॥

अग्नाविष्णू सजोषसेमा वर्धन्तु वां गिरः। द्युमैर्वाजैर्भिरा-
गतम्॥ वाजश्च मे प्रसवश्च मे प्रयतिश्च मे प्रसितिश्च मे
धीतिश्च मे क्रतुश्च मे स्वरश्च मे श्लोकश्च मे श्रावश्च मे श्रुतिश्च
मे ज्योतिश्च मे सुवश्च मे प्राणश्च मेऽपानश्च मे व्यानश्च
मेऽसुश्च मे चित्तं च म आधीतं च मे वाक्च मे मनश्च मे
चक्षुश्च मे श्रोत्रं च मे दक्षश्च मे बलं च म ओजश्च मे सहश्च
म आयुश्च मे जरा च म आत्मा च मे तनूश्च मे शर्म च
मे वर्म च मेऽङ्गानि च मेऽस्थानि च मे परूषि च मे
शरीराणि च मे॥१॥

ज्यैष्ठ्यं च म आधिपत्यं च मे मन्युश्च मे भामश्च मेऽमश्च
मेऽम्भश्च मे जेमा च मे महिमा च मे वरिमा च मे प्रथिमा
च मे वर्ष्मा च मे द्राघुया च मे वृद्धं च मे वृद्धिश्च मे सत्यं
च मे श्रद्धा च मे जगच्च मे धनं च मे वशश्च मे त्विषिश्च
मे क्रीडा च मे मोदश्च मे जातं च मे जनिष्यमाणं च मे
सूक्तं च मे सुकृतं च मे वित्तं च मे वेद्यं च मे भूतं च मे
भविष्यच्च मे सुगं च मे सुपथं च म ऋद्धं च म ऋद्धिश्च मे
क्लृप्तं च मे क्लृप्तिश्च मे मतिश्च मे सुमतिश्च मे॥२॥

शं च मे मयश्च मे प्रियं च मेऽनुकामश्च मे कामश्च मे
सौमनसश्च मे भद्रं च मे श्रेयश्च मे वस्यश्च मे यशश्च मे
भगश्च मे द्रविणं च मे यन्ता च मे धर्ता च मे क्षेमश्च मे

धृतिश्च मे विश्वं च मे महश्च मे संविच्च मे ज्ञात्रं च मे सूश्च मे
 प्रसूश्च मे सीरं च मे लयश्च मे ऋतं च मेऽमृतं च मेऽयक्ष्मं
 च मेऽनामयच्च मे जीवातुश्च मे दीर्घायुत्वं च मेऽनमित्रं च
 मेऽभयं च मे सुगं च मे शयनं च मे सूषा च मे सुदिनं च
 मे॥३॥

ऊर्कं मे सूनृतां च मे पयश्च मे रसश्च मे घृतं च मे
 मधुं च मे सग्धिश्च मे सर्पीतिश्च मे कृषिश्च मे वृष्टिश्च मे
 जैत्रं च मे औद्भिद्यं च मे रयिश्च मे रायश्च मे पुष्टं च मे
 पुष्टिश्च मे विभुं च मे प्रभुं च मे बहुं च मे भूयश्च मे पूर्णं
 च मे पूर्णतरं च मेऽक्षितिश्च मे कूयवाश्च मेऽन्नं च मेऽक्षुच्च
 मे ब्रीहयश्च मे यवांश्च मे माषांश्च मे तिलांश्च मे मुद्गाश्च मे
 खल्वांश्च मे गोधूमांश्च मे मसुरांश्च मे प्रियङ्गवश्च मेऽणवश्च
 मे श्यामाकांश्च मे नीवारांश्च मे॥४॥

अश्मां च मे मृत्तिकां च मे गिरयश्च मे पर्वताश्च मे
 सिकताश्च मे वनस्पतयश्च मे हिरण्यं च मेऽयश्च मे सीसं
 च मे त्रपुंश्च मे श्यामं च मे लोहं च मेऽग्निश्च मे आपंश्च
 मे वीरुधंश्च मे ओषधयश्च मे कृष्टपच्यं च मेऽकृष्टपच्यं च
 मे ग्राम्याश्च मे पशवं आरण्याश्च यज्ञेन कल्पन्तां वित्तं च
 मे वित्तिश्च मे भूतं च मे भूतिश्च मे वसुं च मे वसुतिश्च मे
 कर्म च मे शक्तिश्च मेऽर्थश्च मे एमंश्च मे इतिश्च मे गतिश्च

मे॥५॥

अ॒ग्निश्च॑ म॒ इन्द्र॑श्च मे॒ सोम॑श्च म॒ इन्द्र॑श्च मे॒ सवि॒ता च॑
म॒ इन्द्र॑श्च मे॒ सर॑स्वती च म॒ इन्द्र॑श्च मे॒ पूषा॑ च॒ म॒ इन्द्र॑श्च
मे॒ बृह॑स्पतिश्च म॒ इन्द्र॑श्च मे॒ मि॒त्रश्च॑ म॒ इन्द्र॑श्च मे॒ वरु॑णश्च
म॒ इन्द्र॑श्च मे॒ त्वष्टा॑ च म॒ इन्द्र॑श्च मे॒ धा॒ता च॑ म॒ इन्द्र॑श्च मे॒
विष्णु॑श्च म॒ इन्द्र॑श्च मे॒ऽश्विनौ॑ च म॒ इन्द्र॑श्च मे॒ मरु॑तश्च म॒
इन्द्र॑श्च मे॒ विश्वे॑ च मे॒ दे॒वा इन्द्र॑श्च मे॒ पृथि॑वी च॒ म॒ इन्द्र॑श्च
मे॒ऽन्तरि॑क्षं च म॒ इन्द्र॑श्च मे॒ द्यौश्च॑ म॒ इन्द्र॑श्च मे॒ दि॒शश्च॑ म॒
इन्द्र॑श्च मे॒ मूर्धा॑ च॒ म॒ इन्द्र॑श्च मे॒ प्र॒जाप॑तिश्च म॒ इन्द्र॑श्च मे॥६॥

अ॒॒शुश्च॑ मे॒ र॒श्मिश्च॑ मे॒ऽदा॑भ्यश्च॒ मे॒ऽधि॑पतिश्च म॒
उपा॒॒शुश्च॑ मे॒ऽन्तर्या॑मश्च॒ म॒ ऐन्द्र॑वायवश्च॒ मे॒ मै॒त्रावरु॑णश्च॒
म॒ आ॒श्विन॑श्च॒ मे॒ प्र॒तिप्र॑स्थानश्च॒ मे॒ शुक्र॑श्च॒ मे॒ म॒न्थी च॑
म॒ आ॒ग्रय॑णश्च॒ मे॒ वैश्व॑देवश्च॒ मे॒ ध्रु॒वश्च॑ मे॒ वैश्वान॑रश्च॒ म॒
ऋ॒तुग्र॑हाश्च॒ मे॒ऽति॒ग्रा॒ह्याश्च॑ म॒ ऐन्द्रा॑ग्रश्च॒ मे॒ वैश्व॑देवश्च॒ मे॒
मरु॑त्वतीयाश्च॒ मे॒ माहे॑न्द्रश्च॒ म॒ आ॒दि॒त्यश्च॑ मे॒ सा॒वि॒त्रश्च॑ मे॒
सा॒रस्व॑तश्च॒ मे॒ पौ॒ष्णश्च॑ मे॒ पा॒त्नीव॑तश्च॒ मे॒ हा॒रि॒यो॒ज॒नश्च॑
मे॥७॥

इ॒ध्मश्च॑ मे॒ ब॒र्हिश्च॑ मे॒ वे॒दिश्च॑ मे॒ धि॒ष्णि॒याश्च॑ मे॒ सु॒च॑श्च॒ मे॒
च॒म॒सा॑श्च॒ मे॒ ग्रा॒वा॒णश्च॑ मे॒ स्वर॑वश्च॒ म॒ उप॑र॒वाश्च॑ मे॒ऽधि॑षव॒णे च॑
मे॒ द्रो॑णकल॒शश्च॑ मे॒ वा॒य॒व्या॒नि च॑ मे॒ पू॒त॒भृ॒च्च॑ म॒ आ॒ध॒व॒नीय॑श्च॒
म॒ आ॒ग्नी॑ध्रं च॒ मे॒ ह॒वि॒र्धानं॑ च॒ मे॒ गृ॒हाश्च॑ मे॒ स॒द॑श्च॒ मे॒

पुरोडाशांश्च मे पचतांश्च मेऽवभृथंश्च मे स्वगाकारंश्च मे॥८॥

अग्निंश्च मे घर्मंश्च मेऽर्कंश्च मे सूर्यंश्च मे प्राणंश्च मेऽश्वमेधंश्च मे पृथिवी च मेऽदितिंश्च मे दितिंश्च मे द्यौश्च मे शक्रं रीरङ्गुलं यो दिशंश्च मे यज्ञेन कल्पन्तामृक् मे सामं च मे स्तोमंश्च मे यजुंश्च मे दीक्षा च मे तपंश्च म ऋतुंश्च मे व्रतं च मेऽहोरात्रयोर्वृष्ट्या बृहद्रथन्तरे च मे यज्ञेन कल्पेताम्॥९॥

गर्भांश्च मे वत्सांश्च मे त्र्यविंश्च मे त्र्यवी च मे दित्यवाच्च मे दित्यौही च मे पश्चाविंश्च मे पश्चावी च मे त्रिवत्संश्च मे त्रिवत्सा च मे तुर्यवाच्च मे तुर्यौही च मे पष्ठवाच्च मे पष्ठौही च म उक्षा च मे वशा च म ऋषभंश्च मे वेहच्च मेऽनुङ्वां च मे धेनुंश्च म आयुर्यज्ञेन कल्पतां प्राणो यज्ञेन कल्पतामपानो यज्ञेन कल्पतां व्यानो यज्ञेन कल्पतां चक्षुर्यज्ञेन कल्पतां श्रोत्रं यज्ञेन कल्पतां मनो यज्ञेन कल्पतां वाग्यज्ञेन कल्पतामात्मा यज्ञेन कल्पतां यज्ञो यज्ञेन कल्पताम्॥१०॥

एकां च मे तिस्रंश्च मे पञ्चं च मे सप्तं च मे नवं च म एकादशं च मे त्रयोदशं च मे पञ्चदशं च मे सप्तदशं च मे नवदशं च म एकविंशतिंश्च मे त्रयोविंशतिंश्च मे पञ्चविंशतिंश्च मे सप्तविंशतिंश्च मे नवविंशतिंश्च म एकत्रिंशच्च मे त्रयस्त्रिंशच्च मे चतस्रंश्च मेऽष्टौ च मे द्वादशं च मे षोडशं च मे विंशतिंश्च मे चतुर्विंशतिंश्च मेऽष्टाविंशतिंश्च मे द्वात्रिंशच्च

मे षट्त्रिंशच्च मे चत्वारिंशच्च मे चतुश्चत्वारिंशच्च
 मेऽष्टाचत्वारिंशच्च मे वाजंश्च प्रसवश्चापिजश्च क्रतुश्च
 सुवश्च मूर्धा च व्यशिन्यश्चाऽऽन्त्यायनश्चान्त्यश्च भौवनश्च
 भुवनश्चाधिपतिश्च॥११॥

इडां देवहूर्मनुर्यज्ञनीर्बृहस्पतिरुक्थामदानिं शंसिषद्विश्वेदेवाः
 सूक्तवाचः पृथिवि मातर्मा मां हिंसीर्मधुं मनिष्ये मधुं
 जनिष्ये मधुं वक्ष्यामि मधुं वदिष्यामि मधुमतीं देवेभ्यो
 वाचमुद्यासं शुश्रूषेण्यां मनुष्येभ्यस्तं मां देवा अंवन्तु
 शोभायै पितरोऽनुमदन्तु॥

॥ॐ शान्तिः शान्तिः शान्तिः॥

॥ पुरुषसूक्तम् ॥

सहस्रशीर्षा पुरुषः। सहस्राक्षः सहस्रपात्। स भूमिं
 विश्वतो वृत्वा। अत्यतिष्ठदशाङ्गुलम्॥ पुरुष एवेदं सर्वम्।
 यद्भूतं यच्च भव्यम्। उतामृतत्वस्येशानः। यदन्नेनातिरोहति॥
 एतावानस्य महिमा। अतो ज्यायांश्च पूरुषः। पादोऽस्य
 विश्वा भूतानि। त्रिपादस्यामृतं दिवि॥ त्रिपादूर्ध्व उदैत्पुरुषः।
 पादोऽस्येहाऽऽभवात्पुनः। ततो विश्वङ्मकामत्। साशनानशने
 अभि॥ तस्माद्विराडजायत। विराजो अधि पूरुषः। स
 जातो अत्यरिच्यत। पश्चाद्भूमिमथो पुरः॥ यत्पुरुषेण
 हविषा। देवा यज्ञमतन्वत। वसन्तो अस्याऽऽसीदाज्यम्।
 ग्रीष्म इध्मः शरद्धविः॥ सप्तास्याऽऽसन् परिधयः।
 त्रिः सप्त समिधः कृताः। देवा यद्यज्ञं तन्वानाः।
 अबध्नन् पुरुषं पशुम्॥ तं यज्ञं बर्हिषि प्रौक्षन्। पुरुषं
 जातमग्रतः। तेन देवा अयजन्त। साध्या ऋषयश्च ये॥
 तस्माद्यज्ञात्सर्वहुतः। सम्भृतं पृषदाज्यम्। पशूँस्ताँश्चक्रे
 वायव्यान्। आरण्यान्ग्राम्याश्च ये॥ तस्माद्यज्ञात्सर्वहुतः।
 ऋचः सामानि जज्ञिरे। छन्दाँसि जज्ञिरे तस्मात्।
 यजुस्तस्मादजायत॥ तस्मादश्वा अजायन्त। ये के
 चौभयादतः। गावो ह जज्ञिरे तस्मात्। तस्माज्जाता
 अजावयः॥ यत्पुरुषं व्यदधुः। कतिधा व्यकल्पयन्। मुखं
 किमस्य कौ बाहू। कावूरू पादावुच्येते॥ ब्राह्मणोऽस्य

मुखमासीत्। बा॒हू रा॒ज॒न्यः कृ॒तः। ऊ॒रू तद॑स्य॒ यद्वै॑श्यः।
 प॒द्भ्या॑ꣳ शू॒द्रो अ॑जायत॥ च॒न्द्रमा॒ मन॑सो जा॒तः। चक्षोः॒ सूर्यो॑
 अजायत। मु॒खादिन्द्र॑श्चा॒ग्निश्च॑। प्रा॒णाद्वा॒युर॑जायत॥ नाभ्या॑
 आसीद॒न्तरि॑क्षम्। शी॒र्ष्णो द्यौः स॑म॒वर्त॑त। प॒द्भ्यां भूमि॑र्दिशः
 श्रोत्रा॑त्। तथा॑ लो॒काꣳ अ॑कल्पयन्॥ वेदा॒हमे॒तं पु॑रुषं
 म॒हान्त॑म्। आ॒दि॒त्यव॑र्णं तम॑स॒स्तु पा॑रे॥ सर्वा॑णि रू॒पाणि॑
 वि॒चित्य॒ धीरः॑। नामा॑नि कृ॒त्वाऽभि॑वदन् यदास्ते॥ धा॒ता
 पु॒रस्ता॑द्यमु॒दाज॑हार। श॒क्रः प्र॑वि॒द्वान् प्र॑दिशश्चत॑स्रः। तमे॒वं
 वि॒द्वान॒मृत॑ इ॒ह भ॑वति। नान्यः पन्था॒ अय॑नाय विद्यते॥
 य॒ज्ञेन॑ य॒ज्ञम॑यजन्त दे॒वाः। तानि॒ धर्मा॑णि प्रथ॒मान्या॑सन्। ते
 ह॒ नाकं॑ महि॒मानः॑ सचन्ते। यत्र॒ पूर्वं सा॒ध्याः सन्ति॑ दे॒वाः॥
 अ॒द्भ्यः सम्भू॑तः पृथि॒व्यै रसा॑च्च। वि॒श्वक॑र्मणः स॒मव॑र्तताधि॑।
 तस्य॒ त्वष्टा॑ वि॒दध॑द्रूपमे॒ति। तत्पु॑रुषस्य वि॒श्वमाजा॑न॒मग्रे॑॥
 वेदा॒हमे॒तं पु॑रुषं म॒हान्त॑म्। आ॒दि॒त्यव॑र्णं तम॑सः पर॑स्तात्।
 तमे॒वं वि॒द्वान॒मृत॑ इ॒ह भ॑वति। नान्यः पन्था॒ विद्य॑तेऽय॒नाय॥
 प्र॒जाप॑तिश्चरति॒ गर्भे॑ अ॒न्तः। अ॒जाय॑मानो बहुधा विजा॑यते।
 तस्य॒ धीराः॒ परि॑जानन्ति॒ योनि॑म्। मरी॑चीनां प॒दमि॑च्छन्ति
 वे॒धसः॑॥ यो दे॒वेभ्य॒ आत॑पति। यो दे॒वानां॑ पु॒रोहि॑तः।
 पूर्वं यो दे॒वेभ्यो॑ जा॒तः। नमो॑ रु॒चाय॒ ब्राह्म॑ये॥ रुचं॑ ब्रा॒ह्मं
 ज॒नय॑न्तः। दे॒वा अग्रे॑ तद॑ब्रुवन्। यस्त्वै॒वं ब्रा॑ह्म॒णो वि॒द्यात्।
 तस्य॑ दे॒वा अस॑न् वशे॑॥ ह्रीश्च॑ ते ल॒क्ष्मीश्च॒ पत्न्यौ॑। अ॒होरा॒त्रे

पा॒र्श्वे। नक्ष॑त्राणि रू॒पम्। अ॒श्विनौ॑ व्या॒त्तम्। इ॒ष्टं म॑निषाण।
अ॒मुं म॑निषाण। सर्व॑ मनिषाण॥

॥ ॐ शान्तिः॒ शान्तिः॒ शान्तिः॑ ॥

॥ नारायणसूक्तम् ॥

(तैत्तिरीयारण्यकम्/प्रपाठकः - १०/अनुवाकः - १३)

स॒हस्र॑शी॒र्षं दे॒वं वि॒श्वाक्षं॑ वि॒श्वश॑म्भुवम्। वि॒श्वं
ना॒राय॑णं दे॒वम॑क्षरं॒ पर॑मं प॒दम्। वि॒श्वतः॑ पर॑मान्नित्यं वि॒श्वं
ना॒राय॑णः ह॒रिम्। वि॒श्वमे॒वेदं॑ पु॒रुष॑स्तद्वि॒श्वमु॑पजीवति।
पतिं॑ वि॒श्वस्या॑ऽऽत्मे॒श्वर॑ः शाश्व॑तः शि॒वम॑च्युतम्। ना॒राय॑णं
महा॑ज्ञेयं वि॒श्वात्मा॑नं प॒राय॑णम्। ना॒राय॑णप॑रो ज्योति॒रात्मा
ना॒राय॑णः प॑रः। ना॒राय॑ण प॑रं ब्र॒ह्म त॒त्त्वं ना॒राय॑णः
प॑रः। ना॒राय॑णप॑रो ध्या॒ता ध्या॑नं ना॒राय॑णः प॑रः। यच्च॑
किञ्चि॑ज्जग॒त्सर्वं॑ दृ॒श्यते॑ श्रूय॒तेऽपि॑ वा॥

अन्त॑र्ब॒हिश्च॑ तत्स॒र्वं व्या॑प्य ना॒राय॑णः स्थि॑तः।
अन॑न्तमव्ययं क॒विः स॑मु॒द्रेऽन्तं॑ वि॒श्वश॑म्भुवम्।
प॒द्म॒को॒श प्र॑तीका॒शः हृ॒दयं॑ चाप्य॒धोमु॑खम्। अधो॑
नि॒ष्ट्या वि॑तस्त्यान्ते ना॒भ्यामु॑परि तिष्ठ॑ति। ज्वा॒ल॒मा॒लाकु॑लं
भा॒ती वि॒श्वस्या॑ऽऽय॒तनं॑ मह॑त्। सन्त॑तः शि॒लाभि॑स्तु॒-
ल॒म्ब॒त्याको॑शसन्निभम्। तस्यान्ते॑ सु॒षिरः॑ सू॒क्ष्मं तस्मि॑न्सर्वं
प्रति॑ष्ठितम्। तस्य॒ मध्ये॑ म॒हान॑ग्निर्वि॒श्वार्चि॑र्वि॒श्वतो॑मुखः।

सोऽग्रं॑भु॒ग्विभ॑जन्ति॒ष्ठन्ना॑हारमज॒रः क॒विः। ति॒र्य॒गूर्ध्वम॑धः
 शा॒यी र॒श्मय॑स्तस्य॒ सन्त॑ता। सन्ता॒पय॑ति स्वं दे॒हमा॑पादतल॒मस्त॑क
 तस्य॒ मध्ये॒ वह्नि॑शिखा अ॒णीयो॑र्ध्वा व्य॒वस्थि॑तः। नी॒लतो॑यद॒-
 मध्य॑स्था॒द्विद्यु॑ल्लेखेव॒ भास्व॑रा। नी॒वार॒शूक॑वत्तन्वी पी॒ता
 भा॑स्वत्य॒णूप॑मा। तस्याः॑ शिखा॒या म॑ध्ये परमा॑त्मा
 व्य॒वस्थि॑तः। स ब्र॒ह्म स शिवः॑ स हरिः॒ सेन्द्रः॑ सोऽक्षरः॑
 पर॒मः स्व॒राट्॥ ऋ॒तं स॒त्यं परं॑ ब्र॒ह्म पु॒रुषं॑ कृष्ण॒पिङ्ग॑लम्।
 ऊ॒र्ध्वरे॑तं वि॒रूपाक्षं॑ वि॒श्वरू॑पाय॒ वै नमो॑ नमः।

ना॒रा॒य॒णाय॑ वि॒द्महे॑ वा॒सुदे॒वाय॑ धीमहि। तन्नो॑ विष्णुः
 प्रचो॒दया॑त्।

विष्णो॒र्नु कं॑ वी॒र्या॑णि॒ प्रवो॑चं॒ यः पार्थि॑वानि
 विम॒मे रजा॑ंसि॒ यो अ॒स्क॒भाय॑दुत्तरं॑ स॒धस्थं॑
 विचक्र॑माण॒स्त्रेधो॑रु॒गायो॑ विष्णो॒ररा॑टमसि॒ विष्णोः॑ पृ॒ष्ठम॑सि॒
 विष्णोः॑ श्र॒त्रेस्थो॑ विष्णोः॒ स्यू॑रसि॒ विष्णो॑र्ध्रु॒वम॑सि॒ वैष्ण॑वम॑सि॒
 विष्ण॑वे त्वा॥

॥ ॐ शान्तिः॒ शान्तिः॒ शान्तिः॑ ॥

॥ विष्णुसूक्तम् ॥

विष्णो॒र्नु कं॑ वी॒र्या॑णि॒ प्रवो॑चं॒ यः पार्थि॑वानि
 विम॒मे रजा॑ंसि॒ यो अ॒स्क॒भाय॑दुत्तरं॑ स॒धस्थं॑
 विचक्र॑माण॒स्त्रेधो॑रु॒गायः॑ ॥

तदस्य प्रियमभिपार्थो अश्याम्। नरो यत्र देवयवो मदन्ति।
 उरुक्रमस्य स हि बन्धुरित्था। विष्णोः पदे परमे मध्व उथ्सः।
 प्र तद्विष्णुः स्तवते वीर्याय। मृगो न भीमः कुचरो गिरिष्ठाः।
 यस्योरुषु त्रिषु विक्रमणेषु। अधिक्षियन्ति भुवनानि विश्वा।
 परो मात्रया तनुवा वृधान। न ते महित्वमन्वञ्जुवन्ति॥

उभे ते विद्म रजसी पृथिव्या विष्णो देवत्वम्।
 परमस्य विथ्से। विचक्रमे पृथिवीमेष एताम्। क्षेत्राय
 विष्णुर्मनुषे दशस्यन्। ध्रुवासो अस्य कीरयो जनांसः।
 उरुक्षितिः सुजनिमाचकार। त्रिदेवः पृथिवीमेष एताम्।
 विचक्रमे शतर्चसं महित्वा। प्र विष्णुरस्तु तवसस्तवीयान्।
 त्वेषः ह्यस्य स्थविरस्य नाम॥

॥ भूसूक्तम् ॥

(तैत्तिरीय संहिता काण्डम् - १/प्रपाठकः - ५/अनुवाकः - ३)

भूमिर्भूम्ना द्यौर्वरिणाऽन्तरिक्षं महित्वा। उपस्थे
 ते देव्यदितेऽग्निमन्त्रादमन्त्राद्यायाऽऽदधे। आऽयङ्गौः
 पृश्निरक्रमीदसनन्मातरं पुनः। पितरं च प्रयन्त्सुवः।
 त्रिःशद्धाम वि राजति वाक्पतङ्गाय शिश्रिये। प्रत्यस्य
 वह द्युभिः। अस्य प्राणादपानत्यन्तश्चरति रोचना। व्यंख्यन्
 महिषः सुवः॥

यत्वा क्रुद्धः परोवप मन्युना यदवर्त्या। सुकल्पमग्ने

तत्तव पुनस्त्वोद्दीपयामसि। यत्ते मन्युपरोत्तस्य पृथिवीमनु
 दध्वसे। आदित्या विश्वे तद्देवा वसवश्च समाभरन्।
 मनो ज्योतिर्जुषतामाज्यं विच्छिन्नं यज्ञं समिमं दधातु।
 बृहस्पतिस्तनुतामिमं नो विश्वे देवा इह मादयन्ताम्। सप्त
 ते अग्ने समिधः सप्त जिह्वाः सप्तरषयः सप्त धाम प्रियाणि।

सप्त होत्राः सप्तधा त्वा यजन्ति सप्त योनीरापृणस्वा
 घृतेन। पुनरूर्जा नि वर्तस्व पुनरग्र इषाऽऽयुषा। पुनर्नः
 पाहि विश्वतः। सह रय्या नि वर्तस्वाग्ने पिन्वस्व धारया।
 विश्वप्स्त्रिया विश्वतस्परि। लेकः सलैकः सुलेकस्ते
 न आदित्या आज्यं जुषाणा विंयन्तु केतः सकेतः
 सुकेतस्ते न आदित्या आज्यं जुषाणा विंयन्तु विवस्वाः
 अदितिर्देवजूतिस्ते न आदित्या आज्यं जुषाणा विंयन्तु।

॥दुर्गा सूक्तम्॥

(तैत्तिरीयारण्यकम्/प्रपाठकः - १०/अनुवाकः - २)

जा॒तवे॑दसे सु॒नवाम् सोमं॑ म॒राती॑य॒तो नि॒दंहा॑ति॒ वेदः॑ । स
नः॑ प॒र्षद॑ति॒ दुर्गा॑णि॒ विश्वा॑ न॒वेव॑ सि॒न्धुं दुरि॑ताऽत्य॒ग्निः॥१॥

ताम॒ग्निव॑र्णां तप॑सा ज्वल॒न्तीं वैरो॑च॒नीं क॑र्म॒फले॑षु जुष्टा॑म् ।
दुर्गा॑ दे॒वीः श॑रण॒महं॑ प्रप॑द्ये सु॒तर॑सि तर॒से नमः॑ ॥२॥

अ॒ग्ने त्वं पा॑रया॒ नव्यो॑ अ॒स्मान्ध॒स्वस्ति॑भिर॒तिं दुर्गा॑णि॒
विश्वा॑ । पू॒श्च पृ॑थ्वी बे॒हुला॑ न उ॒र्वी भवा॑ तो॒काय॑ तन॑याय॒ शं
योः॥३॥

विश्वा॑नि नो दु॒र्गहा॑ जा॒तवे॑दः सि॒न्धुं न ना॒वा
दुरि॑ताऽति॒प॒र्षि । अ॒ग्ने अ॒त्रि॒वन्म॑न॒सा गृ॑णा॒नोऽस्मा॑कं
बो॒ध्यवि॑ता त॒नूना॑म् ॥४॥

पृ॒त॒ना जि॑तः॒ सह॑मा॒नमु॒ग्रम॒ग्निः हु॑वेम प॒रमा॑ध॒स्थोत् ।
स नः॑ प॒र्षद॑ति॒ दुर्गा॑णि॒ विश्वा॑ क्षा॒मद्दे॒वो अ॒ति
दुरि॑तात्य॒ग्निः॥५॥

प्र॒लोषि॑ क॒मीड्यो॑ अध्व॒रेषु॑ स॒नाच्च॑ हो॒ता नव्य॑श्च स॒त्सि॑ ।
स्वाश्चा॑ग्ने त॒नुवं पि॒प्रय॑स्वा॒स्मभ्य॑ च सौ॒भ॒ग॒माय॑ज॒स्व ॥६॥

गोभि॑र्जुष्ट॒मयु॑जो निषि॑क्तं तवै॑न्द्र वि॒ष्णो॒रनु॑स॒ञ्चरे॑म ।
नाक॑स्य पृ॒ष्ठम॒भि सं॒वसा॑नो वैष्ण॑वीं लो॒क इ॒ह
मा॑दय॒न्ताम् ॥७॥

का॒त्या॒य॒नाय॑ वि॒द्महे॑ क॒न्यकु॑मा॒रि॑ धीमहि।
तन्नो॑ दु॒र्गिः प्रचो॒दया॑त्॥

॥ श्रीसूक्तम् ॥

हि॒र॒ण्यव॑र्णा॒ हरि॑णीं सुव॒र्णर॑ज॒तस्र॑जाम्। च॒न्द्रां हि॒र॒ण्मयीं॑
ल॒क्ष्मीं॑ जा॒तवे॑दो म॒ आव॑ह॥१॥

तां म॒ आव॑ह जा॒तवे॑दो ल॒क्ष्मीम॑न॒पगा॒मिनी॑म्। यस्यां
हि॒र॒ण्यं वि॒न्देयं॑ गा॒मश्च॑ पु॒रुषा॑न॒हम्॥२॥

अ॒श्वपूर्वा॑ र॒थम॑ध्यां ह॒स्तिना॑दप्र॒बोधि॑नीम्। श्रियं॑
दे॒वीमु॑प॒ह्वये॒ श्रीमा॑दे॒वीर्जुष॑ताम्॥३॥

कां सोऽ॒स्मितां॑ हि॒र॒ण्यप्रा॑का॒रामा॒र्द्रां ज्वल॑न्तीं तृ॒तां
त॒र्पय॑न्तीम्। प॒द्मे स्थि॑तां प॒द्मव॑र्णां ता॒मि॒होप॑ह्वये श्रियम्॥४॥

च॒न्द्रां प्र॑भा॒सां य॒शसा॑ ज्वल॑न्तीं श्रियं॑ लो॒के
दे॒वजु॑ष्टा॒मुदा॑राम्। तां प॒द्मिनी॑मीं शर॑णम॒हं प्र॑प॒द्येऽल॒क्ष्मीमे॑
न॒श्यतां॑ त्वां वृ॒णे॥५॥

आ॒दि॒त्यव॑र्णे तप॒सोऽधि॑जा॒तो व॒नस्प॑तिस्त॒व वृ॒क्षोऽथ
बि॒ल्वः। तस्य॑ फ॒ला॒नि तप॑सा नु॒दन्तु॑ मा॒यान्त॑रा॒याश्च॑ बा॒ह्या
अ॒ल॒क्ष्मीः॥६॥

उ॒पैतु॑ मां दे॒वस॒खः की॒र्तिश्च॑ म॒णिना॑ स॒ह। प्रा॒दुर्भू॑तोऽस्मि॑
राष्ट्रेऽ॒स्मिन् की॒र्तिमृ॑द्धि॑ ददा॒तु मे॥७॥

क्षुत्पिपासामलां ज्येष्ठामलक्ष्मीं नाशयाम्यहम्। अभूति-
मसंमृद्धिं च सर्वां निर्णुद मे गृहात्॥८॥

गन्धद्वारां दुराधर्षां नित्यपुष्टां करीषिणीम्। ईश्वरीं
सर्वभूतानां तामिहोपह्वये श्रियम्॥९॥

मनसः काममाकूतिं वाचः सत्यमशीमहि। पशूनां
रूपमन्नस्य मयि श्रीः श्रयतां यशः॥१०॥

कर्दमेन प्रजाभूता मयि सम्भव कर्दम। श्रियं वासय मे
कुले मातरं पद्ममालिनीम्॥११॥

आपः सृजन्तु स्निग्धानि चिक्लीत वंस मे गृहे। नि च
देवीं मातरं श्रियं वासय मे कुले॥१२॥

आर्द्रा पुष्करिणीं पुष्टिं सुवर्णां हैममालिनीम्। सूर्या
हिरण्मयीं लक्ष्मीं जातवेदो म आवह॥१३॥

आर्द्रा यः करिणीं यष्टिं पिङ्गलां पद्ममालिनीम्। चन्द्रां
हिरण्मयीं लक्ष्मीं जातवेदो म आवह॥१४॥

तां म आवह जातवेदो लक्ष्मीमनपगामिनीम्। यस्यां
हिरण्यं प्रभूतं गावो दास्योऽश्वान् विन्देयं पुरुषानहम्॥१५॥

महादेव्यै च विद्महे विष्णुपत्न्यै च धीमहि। तन्नो लक्ष्मीः
प्रचोदयात्॥१६॥

॥ मेधासूक्तम् ॥

(तैत्तिरीयारण्यकम्/प्रपाठकः - १०/अनुवाकः - ४१-४४)

मे॒धादे॒वी जु॒षमा॑णा न॒ आगा॑द्वि॒श्वाची॑ भ॒द्रा सु॑मन॒स्यमा॑ना।
 त्वया॒ जुष्टा॑ नुद॒माना॑ दुरु॒क्तान् बृ॒हद्व॑दे॒म वि॒दथे॑ सु॒वीराः॑।
 त्वया॒ जुष्टं॑ ऋषि॒र्भव॑ति दे॒वि त्वया॒ ब्रह्मा॑ऽऽग॒तश्री॑रु॒त त्वया॑।
 त्वया॒ जुष्टं॑श्चि॒त्रं वि॑न्दते वसु॒ सानो॑ जुषस्व॒ द्रवि॑णो न
 मे॒धे॥ मे॒धां म॒ इन्द्रो॑ ददातु मे॒धां दे॒वी सर॑स्वती। मे॒धां मे॑
 अ॒श्विना॑वु॒भावाध॑त्तां पुष्क॑र॒स्रजा॑। अ॒प्सरा॑सु॒ च या॑ मे॒धा
 गन्ध॑र्वेषु॒ च य॑न्मनः। दै॒वीं मे॒धा सर॑स्वती॒ सा मां॑ मे॒धा
 सुर॑भिर्जुषता॒ऽऽ स्वाहा॑॥ आ मां॑ मे॒धा सुर॑भिर्वि॒श्वरू॑पा
 हि॒र॑ण्यव॒र्णा ज॑गती जग॒म्या। ऊ॒र्ज॑स्वती॒ पय॑सा॒ पिन्व॑माना॒
 सा मां॑ मे॒धा सु॒प्रती॑का जुषन्ताम्। मयि॑ मे॒धां मयि॑ प्र॒जां
 मय्य॑ग्नि॒स्तेजो॑ दधातु मयि॑ मे॒धां मयि॑ प्र॒जां मयीन्द्र॑ इन्द्रि॒यं
 द॑धातु मयि॑ मे॒धां मयि॑ प्र॒जां मयि॑ सूर्यो॒ भ्राजो॑ दधातु।

॥ रुद्रसूक्तम् ॥

(तेत्तिरीयसंहितायां काण्डम् - ४ / प्रपाठकः - ५ / अनुवाकः - १० / पञ्चादयः - २४)

परि॑ णो रु॒द्रस्य॑ हे॒तिर्वृ॑णक्तु परि॑ त्वे॒षस्य॑ दु॒र्मति॑र॒घा॒योः।
अव॑ स्थि॒रा म॒घव॑द्भ्यस्तनुष्व॒ मी॒ढ्वस्तो॒काय॑ तन॑याय मृ॒डय॑।

(तेत्तिरीयसंहितायां काण्डम् - ४ / प्रपाठकः - ५ / अनुवाकः - १० / पञ्चादयः - २३-२४)

स्तु॒हि श्रु॑तं ग॒र्तस॑दं यु॒वानं॑ मृ॒गं न भी॑ममु॒पहृ॑तुमु॒ग्रम्। मृ॒डा
ज॒रि॒त्रे रु॒द्र स्तवा॑नो अ॒न्यं ते॑ अ॒स्मन्नि॑ व॒पन्तु॑ सेनाः॑।

(तेत्तिरीयसंहितायां काण्डम् - ४ / प्रपाठकः - ५ / अनुवाकः - १० / पञ्चादयः - २४-२५)

मी॒ढुष्ट॑म् शि॒वत॑म शि॒वो नः॑ सु॒मना॑ भव। प॒रमे॑ वृ॒क्ष आ॒युधं॑
नि॒धाय॑ कृ॒त्तिं वसा॑न॒ आ च॑र॒ पिना॑कं बिभ्र॒दा ग॑हि।

(तेत्तिरीयारण्यके प्रपाठकः - ४ / अनुवाकः - ५ / पञ्चादयः - १८)

अ॒र्हन्बि॑भर्षि॒ साय॑कानि॒ धन्वा॑। अ॒र्हं नि॒ष्कं य॑ज॒तं
वि॒श्वरू॑पम्। अ॒र्हं नि॒दन्द॑यसे॒ विश्व॑म॒भुव॑म्। न वा ओ॒जीयो॑
रु॒द्र त्वद॑स्ति।

(तेत्तिरीयसंहितायां काण्डम् - १ / प्रपाठकः - ३ / अनुवाकः - १४ / पञ्चादयः - २४)

त्वम॑ग्रे रु॒द्रो असु॑रो म॒हो दि॒वस्त्व॑ श॒र्धो मा॑रु॒तं पृ॒क्ष
ई॒शिषे॑। त्वं वा॒तैर॑रु॒णैर्या॑सि शङ्ग॒यस्त्वं पू॒षा वि॑ध॒तः पा॑सि॒ नु
त्मना॑॥ आ वो॒ राजा॑नम॒ध्वर॑स्य रु॒द्रः हो॑ता॒रः स॒त्यय॑ज॒ः
रोद॑स्योः। अ॒ग्निं पु॒रा त॑नयि॒त्नोर॒चित्ता॒द्विर॑ण्यरू॒पम॑व॒से
कृ॒णुध्व॑म्॥

॥ वरुणसूक्तम् ॥

(तैत्तिरीयसंहितायां काण्डम् - १ / प्रपाठकः - ५ / अनुवाकः - ११ / पञ्चादयः - ४९-५०)

उदुत्त॑मं वरुण॑ पाश॑मस्मदवा॑धुमं वि म॑ध्य॒मं श्र॑थाय।
अथा॑ व॒यमा॑दित्यव्र॒ते तवाना॑गसो॒ अदि॑तये स्याम॥

(तैत्तिरीयसंहितायां काण्डम् - १ / प्रपाठकः - २ / अनुवाकः - ८ / पञ्चादयः - १५)

अस्त॑भ्रा॒द्यामृष॑भो अ॒न्तरि॑क्ष॒ममि॑मीत वरि॒माणं पृथि॑व्या।
आसी॑द॒द्विश्वा॒ भुव॑नानि स॒म्राड्वि॑श्वेत्तानि वरुण॑स्य व्र॒तानि॑।

(तैत्तिरीयसंहितायां काण्डम् - ३ / प्रपाठकः - ४ / अनुवाकः - ११ / पञ्चादयः - ४६)

यत्किं॑ चेदं वरुण॑ दैव्ये॒ जने॑ऽभिद्रो॒हं म॑नुष्या॑श्चरा॑मसि।
अचि॑त्ती॒ यत्तव॑ धर्मा॑ युयोपि॒म मा न॑स्तस्मा॒देन॑सो देव रीरिषः।
कि॒त॒वासो॑ यद्रि॑रि॒पुर्न दी॑वि यद्वा॒ घा स॒त्यमु॑त यन्न वि॒द्म।
सर्वा॑ ता वि ष्य॑ शिथि॒रेव॑ दे॒वाथा॑ ते स्याम वरुण॑ प्रि॒यासः॑॥

(तैत्तिरीयसंहितायां काण्डम् - १ / प्रपाठकः - ५ / अनुवाकः - ११ / पञ्चादयः - ४९-५०)

अव॑ ते हेडो॑ वरुण॑ नमो॑भिरव॑ य॒ज्ञेभि॑रीमहे ह॒विर्भिः॑।
क्षय॑न्न॒स्मभ्य॑मसुर प्रचेतो॒ राज॒त्रेना॑सि शिश्रथः कृ॒तानि॑॥

(तैत्तिरीयसंहितायां काण्डम् - २ / प्रपाठकः - १ / अनुवाकः - ११ / पञ्चादयः - ६५)

तत्त्वा॑ यामि॒ ब्रह्म॑णा॒ वन्द॑मान॒स्तदाऽऽशा॑स्ते॒ यज॑मानो
ह॒विर्भिः॑। अहे॑डमानो वरुणे॒ह बो॒द्ध्युरु॑श॒स मा न॑ आयुः
प्रमो॑षीः॥

ॐ शान्तिः॒ शान्तिः॒ शान्तिः॑॥

॥ ब्रह्मसूक्तम् ॥

(तैत्तिरीयब्राह्मणे अष्टकम् - २ / प्रपाठकः - ८ / अनुवाकः - ८ / पञ्चादयः - ६६-६९)

ब्रह्मं जज्ञानं प्रथमं पुरस्तात्। वि सीमतः सुरुचो वेन
आवः। स बुध्निया उप मा अस्य विष्ठाः॥६६॥

सुतश्च योनिमसंतश्च विवः। पिता विराजामृषभो रयीणाम्।
अन्तरिक्षं विश्वरूप आविवेश। तमर्कैरभ्यर्चन्ति वथ्सम्। ब्रह्म
सन्तं ब्रह्मणा वर्धयन्तः। ब्रह्म देवानजनयत्। ब्रह्म विश्वमिदं
जगत्। ब्रह्मणः क्षत्रं निर्मितम्। ब्रह्म ब्राह्मण आत्मना।
अन्तरस्मिन्निमे लोकाः॥६७॥

अन्तर्विश्वमिदं जगत्। ब्रह्मैव भूतानां ज्येष्ठम्।
तेन कोऽर्हति स्पर्धितुम्। ब्रह्मन्देवास्त्रयस्त्रिंशत्।
ब्रह्मन्निन्द्रप्रजापती। ब्रह्मन् ह विश्वा भूतानि। नावीवान्तः
सुमाहिता। चतस्र आशाः प्रचरन्त्वग्रयः। इमं नो यज्ञं नयतु
प्रजानन्। घृतं पिन्वन्नजरं सुवीरम्॥६८॥

ब्रह्म समिद्धवत्याहुतीनाम्।

॥ भाग्यसूक्तम् ॥

(तैत्तिरीय ब्राह्मणम् अष्टकम् - ३/प्रश्नः - ८/अनुवाकम् - ९)

प्रातरग्निं प्रातरिन्द्रं हवामहे प्रातर्मित्रा वरुणा प्रातरश्विनां।
प्रातर्भगं पूषणं ब्रह्मणस्पतिं प्रातः सोममुत रुद्रं हुवेम॥१॥

प्रा॒तर्जि॑तं॒ भग॑मु॒ग्रं॑ हु॒वेम॑ व॒यं पु॒त्रमदि॑ते॒र्यो वि॑ध॒र्ता।
 आ॒र्ध्रश्चि॑द्यं म॒न्य॑मानस्तु॒रश्चि॑द्राजा॒ चि॒द्यं भग॑ं भ॒क्षीत्या॑ह॥२॥
 भग॑ प्र॒णेत॑र्भग॒ सत्य॑राधो॒ भगे॑मां धि॒यमुद॑व दद॒न्नः।
 भग॑ प्र णो॑ जनय॒ गोभि॑र॒श्वैर्भग॑ प्र नृभि॒र्नृवन्तः॑ स्याम॥३॥
 उ॒तेदा॑नीं॒ भग॑वन्तः स्यामो॒त प्र॑पि॒त्व उ॒त मध्ये॑ अ॒ह्नाम्।
 उ॒तोदि॑ता म॒घव॒न्त्सूर्य॑स्य व॒यं दे॒वाना॑ सु॒मतौ॑ स्याम॥४॥
 भग॑ ए॒व भग॑वा॒ अस्तु॑ दे॒वास्तेन॑ व॒यं भग॑वन्तः स्याम।
 तं त्वा॑ भग॒ सर्व॑ इ॒ज्जो॑हवीमि॒ स नो॑ भग॒ पुर॑ ए॒ता भ॑वे॒ह॥५॥
 सम॑ध्व॒रायो॑षसो॒ऽनम॑न्त दधि॒क्रावे॑व॒ शुच॑ये प॒दाय॑।
 अ॒र्वाची॑नं व॒सुवि॑दं॒ भग॑ं नो॒ रथ॑मि॒वाश्वा॑वा॒जिन॑ आव॑हन्तु॥६॥
 अ॒श्वाव॑ती॒र्गोम॑तीर्न उ॒षासो॑ वी॒रव॑तीः स॒दमु॑च्छन्तु भ॒द्राः।
 घृ॒तं दु॒हा॑ना वि॒श्वतः॑ प्र॒पी॑ना यू॒यं पा॑त स्व॒स्तिभिः॑ सदा॒ नः॥७॥
 यो मा॑ऽग्ने भा॒गिन॑ सु॒न्तमथा॑भा॒गं चि॑की॒र्षति॑।
 अ॒भा॒गम॑ग्ने तं कुरु॒ माम॑ग्ने भा॒गिनं॑ कुरु॥८॥

॥ पवमानसूक्तम् ॥

(तैत्तिरीयब्राह्मणे अष्टकम् - १ / प्रपाठकः - ४ / अनुवाकः - ८)

(तैत्तिरीयसंहितायां काण्डम् - ५ / प्रपाठकः - ६ / अनुवाकः - १)

ॐ तच्छुं योरावृणीमहे। गा॒तुं य॒ज्ञाय॑। गा॒तुं य॒ज्ञप॑तये।
 दैवी॑ स्व॒स्तिर॑स्तु नः। स्व॒स्तिर्मा॑नु॒षेभ्यः॑। ऊ॒र्ध्वं जि॑गातु
 भेष॒जम्। शं नो॑ अस्तु द्वि॒पदे॑। शं चतु॑ष्पदे॥ ॐ शान्तिः

शान्तिः शान्तिः॥

दधि॒क्राव्णो॑ अ॒कारि॑षम्। जि॒ष्णोर॑श्व॒स्य वा॒जिनः॑।
सुर॒भि॒नो मु॒खा॑करत्। प्र॒ण आयू॑र॒षि तारि॑षत्।

आपो॑ हि ष्ठा म॒यो भुव॑स्ता न ऊ॒र्जे द॑धातन। म॒हेर॑णाय॒ चक्ष॑से। यो वः शि॒वत॑मो र॒सस्त॑स्य॒ भाज॑यते॒ह नः॑। उ॒श॒तीरि॑व॒ मातरः॑। तस्मा॒ अरं॑ ग॒माम॒ वो यस्य॑ क्षया॒य जिन्व॑थ। आपो॑ जनय॑था च नः॥

हिर॑ण्यवर्णाः शुच॑यः पाव॒का यासु॑ जा॒तः क॒श्यपो॑
यास्वि॒न्द्रः। अ॒ग्निं या गर्भं॑ दधि॒रे वि॒रूपा॑स्ता न॒ आपः॑ शङ्
स्यो॒ना भ॑वन्तु॥

यासा॑र॒ राजा॑ वरु॒णो याति॑ मध्ये॒ सत्या॑नृते अ॒वप॑श्य॒ जना॑नाम्। म॒धुश्च॑तुः शुच॑यो याः पाव॒कास्ता॑ न॒ आपः॑ शङ्
स्यो॒ना भ॑वन्तु॥

यासां॑ दे॒वा दि॒वि कृ॑ण्वन्ति॒ भक्षं॑ या अ॒न्तरि॑क्षे बहु॒धा
भ॑वन्ति। याः पृ॒थि॒वीं पय॑सो॒न्दन्ति॑ शु॒क्रास्ता॑ न॒ आपः॑ शङ्
स्यो॒ना भ॑वन्तु॥

शि॒वेन॑ मा॒ चक्षु॑षा पश्यताऽऽपः॑ शि॒वया॑ त॒नुवो॑प॒ स्पृश॑त॒ त्वचं॑ मे। सर्वा॑र॒ अ॒ग्नीर॑प्सुषदो॑ हुवे वो मयि॒ वर्चो॑
बल॒मोजो॑ नि ध॑त्त॥

पव॑मानः सुव॒र्जनः॑। प॒वित्रे॑ण विच॑र॒षणिः॑। यः पो॒ता स

पुनातु मा। पुनन्तु मा देवजनाः। पुनन्तु मनवो धिया।
 पुनन्तु विश्वं आयवः। जातवेदः पवित्रवत्। पवित्रेण पुनाहि
 मा। शुक्रेण देवदीद्यत्। अग्ने क्रत्वा क्रतूँ रनु। यत्ते
 पवित्रमर्चिषि। अग्ने विततमन्तरा। ब्रह्म तेन पुनीमहे।
 उभाभ्यां देवसवितः। पवित्रेण सुवेन च। इदं ब्रह्म पुनीमहे।
 वैश्वदेवी पुनती देव्यागात्। यस्यै ब्रह्मीस्तनुवो वीतपृष्ठाः।
 तया मदन्तः सधमाद्येषु। वयँ स्याम पतयो रयीणाम्।
 वैश्वानरो रश्मिभिर्मा पुनातु। वातः प्राणेनेषिरो मयो भूः।
 द्यावापृथिवी पयसा पयोभिः। ऋतावरी यज्ञिये मा पुनीताम्।
 बृहद्भिः सवितस्तृभिः। वर्षिष्ठैर्देवमन्मभिः। अग्ने दक्षैः पुनाहि
 मा। येन देवा अपुनत। येनाऽऽपो दिव्यं कशः। तेन
 दिव्येन ब्रह्मणा। इदं ब्रह्म पुनीमहे। यः पावमानीरध्येति।
 ऋषिभिः सम्भृतँ रसम्। सर्वँ स पूतमश्जाति। स्वदितं
 मातरिश्वना। पावमानीर्यो अध्येति। ऋषिभिः सम्भृतँ
 रसम्। तस्मै सरस्वती दुहे। क्षीरँ सर्पिर्मधूदकम्॥
 पावमानीः स्वस्त्ययनीः। सुदुघाहि पयस्वतीः। ऋषिभिः
 सम्भृतो रसः। ब्राह्मणेष्वमृतँ हितम्। पावमानीर्दिशन्तु नः।
 इमं लोकमथो अमुम्। कामान्त्समर्धयन्तु नः। देवीर्देवैः
 समाभृताः। पावमानीः स्वस्त्ययनीः। सुदुघाहि घृतश्रुतः।
 ऋषिभिः सम्भृतो रसः। ब्राह्मणेष्वमृतँ हितम्। येन
 देवाः पवित्रेण। आत्मानं पुनते सदा। तेन सहस्रधारेण।

पा॒व॒मा॒न्यः पु॑नन्तु मा। प्रा॒जा॒प॒त्यं प॒वि॒त्रम्। श॒तो॒द्या॒मं
 हि॒र॒ण्म॒यम्। तेन॑ ब्रह्म॒ वि॒दो व॒यम्। पू॒तं ब्रह्म॑ पुनीमहे। इन्द्रः
 सु॒नी॒ती स॒ह मा॑ पुनातु। सोमः॑ स्व॒स्त्या वरु॑णः स॒मी॒च्या।
 य॒मो रा॒जा प्र॑मृणाभिः पुनातु मा। जा॒तवे॑दा मो॒र्जय॑न्त्या
 पुनातु। भूर्भुवः॑ सु॒वः।

ॐ तच्छुं॑ योरावृणीमहे। गा॒तुं य॒ज्ञाय॑। गा॒तुं य॒ज्ञप॑तये।
 दैवी॑ स्व॒स्तिर॑स्तु नः। स्व॒स्तिर्मा॑नुषेभ्यः। ऊ॒र्ध्वं जि॑गातु
 भेष॑जम्। शं नो॑ अस्तु द्वि॒पदै॑। शं चतु॑ष्पदे॥ ॐ शान्तिः
 शान्तिः॑ शान्तिः॑॥

॥ आयुष्यसूक्तम् ॥

यो ब्र॒ह्मा ब्र॒ह्मण॑ उ॒ञ्ज॒हार॒ प्रा॒णैः शि॒रः कृ॒त्तिवा॑साः
 पि॒ना॒की। ई॒शानो॑ देवः स न आयु॑र्दधातु तस्मै जुहोमि
 ह॒विषा॑ घृ॒तेन॑॥ १॥

वि॒भ्राज॑मानः सरि॑रस्य म॒ध्या॒द्रोच॑मा॒नो घ॑र्मरुचि॒र्य
 आ॒गात्। स म॑ृत्युपाशानपनु॑द्य घो॒रा॒नि॒हायु॑षे॒णो घृ॑तम॑त्तु
 देवः॑॥ २॥

ब्रह्म॑ज्योतिर्ब्रह्म॑पत्नी॑षु ग॒र्भं य॑मा॒दधा॑त् पुरु॒रूपं॑ जय॒न्तम्।
 सु॒वर्ण॑र॒म्भग्र॑हम॑र्कम॒र्च्यं त॑मा॒युषे॑ वर्धयामो॑ घृ॒तेन॑॥ ३॥

श्रियं॑ लक्ष्मीमौ॒बला॑म॒म्बिकां॑ गां षष्ठीं च या॑मिन्द्र॒सेनै॑त्युदा॒हुः।
 तां वि॒द्यां ब्रह्म॑योनि॑ स॒रूपा॑मि॒हायु॑षे तर्पयामो॑ घृ॒तेन॑॥ ४॥

दाक्षायण्यः सर्वयोन्यः स योन्यः सहस्रशो विश्वरूपां
विरूपाः। ससूनवः सपतयः सयूथ्या आयुषेणो घृतमिदं
जुषन्ताम्॥५॥

दिव्या गणा बहुरूपाः पुराणा आयुश्छिदो नः प्रमथन्तु
वीरान्। तेभ्यो जुहोमि बहुधा घृतेन मा नः प्रजां रीरिषो
मौत वीरान्॥६॥

एकः पुरस्ताद्य इदं बभूव यतो बभूव भुवनस्य गोपाः।
यमप्येति भुवनं साम्पराये स नो हविर्घृतमिहायुषैत्तु
देवः॥७॥

वसून् रुद्रानादित्यान् मरुतोऽथ साध्यान् ऋभून् यक्षान्
गन्धर्वांश्च पितॄंश्च विश्वान्। भृगून् सर्पांश्चाङ्गिरसोऽथ
सर्वान् घृतं हुत्वा स्वायुष्या महयाम शश्वत्॥८॥

विष्णो त्वं नो अन्तमः शर्म यच्छ सहन्त्या प्रतेधारां
मधुश्चुत उथ्सं दुहते अक्षितम्॥९॥

॥ॐ शान्तिः शान्तिः शान्तिः॥



आयुष्टे विश्वतो दधद्यमग्निर्वरेण्यः। पुनस्ते प्राण आयन्ति
परा यक्ष्मं सुवामि ते। आयुर्दा अग्ने हविषो जुषाणो
घृतप्रतीको घृतयोनिरेधि। घृतं पीत्वा मधु चारु गव्यं पितेवं
पुत्रमभिरक्षतादिमम्।

॥ नवग्रहसूक्तम् ॥

आ स॒त्येन॒ रज॑सा॒ वर्त॑मानो नि॒वेश॑यन्न॒मृतं॑ म॒र्त्यं च॑ ।
 हि॒र॒ण्यये॑न स॒वि॒ता रथे॑नाऽदे॒वो या॑ति॒ भुव॑ना वि॒पश्यन्॑ । अ॒ग्निं
 द॒त्तं वृ॑णीमहे॒ होता॑रं वि॒श्ववे॑दसम् । अ॒स्य य॒ज्ञस्य॑ सु॒क्रतु॑म् ॥
 येषा॒मीशे॑ पशु॒पतिः॑ पशूनां चतु॑ष्पदामु॒त च॑ द्वि॒पदा॑म् ।
 निष्क्री॑तोऽयं य॒ज्ञियं॑ भा॒गमे॑तु रा॒यस्पोषा॑ यज॑मानस्य सन्तु ॥
 अधि॑देवता प्रत्यधि॑देवता स॒हिता॑य आ॒दि॒त्याय॒ नमः॑ ॥ १ ॥

अ॒ग्निर्मूर्धा॑ दि॒वः क॒कुत्प॑तिः पृथि॒व्या अ॒यम् । अ॒पाः
 रेता॑सि जि॒न्वति॑ । स्यो॒ना पृ॑थि॒वि भवा॑ऽनृ॒क्षरा॑ नि॒वेश॑नी ।
 यच्छा॑नः शर्म॑ स॒प्रथाः॑ । क्षेत्र॑स्य॒ पति॑ना व॒यः हि॒ते नै॒व
 जया॑मसि । गा॒मश्च॑ पोषयि॒त्वा स नो॑ मृ॒डाती॒दृशे॑ ॥
 अधि॑देवता प्रत्यधि॑देवता स॒हिता॑य अ॒ङ्गार॑काय॒ नमः॑ ॥ २ ॥

प्र वः॑ शु॒क्राय॑ भा॒नवे॑ भर॒ध्वः ह॒व्यं म॒तिं चा॒ग्नये॑ सु॒पूत॑म् ॥
 यो दै॒व्यानि॑ मा॒नुषा॑ ज॒नूः प्य॑न्तर्वि॒श्वानि॑ वि॒द्मना॑ जिगा॑ति ॥
 इन्द्रा॑णीमा॒सु ना॑रि॒षु सु॑प॒त्नीम॑हम॒श्रव॑म् । न ह्य॑स्या अप॒रं च॑न
 ज॒रसा॑ मर॑ते॒ पतिः॑ ॥ इन्द्र॑ वो वि॒श्वत॑स्प॒रि हवा॑महे॒ जने॑भ्यः ।
 अ॒स्माक॑मस्तु॒ केवलः॑ ॥
 अधि॑देवता प्रत्यधि॑देवता स॒हिता॑य शु॒क्राय॒ नमः॑ ॥ ३ ॥

आप्या॑यस्व॒ समे॑तु ते वि॒श्वतः॑ सोम॒ वृष्णि॑यम् । भवा॒
 वाज॑स्य सङ्ग॒थे ॥ अ॒प्सु मे॒ सोमो॑ अब्रवीद॒न्तर्वि॒श्वानि॑ भेष॒जा ।

अ॒ग्निं च॑ वि॒श्वश॑म्भुव॒माप॑श्च वि॒श्वभै॑षजीः। गौरी मि॒माय॑
सलि॒लानि॑ तक्ष॑ती। एक॑पदी द्वि॒पदी॑ सा चतु॑ष्पदी। अ॒ष्टाप॑दी
नव॑पदी बभू॒वुषी॑। स॒हस्रा॑क्षरा पर॒मे व्यो॑मन्।

अधिदेवता प्रत्यधिदेवता सहिताय सोमाय नमः॥४॥

उद्धु॑ध्यस्वाग्ने॒ प्रति॑जागृह्येनमिष्टापूर्ते स॒सृजे॑थामयं च।
पुनः॑ कृ॒ण्व॑स्त्वा पि॒तरं॑ युवा॒नम॒न्वाता॑सी॒त्वयि॑ तन्तु॑मे॒तम्॥
इ॒दं वि॑ष्णुर्विच॑क्रमे त्रेधा नि॒दधे॑ प॒दम्। समू॑ढमस्यपा॒सु सुरे॑॥
वि॒ष्णो र॒राट॑मसि वि॒ष्णोः पृ॒ष्ठम॑सि वि॒ष्णोः श्र॒त्रे॒स्थो वि॒ष्णोः
स्यूर॑सि वि॒ष्णोर्ध्रु॑वम॑सि वै॒ष्णव॑म॑सि वि॒ष्णावे॑ त्वा।

अधिदेवता प्रत्यधिदेवता सहिताय बुधाय नमः॥५॥

बृह॑स्पते॒ अति॑य॒दर्यो॑ अर्हा॑द्विमद्विभाति॒ क्रतु॑म॒ञ्जने॑षु।
यद्दी॑दय॒च्छव॑सर्तप्रजात॒ तद॒स्मासु॑ द्रवि॑णं धेहि चि॒त्रम्॥
इन्द्र॑मरु॒त्व इ॒ह पा॑हि॒ सोमं॑ यथा॒ शार्या॑ते अपि॑बः सु॒तस्य॑।
तव॑ प्रणी॑ती॒ तव॑ शूर॒शर्म॑न्नावि॒वासन्ति॑ क॒वयः॑ सुय॒ज्ञाः॥
ब्रह्म॑ज॒ज्ञानं॑ प्रथ॒मं पु॒रस्ता॑द्वि॒सीम॑तः सु॒रुचो॑ वे॒न आ॑वः।
सबु॑ध्रिया॑ उप॒मा अस्य॑ वि॒ष्ठाः स॒तश्च॒ योनि॑मस॑तश्च॒ विवः॑॥
अधिदेवता प्रत्यधिदेवता सहिताय बृहस्पतये नमः॥६॥

शं नो॑ दे॒वीर॒भिष्ट॑य॒ आपो॑ भवन्तु पी॒तये॑। शंयो॒रभिस्र॑वन्तु
नः॥ प्रजा॑पते॒ न त्वदे॒तान्य॒न्यो वि॒श्वा जा॒तानि॑ परि॒ता
ब॑भूव। यत्का॑मास्ते जुहु॒मस्तन्नो॑ अस्तु व॒यस्स्याम॑ प॒तयो॑
रयी॒णाम्। इ॒मं य॑मप्रस्तरमाहि सी॒दाऽङ्गि॑रोभिः पि॒तृभिः॑

संविदानः। आत्वा मन्त्राः कविशस्ता वहन्त्वेना राजन्
हविषा मादयस्व॥

अधिदेवता प्रत्यधिदेवता सहिताय शनैश्चराय नमः॥७॥

कया नश्चित्र आभुवदूती सदावृधः सखा। कया
शचिष्ठया वृता। आऽयङ्गौः पृश्निरक्रमीदसनन्मातरं पुनः।
पितरं च प्रयन्त्सुवः। यत्ते देवी निर्ऋतिराबन्धु दाम
ग्रीवास्वविचर्त्यम्। इदं ते तद्विष्याम्यायुषो न मध्यादथाजीवः
पितुमर्द्धि प्रमुक्तः॥

अधिदेवता प्रत्यधिदेवता सहिताय राहवे नमः॥८॥

केतुं कृण्वन्नकेतवे पेशो मर्या अपेशसै। समुषद्विरजायथाः॥
ब्रह्मा देवानां पदवीः कवीनामृषिर्विप्राणां महिषो मृगाणाम्।
श्येनो गृध्राणां स्वधितिर्वनानां सोमः पवित्रमत्येति रेभन्।
(ऋक्) सचित्रं चित्रं चितयन् तमस्मे चित्रक्षत्रं चित्रतमं
वयोधाम्। चन्द्रं रयिं पुरुवीरं बृहन्तं चन्द्रचन्द्राभिर्गृणते
युवस्व॥

अधिदेवता प्रत्यधिदेवता सहिताय केतवे नमः॥९॥

॥ॐ आदित्यादि नवग्रहदेवताभ्यो नमो नमः॥

॥ॐ शान्तिः शान्तिः शान्तिः॥

॥ नक्षत्रसूक्तम् ॥

(तैत्तिरीय ब्राह्मणे अष्टकम् - ३/प्रश्नः - १)

अ॒ग्निर्नः॑ पातु॑ कृ॒त्तिकाः॑। नक्ष॑त्रं दे॒वमिन्द्रि॑यम्। इ॒दमा॑सां
विचक्ष॑णम्। ह॒विरा॒सं जु॑होतन। यस्य॑ भा॒न्ति र॒श्मयो॑ यस्य॑
के॒तवः॑। यस्ये॒मा वि॒श्वा भुव॑नानि॒ सर्वा॑। स कृ॒त्तिकाभि॑-
र॒भिसं॑वसानः। अ॒ग्निर्नो॑ दे॒वः सु॑वि॒ते द॑धातु॥१॥

प्र॒जाप॑ते रोहि॒णी वे॑तु॒ पत्नी॑। वि॒श्वरू॑पा बृ॒हती चि॒त्रभा॑नुः।
सा नो॑ य॒ज्ञस्य॑ सु॒वि॒ते द॑धातु। यथा॑ जी॒वेम॑ श॒रदः॑ सर्वा॑राः।
रोहि॒णी दे॒व्युद॑गात्पु॒रस्ता॑त्। वि॒श्वा रू॒पाणि॑ प्रति॒मोद॑माना।
प्र॒जाप॑ति॒र॒ ह॒विषा॑ वर्ध॒यन्ती॑। प्रि॒या दे॒वाना॑मुप॒यातु॑
य॒ज्ञम्॥२॥

सोमो॑ रा॒जा मृ॑गशी॒रुषे॑ण॒ आग॑न्। शि॒वं नक्ष॑त्रं प्रि॒यम॑स्य॒
धा॒म। आ॒प्याय॑मानो बहु॒धा जने॑षु। रे॒तः प्र॒जां यज॑माने
दधातु। यत्ते॑ नक्ष॑त्रं मृ॑गशी॒रुषम॑स्ति। प्रि॒य॒राज॑न् प्रि॒यत॑मं
प्रि॒याणा॑म्। तस्मै॑ ते सोम॑ ह॒विषा॑ वि॒धेम। शं न॑ ए॒धि द्वि॒पदे॑
शं चतु॑ष्पदे॥३॥

आ॒र्द्रया॑ रु॒द्रः प्रथ॑मा न ए॒ति। श्रेष्ठो॑ दे॒वानां॑ पति॒रघ्नियाना॑म्।
नक्ष॑त्रमस्य ह॒विषा॑ वि॒धेम। मा नः॑ प्र॒जा॒रि॒षन्मो॑त
वी॒रान्। हे॒ती रु॒द्रस्य॑ परि॒णो वृ॑णक्तु। आ॒र्द्रा नक्ष॑त्रं
जुष॑ता॒र॒ ह॒विर्नः॑। प्र॒मुश्च॑मानौ दुरि॒तानि॑ वि॒श्वा। अ॒पाघ॑श॒र॑

सन्नुदतामरातिम्॥४॥

पुन॑र्नो दे॒व्यदि॑तिः स्पृ॒णोतु। पुन॑र्वसू नः पुन॑रेतां य॒ज्ञम्।
पुन॑र्नो दे॒वा अ॒भिय॑न्तु सर्वे। पुनः पुन॑र्वो ह॒विषा॑ यजामः। ए॒वा
न दे॒व्यदि॑तिरन॒र्वा। वि॒श्वस्य॑ भ॒र्त्री जग॑तः प्रति॒ष्ठा। पुन॑र्वसू
ह॒विषा॑ व॒र्धय॑न्ती। प्रि॒यं दे॒वाना॑मप्येतु पाथः॥५॥

बृह॒स्पतिः॑ प्रथ॒मं जा॑यमानः। ति॒ष्यं नक्ष॑त्रम॒भि सम्ब॑भूव।
श्रेष्ठो॑ दे॒वानां॑ पृ॒तना॑सु जि॒ष्णुः। दि॒शोऽनु॑ सर्वा॑ अभ॑यं नो
अस्तु। ति॒ष्यः पु॒रस्ता॑दु॒त म॑ध्य॒तो नः॑। बृह॒स्पति॑र्नः परि॑ पातु
प॒श्चात्। बा॒धेतां॑ द्वेषो॑ अभ॑यं कृ॒णुता॑म्। सु॒वीर्य॑स्य॒ पत॑यः
स्याम॥६॥

इ॒दं स॒र्पेभ्यो॑ ह॒विर॑स्तु जुष्टम्। आ॒श्रेषा॑ येषा॑मनु॒यन्ति॒
चेतः॑। ये अ॒न्तरि॑क्षं पृथि॒वीं क्षि॑यन्ति। ते नः स॒र्पासो॑
हव॒माग॑मिष्ठाः। ये रो॑च॒ने सूर्य॑स्यापि॒ सर्पाः॑। ये दि॒वं दे॒वीमनु॑
स॒ञ्चर॑न्ति। येषा॑माश्रे॒षा अनु॑यन्ति॒ काम॑म्। तेभ्यः स॒र्पेभ्यो॑
मधु॑मञ्जुहोमि॥७॥

उप॑हृताः पि॒तरो॑ ये म॒घासु॑। मनो॑जवसः सु॒कृतः॑ सु॒कृत्याः॑।
ते नो॑ नक्ष॑त्रे हव॒माग॑मिष्ठाः। स्व॒धाभि॑र्य॒ज्ञं प्र॑यतं जुषन्ताम्।
ये अ॒ग्निद॑ग्धा येऽन॒ग्निद॑ग्धाः। येऽमुं॑ लो॒कं पि॑तरः क्षि॒यन्ति॑।
या॒श्च वि॒द्म या॑ उ॒ च न॑ प्रवि॒द्म। म॒घासु॑ य॒ज्ञं सु॒कृतं॑
जुषन्ताम्॥८॥

गवां पतिः फल्गुनीनामसि त्वम्। तदर्यमन्वरुणमित्र
चारु। तं त्वा वयः सनितारः सनीनाम्। जीवा जीवन्तमुप
संविशेम। येनेमा विश्वा भुवनानि सञ्जिता। यस्य देवा
अनु सं यन्ति चेतः। अर्यमा राजाऽजरस्तुविष्मान्।
फल्गुनीनामृषभो रौरवीति॥९॥

श्रेष्ठो देवानां भगवो भगासि। तत्त्वा विदुः फल्गुनीस्तस्य
वित्तात्। अस्मभ्यं क्षत्रमजरः सुवीर्यम्। गोमदश्ववदुप
सन्नुदेह। भगो ह दाता भग इत्प्रदाता। भगो देवीः
फल्गुनीरा विवेश। भगस्येत्तं प्रसवं गमेम। यत्र देवैः
संधमादं मदेम॥१०॥

आयातु देवः संवितोपयातु। हिरण्ययेन सुवृता रथेन।
वहन् हस्तः सुभगं विद्वानापसम्। प्रयच्छन्तं पपुंरिं
पुण्यमच्छ। हस्तः प्रयच्छत्वमृतं वसीयः। दक्षिणेन
प्रतिगृणीम एनत्। दातारमद्य संविता विदेय। यो नो
हस्ताय प्रसुवाति यज्ञम्॥११॥

त्वष्टा नक्षत्रमभ्येति चित्राम्। सुभः संसं युवतिः
रोचमानाम्। निवेशयन्नमृतान्मर्त्यांश्च। रूपाणि पिशन्
भुवनानि विश्वा। तन्नस्त्वष्टा तदु चित्रा विचष्टाम्। तन्नक्षत्रं
भूरिदा अस्तु मह्यम्। तन्नः प्रजां वीरवतीः सनोतु। गोभिर्नो
अश्वैः समनक्तु यज्ञम्॥१२॥

वा॒युर्नक्ष॑त्रम॒भ्येति॑ नि॒ष्ठ्याम्। ति॒ग्मशृ॑ङ्गो वृष॒भो रो॑रु॒वाणः।
 स॒मीर॑यन् भुव॑ना मा॒तरि॑श्व॒ः। अप॒ द्वेषा॑सि नुदता॒मरा॑तीः।
 तन्नो॑ वा॒युस्तदु॑ नि॒ष्ठ्यां शृ॑णोतु। तन्नक्ष॑त्रं भूरि॒दा अ॑स्तु म॒ह्यम्।
 तन्नो॑ दे॒वासो॒ अनु॑जानन्तु कामम्। यथा॒ तरे॑म दुरि॒तानि॑
 विश्वा॑॥१३॥

दूर॑म॒स्मच्छ॑त्र॒वो यन्तु॑ भी॒ताः। तदिन्द्रा॒ग्नी कृ॑णुतां
 तद्विशा॑खे। तन्नो॑ दे॒वा अनु॑मदन्तु य॒ज्ञम्। प॒श्चात्
 पुर॑स्तादभयं नो अस्तु। नक्ष॑त्राणा॒मधि॑प॒त्नी वि॒शाखे॑।
 श्रेष्ठा॑विन्द्रा॒ग्नी भुव॑नस्य गो॒पौ। विषू॑चः शत्रू॒नप॒ बाध॑मानौ।
 अप॒ क्षुधं॑ नुदता॒मरा॑तिम्॥१४॥

पूर्णा॑ प॒श्चादु॑त पूर्णा॑ पुरस्ता॑त्। उन्म॑ध्यतः पौ॒र्णमा॒सी
 जि॑गाय। तस्या॑ दे॒वा अधि॑ संवस॑न्तः। उ॒त्तमे॑ नाकं
 इ॒ह मा॑दयन्ताम्। पृ॒थ्वी सु॒वर्चा॑ युव॒तिः स॒जोषा॑ः।
 पौ॒र्णमा॒स्युद॑गाच्छोभ॑माना। आ॒प्याय॑यन्ती दुरि॒तानि॑ विश्वा॑।
 उ॒रुं दुहा॑ं यज॑मानाय य॒ज्ञम्॥१५॥

ऋ॒द्ध्यास्मि॑ ह॒व्यैर्नम॑सोप॒सद्य॑। मि॒त्रं दे॒वं मि॒त्रधे॑यं नो अस्तु।
 अ॒नूरा॒धान् ह॒विषा॑ व॒र्धय॑न्तः। श॒तं जी॑वेम श॒रदः॑ स॒वीराः॑।
 चि॒त्रं नक्ष॑त्रमुद॑गात्पुरस्ता॑त्। अ॒नूरा॒धास॑ इति॒ यद्वद॑न्ति।
 तन्मि॒त्र ए॑ति प॒थिभि॑र्दे॒वयानैः॑। हि॒र॒ण्ययै॑र्वि॒ततै॑र॒न्तरि॑क्षे॥१६॥

इन्द्रो॑ ज्ये॒ष्ठामनु॑ नक्ष॑त्रमेति। यस्मि॑न्वृ॒त्रं वृ॑त्र॒तूर्ये॑ त॒तारा॑।

तस्मिन्वयममृतं दुहानाः। क्षुधं तरेम दुर्गितिं दुर्गिष्टिम्।
 पुरन्दराय वृषभाय धृष्णवे। अषाढाय सहमानाय मीढुषे।
 इन्द्राय ज्येष्ठा मधुमदुहाना। उरुं कृणोतु यजमानाय
 लोकम्॥१७॥

मूलं प्रजां वीरवतीं विदेय। पराच्येतु निर्ऋतिः पराचा।
 गोभिर्नक्षत्रं पशुभिः समक्तम्। अहर्भूयाद्यजमानाय मह्यम्।
 अहर्नो अद्य सुविते दधातु। मूलं नक्षत्रमिति यद्वदन्ति। पराचीं
 वाचा निर्ऋतिं नुदामि। शिवं प्रजायै शिवमस्तु मह्यम्॥१८॥

या दिव्या आपः पर्यसा सम्बभूवुः। या अन्तरिक्ष उत
 पार्थिवीर्याः। यासामषाढा अनुयन्ति कामम्। ता न आपः
 शः स्योना भवन्तु। याश्च कूप्या याश्च नाद्याः समुद्रियाः।
 याश्च वैशन्तीरुत प्रासचीर्याः। यासामषाढा मधुं भक्षयन्ति।
 ता न आपः शः स्योना भवन्तु॥१९॥

तन्नो विश्वे उपं शृण्वन्तु देवाः। तदषाढा अभिसंयन्तु
 यज्ञम्। तन्नक्षत्रं प्रथतां पशुभ्यः। कृषिर्वृष्टिर्यजमानाय
 कल्पताम्। शुभ्राः कन्या युवतयः सुपेशसः। कर्मकृतः
 सुकृतो वीर्यावतीः। विश्वान् देवान् हविषां वर्धयन्तीः।
 अषाढाः काममुप यान्तु यज्ञम्॥२०॥

यस्मिन् ब्रह्माऽभ्यजयत्सर्वमेतत्। अमुं च लोकमिदम्
 च सर्वम्। तन्नो नक्षत्रमभिजिद्विजित्य। श्रियं दधात्वहणीय-

मानम्। उ॒भौ लो॒कौ ब्र॒ह्म॒णा सञ्जि॑ते॒मौ। तन्नो॑
नक्ष॑त्रमभि॒जिद्विच॑ष्टाम्। तस्मि॑न्व॒यं पृ॒त॒नाः सञ्ज॑येम।
तन्नो॑ दे॒वासो॒ अनु॑जानन्तु कामम्॥२१॥

शृ॒ण्वन्ति॑ श्रो॒णाम॒मृत॑स्य गो॒पाम्। पु॒ण्या॑म॒स्या उप॑शृ॒णोमि॑
वाचम्। म॒हीं दे॒वीं वि॒ष्णुप॒त्नीम॑जू॒र्याम्। प्र॒ती॒ची॒मेना॑
ह॒विषा॑ यजामः। त्रे॒धा वि॒ष्णुरु॒रुगा॒यो विच॑क्रमे। म॒हीं दि॒वं
पृ॒थि॒वीम॒न्तरि॑क्षम्। तच्छ्रो॑णैति॒ श्रवं॑ इ॒च्छ॒मा॒ना। पु॒ण्य॑
श्लो॒कं यज॑मानाय कृ॒ण्वती॑॥२२॥

अ॒ष्टौ दे॒वा वस॑वः सो॒म्यासः॑। चत॑स्रो दे॒वीर॒जराः॑ श्रवि॑ष्ठाः।
ते य॒ज्ञं पा॑न्तु रज॑सः प॒रस्ता॑त्। सं॒व॒त्स॒री॒णम॑मृतं॒ स्व॒स्ति।
य॒ज्ञं नः॑ पा॒न्तु वस॑वः प॒रस्ता॑त्। द॒क्षि॒ण॒तोऽभि॑यन्तु
श्रवि॑ष्ठाः। पु॒ण्यं नक्ष॑त्रम॒भि संवि॑शाम। मा नो॒
अरा॑तिर॒घश॑सा॒ऽगन्॑॥२३॥

क्ष॒त्रस्य॑ रा॒जा वरु॑णोऽधि॒राजः॑। नक्ष॑त्राणां॒ शत॑भि॒षग्व॑सि॒ष्ठः।
तौ दे॒वेभ्यः॑ कृ॒णुतो॑ दी॒र्घमा॑युः। श॒तं स॒हस्रा॑ भे॒षजा॑नि
धत्तः। य॒ज्ञं नो॒ राजा॒ वरु॑ण॒ उप॑यातु। तन्नो॑ वि॒श्वे अ॒भि
संय॑न्तु दे॒वाः। तन्नो॑ नक्ष॑त्रं॒ शत॑भि॒षग्जुषा॑णम्। दी॒र्घमा॑युः
प्रति॑र॒द्धे॒षजा॑नि॥२४॥

अ॒ज ए॒कपा॒दुद॑गात्प॒रस्ता॑त्। वि॒श्वा भू॒तानि॑ प्रति॒
मोद॑मानः। तस्य॑ दे॒वाः प्र॑स॒वं य॑न्ति॒ सर्वे॑। प्रो॒ष्ठप॒दासो॑
अ॒मृत॑स्य गो॒पाः। वि॒भ्राज॑मानः॒ समि॑धान॒ उग्रः॑।

आऽन्तरिक्षमरुहदगुन्द्याम्। त९ सूर्यं देवमजमेकपादम्।
प्रोष्ठपदासो अनुयन्ति सर्वे॥२५॥

अहिर्बुध्नियः प्रथमान एति। श्रेष्ठो देवानामुत मानुषाणाम्।
तं ब्राह्मणाः सोमपाः सोम्यासः। प्रोष्ठपदासो अभि रक्षन्ति
सर्वे। चत्वार एकमभि कर्म देवाः। प्रोष्ठपदास इति यान्
वदन्ति। ते बुध्नियं परिषद्यं स्तुवन्तः। अहि९ रक्षन्ति
नमसोपसद्यं॥२६॥

पूषा रेवत्यन्वेति पन्थाम्। पुष्टिपती पशुपा वाजबस्त्यौ।
इमानि हव्या प्रयता जुषाणा। सुगैर्नो यानैरुपयातां यज्ञम्।
क्षुद्रान् पशून् रक्षतु रेवती नः। गावो नो अश्वा९ अन्वेतु पूषा।
अन्न९ रक्षन्तौ बहुधा विरूपम्। वाज९ सनुतां यजमानाय
यज्ञम्॥२७॥

तदश्विनावश्वयुजोपयाताम्। शुभङ्गमिष्ठौ सुयमेभिरश्वैः।
स्वं नक्षत्र९ हविषा यजन्तौ। मध्वा सम्पृक्तौ यजुषा
समन्तौ। यौ देवानां भिषजौ हव्यवाहौ। विश्वस्य
दूतावमृतस्य गोपौ। तौ नक्षत्रं जुजुषाणोपयाताम्।
नमोऽश्विभ्यां कृणुमोऽश्वयुग्भ्याम्॥२८॥

अपं पाप्मानं भरणीर्भरन्तु। तद्यमो राजा भगवान्
विचष्टाम्। लोकस्य राजा महतो महान् हि। सुगं
नः पन्थामभयं कृणोतु। यस्मिन्नक्षत्रे यम एति राजा।

यस्मिन्नेनमभ्यर्षिश्चन्त देवाः। तदस्य चित्रं हविषा यजाम।
अप पाप्मानं भरणीर्भरन्तु॥२९॥

निवेशनी सङ्गमनी वसूनां विश्वा रूपाणि वसून्यावेशयन्ती।
सहस्रपोषं सुभगा रराणा सा न आगन्वर्चसा संविदाना॥
यत्ते देवा अदधुर्भागधेयममावास्ये संवसन्तो महित्वा। सा
नो यज्ञं पिपृहि विश्ववारे रयिं नो धेहि सुभगे सुवीरम्॥३०॥
ॐ शान्तिः शान्तिः शान्तिः॥



॥ गणपत्यथर्वशीर्षोपनिषत् ॥

ॐ भद्रं कर्णेभिः शृणुयाम देवाः। भद्रं पश्येमाक्षभिर्यजत्राः।
स्थिरैरङ्गैस्तुष्टुवाग्ँसस्तनूभिः। व्यशेम देवहितं यदायुः।
स्वस्ति न इन्द्रो वृद्धश्रवाः। स्वस्ति नः पूषा विश्ववेदाः।
स्वस्ति नस्तार्क्ष्यो अरिष्टनेमिः। स्वस्ति नो बृहस्पतिर्दधातु॥
ॐ शान्तिः शान्तिः शान्तिः॥

ॐ नमस्ते गणपतये। त्वमेव प्रत्यक्षं तत्त्वमसि। त्वमेव
केवलं कर्ताऽसि। त्वमेव केवलं धर्ताऽसि। त्वमेव केवलं
हर्ताऽसि। त्वमेव सर्वं खल्विदं ब्रह्मासि। त्वं साक्षादात्माऽसि
नित्यम्॥१॥

ऋ॒तं व॒चि॒म् । स॒त्यं व॒चि॒म् ॥ २ ॥

अ॒व॒ त्वं॒ मा॒म् । अ॒व॒ व॒क्ता॒रम् । अ॒व॒ श्रो॒ता॒रम् । अ॒व॒ दा॒ता॒रम् । अ॒व॒ धा॒ता॒रम् । अ॒वा॒नू॒चा॒न॒म॒व॒ शि॒ष्य॒म् । अ॒व॒ प॒श्चा॒त्ता॒त् । अ॒व॒ पु॒र॒स्ता॒त् । अ॒वो॒त्त॒रा॒त्ता॒त् । अ॒व॒ दक्षि॒णा॒त्ता॒त् । अ॒व॒ चो॒र्ध्वा॒त्ता॒त् । अ॒वा॒ध॒रा॒त्ता॒त् । स॒र्व॒तो मां पा॒हि पा॒हि॑ स॒म॒न्ता॒त् ॥ ३ ॥

त्वं वाङ्म॒यस्त्वं चिन्म॒यः । त्वमा॒न॒न्द॒म॒यस्त्वं ब्र॒ह्म॒म॒यः । त्वं स॒च्चि॒दा॒न॒न्दा॒द्वि॒ती॒यो॒ऽसि॒ । त्वं प्र॒त्यक्षं॒ ब्र॒ह्मा॒सि॒ । त्वं ज्ञा॒न॒म॒यो वि॒ज्ञा॒न॒म॒यो॒ऽसि॒ ॥ ४ ॥

स॒र्वं जग॑दिदं त्वत्त्वो॑ जा॒य॒ते । स॒र्वं जग॑दिदं त्वत्त्व॑स्तिष्ठ॒ति । स॒र्वं जग॑दिदं त्वयि॑ ल॒य॒मे॒ष्य॒ति । स॒र्वं जग॑दिदं त्वयि॑ प्र॒त्ये॒ति । त्वं भू॒मि॒रा॒पो॒ऽन॒लो॒ऽनि॒लो न॒भः । त्वं च॒त्वा॒रि वा॒क्प॒रि॒मि॒ता प॒दा॒नि ॥ ५ ॥

त्वं गु॒णत्र॑याती॒तः । त्वम् अ॒व॒स्थात्र॑याती॒तः । त्वं दे॒हत्र॑याती॒तः । त्वं का॒लत्र॑याती॒तः । त्वं मू॒ला॒धा॒र॒स्थि॒तो॒ऽसि॒ नि॒त्यम् । त्वं श॒क्ति॒त्र॑यात्मु॒कः । त्वां यो॒गि॒नो ध्या॒य॒न्ति नि॒त्यम् । त्वं ब्र॒ह्मा त्वं वि॒ष्णुस्त्वं रु॒द्रस्त्व॑मिन्द्रस्त्व॑मग्निस्त्वं वा॒युस्त्वं सू॒र्यस्त्वं च॒न्द्र॒मास्त्वं ब्र॒ह्म भूर्भुवः॑ सु॒व॒रोम् ॥ ६ ॥

गु॒णादीं॑ पू॒र्वमु॒च्चा॒र्य॒ वर्णादीं॑ तद॒न॒न्तर॑म् । अ॒नु॒स्वा॒रः प॑र॒तरः॑ । अ॒र्धे॒न्दु॒ल॒सि॒तम् । ता॒रेण॑ ऋ॒द्धम् । ए॒तत्त॒व

मनु॑स्वरूपम्। गकारः पू॑र्वरूपम्। अकारो म॒ध्यम॑रूपम्।
 अनु॑स्वारश्चा॒न्त्यरूप॑म्। बिन्दु॑रुत्तररूपम्। नादः स॒न्धान॑म्।
 स॒हिता स॒न्धिः। सैषा गणेश॑विद्या। गण॑क ऋषिः।
 निचृ॑द्गाय॑त्रीच्छ॒न्दः। श्रीमहागणपति॑र्दे॒वता। ॐ गं गणपतये॒
 नमः॑॥७॥

ए॒कद॒न्ताय॑ वि॒द्महे॑ व॒क्रतु॑ण्डाय॑ धीमहि।
 तन्नो॑ दन्ती प्रचो॒दया॑त्॥८॥

ए॒कद॒न्तं च॑तुर्ह॒स्तं पा॒शम॑ङ्कुश॒धारि॑णम्।
 रदं॑ च॒ वर॑दं ह॒स्तैर्वि॒भ्राणं॑ मूष॒कध्व॑जम्॥
 रक्तं॑ ल॒म्बोद॑रं शूर्प॒कर्ण॑कं र॒क्तवा॑ससम्।
 रक्त॑ग॒न्धानु॑लिप्ताङ्गं र॒क्तपु॑ष्पैः सुपू॒जित॑म्॥

भक्ता॑नु॒कम्पि॑नं दे॒वं ज॒गत्का॑रण॒मच्यु॑तम्।
 आ॒विर्भू॑तं च॑ सृष्ट्या॒दौ प्र॒कृतेः पु॑रुषा॒त्पर॑म्।
 ए॒वं ध्या॒यति॑ यो नित्यं स॒ योगी॑ यो॒गिनां॑ वरः॥९॥

नमो॑ ब्रा॒तप॑तये नमो॑ गणपतये नमः॑ प्रमथपतये नमस्ते
 अस्तु॑ ल॒म्बोद॑रायैकदन्ताय विघ्नविनाशिने शिवसु॒ताय
 श्रीवर॑दमूर्तये॑ नमो॑ नमः॥१०॥

एत॑दथर्वशीर्षं योऽधी॒ते। स ब्र॒ह्मभू॑याय॑ कल्प॒ते। स
 सर्व॑विघ्नैर्न बाध्य॒ते। स सर्व॑तः सुख॑मेध॒ते। स पञ्च॑महापापात्
 प्र॑मुच्य॒ते। साय॑मधी॒यानो दि॒वस॑कृतं पापं॑ नाश॒यति॑।

प्रातरधीयानो रात्रिकृतं पापं नाशयति। सायं प्रातः
प्रयुञ्जानो अपापो भवति। सर्वत्राधीयानोऽपविघ्नो भवति।
धर्मार्थकाममोक्षं च विन्दति। इदमथर्वशीर्षमशिष्याय न
देयम्। यो यदि मोहाद्दास्यति स पापीयान् भवति।
सहस्रावर्तनाद्यं यं काममधीते तं तमनेन साधयेत्॥११॥

अनेन गणपतिमभिषिञ्चति स वाग्मी भवति।
चतुर्थ्यामनश्नन् जपति स विद्यावान् भवति। इत्यथर्वणवाक्यम्।
ब्रह्माद्यावरणं विद्यान् बिभेति कदाचनेति॥१२॥

यो दूर्वाङ्कुरैर्यजति स वैश्रवणोपमो भवति। यो
लाजैर्यजति स यशवान् भवति स मेधावान् भवति।
यो मोदकसहस्रेण यजति स वाञ्छितफलमवाप्नोति। यः
साज्यसमिद्धिर्यजति स सर्वं लभते स सर्वं लभते॥१३॥

अष्टौ ब्राह्मणान् सम्यग्ग्राहयित्वा। सूर्यवर्चस्वी भवति।
सूर्यग्रहे महानद्यां प्रतिमासन्निधौ वा जप्त्वा सिद्धमन्त्रो भवति।
महाविघ्नात् प्रमुच्यते। महादोषात् प्रमुच्यते। महापापात्
प्रमुच्यते। महाप्रत्यवायात् प्रमुच्यते। स सर्वविद्भवति स
सर्वविद्भवति। य एवं वेद। इत्युपनिषत्॥१४॥

सह नाववतु। सह नौ भुनक्तु। सह वीर्यं करवावहे।
तेजस्विनाऽवधीतमस्तु मा विद्विषावहे॥

ॐ शान्तिः शान्तिः शान्तिः॥

॥ मृत्युञ्जयहोम-मन्त्राः ॥

अपै॑तु मृ॒त्युर॒मृतं॑ न॒ आग॑न्वैवस्व॒तो नो॒ अभ॑यं कृणोतु। पु॒र्ण
व॒न॒स्पते॑रिवा॒भि॒नः शी॑यता॒ र॒यिः सच॑तां नः श॒ची॒पतिः॑ ॥ १ ॥

परं॑ मृत्यो॒ अनु॒ परे॑हि प॒न्थां यस्ते॒ स्व इत॑रो देव॒याना॑त्।
चक्षु॑ष्मते शृ॒ण्वते॒ ते ब्र॑वीमि॒ मा नः॑ प्र॒जा री॑रिषो॒ मोत॑
वी॒रान् ॥ २ ॥

वातं॑ प्रा॒णं म॒नसा॒ऽन्वा र॑भामहे प्र॒जाप॑तिं॒ यो भुव॑नस्य
गो॒पाः। स नो॑ मृत्योस्त्राय॑तां पा॒त्व ह॑सो॒ ज्यो॒ग्जी॒वा
ज॒राम॑शीमहि ॥ ३ ॥

अ॒मुत्र॒ भूया॑दध॒ यद्य॑मस्य॒ बृह॑स्पते अ॒भि॒शस्ते॑रमु॒ञ्चः।
प्र॒त्यौ॒हता॑म॒श्विना॑ मृत्युम॑स्माद्दे॒वाना॑म॒ग्ने भि॑षजा॒ शची॑भिः ॥ ४ ॥

हरि॑ र॒ हर॑न्तमनु॒यन्ति॑ दे॒वा वि॒श्वस्ये॑शा॒नं वृष॑भं म॒तीना॑म्।
ब्र॒ह्म स॒रूप॑मनु॒मे॒दमा॑गा॒दय॑नं॒ मा वि॒व॒धी॒र्वि॒क्रम॑स्व ॥ ५ ॥

श॒ल्कैर॑ग्निमि॒न्धान॑ उ॒भौ लो॒कौ स॑नेम॒हम्। उ॒भयो॑र्लो॒कयोर्-
ऋ॒ध्वाऽति॑ मृत्युं त॑राम्य॒हम् ॥ ६ ॥

मा छि॑दो मृत्यो॒ मा व॑धी॒र्मा मे॒ बलं॑ वि॒वृ॒हो मा प्र॑मो॒षीः।
प्र॒जां मा मे॑ रीरिष॒ आयु॑रु॒ग्र नृ॒चक्ष॑सं त्वा ह॒विषा॑ वि॒धेम ॥ ७ ॥

मा नो॑ म॒हान्त॑मु॒त मा नो॑ अ॒र्भकं॑ मा न॒ उक्ष॑न्तमु॒त मा न॑
उक्षि॑तम्। मा नो॑ व॒धीः पि॒तरं॑ मो॒त मा॒तरं॑ प्रि॒या मा न॑स्त॒नुवो॑
रु॒द्र री॑रिषः ॥ ८ ॥

मा न॑स्तो॒के त॑नये॒ मा न॒ आयु॑षि॒ मा नो॒ गोषु॑ मा नो॒

अश्वेषु रीरिषः। वीरान्मा नो रुद्र भामितो वधीर्हविष्मन्तो
नमसा विधेम ते॥९॥

प्रजापते न त्वदेतान्यन्यो विश्वा जातानि परिता
बभूव। यत्कामास्ते जुहुमस्तन्नो अस्तु वयं स्याम पतयो
रयीणाम्॥१०॥

यत इन्द्र भयामहे ततो नो अभयं कृधि। मघवन्छुग्धि
तव तन्न ऊतये विद्विषो विमृधो जहि॥११॥

स्वस्तिदा विशस्पतिर्वृत्रहा विमृधो वशी। वृषेन्द्रः पुर एतु
नः स्वस्तिदा अभयङ्करः॥१२॥

त्र्यम्बकं यजामहे सुगन्धिं पुष्टिवर्धनम्। उर्वारुकमिव
बन्धनान्मृत्योर्मुक्षीय माऽमृतात्॥१३॥

अपमृत्युमपक्षुधम्। अपेतः शपथं जहि। अधा नो अग्न
आवह। रायस्पोष सहस्रिणम्॥१४॥

ये ते सहस्रमयुतं पाशाः। मृत्यो मर्त्याय हन्तवे। तान्
यज्ञस्य मायया। सर्वानवयजामहे॥१५॥

जातवेदसे सुनवाम सोमं मरातीयतो निदहाति वेदः। स
नः पर्षदति दुर्गाणि विश्वा नावेव सिन्धुं दुरिताऽत्यग्निः॥१६॥

भूर्भुवः स्वः। ओजो बलम्। ब्रह्म क्षत्रम्। यशो महत्।
सत्यं तपो नाम। रूपममृतम्। चक्षुः श्रोत्रम्। मन आयुः।
विश्वं यशो महः। समं तपो हरो भाः। जातवेदा यदि वा
पावकोऽसि। वैश्वानरो यदि वा वैद्युतोऽसि। शं प्रजाभ्यो

यजमानाय लोकम्। ऊर्जं पुष्टिं ददद्भ्याववृथस्व॥१७॥

मृत्युर्नश्यत्वायुर्वर्धतां भूः॥१८॥

मृत्युर्नश्यत्वायुर्वर्धतां भुवः॥१९॥

मृत्युर्नश्यत्वायुर्वर्धतां सुवः॥२०॥

मृत्युर्नश्यत्वायुर्वर्धतां भूर्भुवः सुवः॥२१॥ मृत्युर्नश्यत्वायुर्वर्धताम्॥

॥ॐ शान्तिः शान्तिः शान्तिः॥



(तेत्तिरीयारण्यकम् - ४/प्रपाठकः - ३/अनुवाकः - १५)

हरिः५ हरन्तमनुयन्ति देवाः। विश्वस्येशानं वृषभं
मतीनाम्। ब्रह्म सरूपमनुमेदमागात्। अयनं मा
विवधीर्विक्रमस्व। मा छिदो मृत्यो मा वधीः। मा मे
बलं विवृहो मा प्रमोषीः। प्रजां मा मे रीरिष आयुरुग्र।
नृचक्षसं त्वा हविषा विधेम। सद्यश्चक्रमाणायां प्रवेपानाय
मृत्यवै॥१॥

प्रास्मा आशा अशृण्वन्। कामेनाजनयन्पुनः। कामेन मे
काम आगात्। हृदयाद्धृदयं मृत्योः। यदमीषामदः प्रियम्।
तदैतूपमामभि। परं मृत्यो अनु परेहि पन्थाम्। यस्ते स्व
इतरो देवयानात्। चक्षुष्मते शृण्वते ते ब्रवीमि। मा नः प्रजाः
रीरिषो मोत वीरान्। प्र पूर्व्यं मनसा वन्दमानः। नाधमानो
वृषभं चर्षणीनाम्। यः प्रजानामेकराण्मानुषीणाम्। मृत्युं
यजे प्रथमजामृतस्य॥२॥

॥महान्यासः॥

॥पञ्चाङ्गरुद्रन्यासः रावणोक्ता पञ्चाङ्गप्रार्थना-सहितम्॥

ओङ्कारमन्त्रसंयुक्तं नित्यं ध्यायन्ति योगिनः।

कामदं मोक्षदं तस्मै नकाराय नमो नमः॥१॥

नमस्ते रुद्र मन्यव उतो त इषवे नमः। नमस्ते अस्तु
धन्वने बाहुभ्यामुत ते नमः॥ या त इषुः शिवतमा शिवं
बभूव ते धनुः। शिवा शरव्या या तव तया नो रुद्र मृडय॥

(EAST)

कं खं गं घं ङं। यरलवशषसहोम्। ॐ नमो भगवते रुद्राय।
पूर्वाङ्गरुद्राय नमः।

महादेवं महात्मानं महापातकनाशनम्।

महापापहरं वन्दे मकाराय नमो नमः॥२॥

अपैतु मृत्युरमृतं न आगन्वैवस्वतो नो अभयं कृणोतु। पूर्णं
वनस्पतेरिवाभिः शीयतां रयिः स च तान्नः शचीपतिः।

(SOUTH)

चं छं जं झं ञं। यरलवशषसहोम्। ॐ नमो भगवते रुद्राय।
दक्षिणाङ्गरुद्राय नमः।

शिवं शान्तं जगन्नाथं लोकानुग्रहकारणम्।

शिवमेकं परं वन्दे शिकाराय नमो नमः॥३॥

ॐ। निधनपतये नमः। निधनपतान्तिकाय नमः। ऊर्ध्वाय
नमः। ऊर्ध्वलिङ्गाय नमः। हिरण्याय नमः। हिरण्यलिङ्गाय
नमः। सुवर्णाय नमः। सुवर्णलिङ्गाय नमः। दिव्याय नमः।

दिव्यलिङ्गाय नमः। भवाय नमः। भवलिङ्गाय नमः। शर्वाय
 नमः। शर्वलिङ्गाय नमः। शिवाय नमः। शिवलिङ्गाय
 नमः। ज्वलाय नमः। ज्वललिङ्गाय नमः। आत्माय नमः।
 आत्मलिङ्गाय नमः। परमाय नमः। परमलिङ्गाय नमः।
 एतत्सोमस्य सूर्यस्य सर्वलिङ्गं स्थापयति पाणिमन्त्रं
 पवित्रम्।

(WEST)

टं ठं डं ढं णं। यरलवशषसहोम्। ॐ नमो भगवते रुद्राय।
 पश्चिमाङ्गरुद्राय नमः।

वाहनं वृषभो यस्य वासुकिः कण्ठभूषणम्।

वामे शक्तिधरं वन्दे वकाराय नमो नमः॥४॥

यो रुद्रो अग्नौ यो अप्सु य ओषधीषु यो रुद्रो विश्वा
 भुवनाऽऽविवेश तस्मै रुद्राय नमो अस्तु॥

(NORTH)

तं थं दं धं नं। यरलवशषसहोम्। ॐ नमो भगवते रुद्राय।
 उत्तराङ्गरुद्राय नमः।

यत्र कुत्र स्थितं देवं सर्वव्यापिनमीश्वरम्।

यलिङ्गं पूजयेन्नित्यं यकाराय नमो नमः॥५॥

प्राणानां ग्रन्थिरसि रुद्रो मां विशान्तकः। तेनान्नेनाप्यायस्व॥
 नमो रुद्राय विष्णवे मृत्युर्मे पाहि।

(UPWARDS)

पं फं बं भं मं। यरलवशषसहोम्। ॐ नमो भगवते रुद्राय।
ऊर्ध्वाङ्गरुद्राय नमः।



॥ पञ्चाङ्गमुखन्यासः रावणोक्ता पञ्चमुखप्रार्थना-सहितम् ॥

तत्पुरुषाय विद्महे महादेवाय धीमहि।
तन्नो रुद्रः प्रचोदयात्॥

संवर्ताग्नि-तटित्प्रदीप्त-कनक-प्रस्पर्धि-तेजोरुणं
गम्भीरध्वनि-सामवेदजनकं ताम्राधरं सुन्दरम्।
अर्धेन्दुद्युति-लोल-पिङ्गल-जटाभार-प्रबोद्धोदकं
वन्दे सिद्धसुरासुरेन्द्रनमितं पूर्वं मुखं शूलिनः॥
ॐ नमो भगवते रुद्राय। पूर्वाङ्गमुखाय नमः। (EAST)

अ॒घोरे॑भ्योऽथ॒ घोरे॑भ्यो॒ घोर॒घोर॑तरेभ्यः।
सर्वे॑भ्यः सर्व॒शर्वे॑भ्यो॒ नम॑स्ते अस्तु रु॒द्ररूपे॑भ्यः॥
काला॒भ्रभ्रम॑रा॒ञ्जन॑-द्युतिनिभं व्यावृत्तपिङ्गेक्षणं
कर्णो॒द्भासित॑-भोगिमस्तकमणि-प्रोद्धिन्नदंष्ट्राङ्कुरम्।
सर्प॑प्रोतकपाल-शुक्तिशकल-व्याकीर्णताशेखरं
वन्दे दक्षिणमीश्वरस्य वदनं चार्थर्वनादोदयम्॥
ॐ नमो भगवते रुद्राय। दक्षिणाङ्गमुखाय नमः। (SOUTH)

स॒द्योजा॑तं प्र॒पद्या॑मि॒ स॒द्योजा॑ताय॒ वै नमो॑ नमः।
भ॒वे भ॑वे॒ नाति॑ भवे भवस्व॒ माम्। भ॒वोद्ध॑वाय॒ नमः॥

प्रालेयाचलमिन्दुकुन्द-धवलं गोक्षीरफेनप्रभं
 भस्माभ्यङ्गमनङ्गदेहदहन-ज्वालावली-लोचनम् ।
 विष्णु-ब्रह्म-मरुद्गणार्चितपदं ऋग्वेदनादोदयं
 वन्देऽहं सकलं कलङ्करहितं स्थाणोर्मुखं पश्चिमम्॥

ॐ नमो भगवते रुद्राय। पश्चिमाङ्गमुखाय नमः। (WEST)

वा॒म॒दे॒वाय॒ नमो॑ ज्ये॒ष्ठाय॒ नमः॑ श्रे॒ष्ठाय॒ नमो॑ रु॒द्राय॒ नमः॑
 का॒लाय॑
 नमः॑ कल॑विकर॒णाय॒ नमो॑ बल॑विकर॒णाय॒ नमो॑ बला॑य॒
 नमो॑ बल॑प्रमथ॒नाय॒ नमः॑ सर्व॑भूतदम॒नाय॒ नमो॑ म॒नोन्म॑नाय॒
 नमः॑॥

गौरं कुङ्कुमपङ्कितं सुतिलकं व्यापाण्डुमण्डस्थलं
 भ्रूविक्षेप-कटाक्षवीक्षण-लसत्-संसक्तकर्णोत्पलम्।
 स्निग्धं बिम्बफलाधरं प्रहसितं नीलालकालङ्कृतं
 वन्दे याजुषवेदघोषजनकं वक्त्रं हरस्योत्तरम्॥
 ॐ नमो भगवते रुद्राय। उत्तराङ्गमुखाय नमः। (NORTH)

ई॒शानः॑ सर्व॑विद्याना॒मीश्वरः॑ सर्व॑भू॒तानां॑
 ब्रह्माधि॑पतिर्ब्रह्म॒णोऽधि॑पतिर्ब्रह्मा॑ शि॒वो मे॑ अस्तु
 सदा॑शि॒वोम्॥

व्यक्ताव्यक्तनिरूपितं च परमं षट्त्रिंशतत्त्वाधिकं
तस्मादुत्तर-तत्त्वमक्षरमिति ध्येयं सदा योगिभिः।
ओङ्कारादि समस्तमन्त्रजनकं सूक्ष्मातिसूक्ष्मं परं
वन्दे पञ्चममीश्वरस्य वदनं खव्यापि तेजोमयम्॥
ॐ नमो भगवते रुद्राय। ऊर्ध्वाङ्गमुखाय नमः। (UPWARDS)

॥केशादिपादान्त (प्रथमो) न्यासः॥

या ते रुद्र शिवा तनूरघोराऽपापकाशिनी।
तया नस्तनुवा शन्तमया गिरिशन्ताभिचाकशीहि॥
शिखायै नमः॥ (TUFT)

अस्मिन् महत्यर्णवेऽन्तरिक्षे भुवा अधि।
तेषां सहस्रयोजनेऽवधन्वानि तन्मसि॥
शिरसे नमः॥ (TOP OF HEAD)

सहस्राणि सहस्रशो ये रुद्रा अधि भूम्याम्।
तेषां सहस्रयोजनेऽवधन्वानि तन्मसि॥
ललाटाय नमः॥ (FOREHEAD)

ह्रस्वः शुचिषद्वसुरन्तरिक्षसद्धोता वेदिषदतिथिर्दुरोणसत्।
नृषद्वरसदृत्सद्धोमसदब्जा गोजा ऋतजा अद्रिजा ऋतं
बृहत्॥
भ्रुवोर्मध्याय नमः॥ (MIDDLE OF EYEBROWS)

त्र्यम्बकं यजामहे सुगन्धिं पुष्टिवर्धनम्।
उर्वारुकमिव बन्धनान्मृत्योर्मुक्षीय माऽमृतात्॥

नेत्राभ्यां नमः॥ (EYES)

नमः॑ स्मृत्या॑य च॒ पथ्या॑य च॒ नमः॑ का॒ट्या॑य च नी॒प्या॑य
च॒ नमः॑ सू॒द्या॑य च सर॒स्या॑य च॒ नमो॑ ना॒द्याय॑ च वैश॒न्ताय॑
च।

कर्णाभ्यां नमः॥ (EARS)

मा न॑स्तो॒के तन॑ये॒ मा न॒ आयु॑षि॒ मा नो॒ गोषु॒ मा नो॒
अश्वे॑षु रीरिषः।

वी॒रा॒न्मा नो॑ रु॒द्र भा॒मि॒तोऽव॑धीर्ह॒विष्म॑न्तो॒ नम॑सा विधेम
ते॥

नासिकायै¹ नमः॥ (NOSE)

अ॒व॒त॒त्य॒ ध॒नु॒स्त्व॑ सह॑स्राक्ष॒ शते॑षुधे॥
नि॒शी॒र्य॑ श॒ल्यानां॑ मु॒खा शि॒वो नः॑ सु॒मना॑ भव।

मुखाय नमः॥ (FACE)

नील॑ग्रीवाः शि॒ति॒क॒ण्ठाः श॒र्वा अ॒धः, क्ष॑माच॒राः।
तेषां॑ सह॑स्रयो॒ज॒नेऽव॑ध॒न्वा॒नि त॑न्मसि॥

कण्ठाय नमः॥ (NECK)

नील॑ग्रीवाः शि॒ति॒क॒ण्ठा दि॒वः रु॒द्रा उप॑श्रिताः।
तेषां॑ सह॑स्रयो॒ज॒नेऽव॑ध॒न्वा॒नि त॑न्मसि॥

उपकण्ठाय नमः॥ (LOWER NECK)

नम॑स्ते अ॒स्त्वायु॑धा॒याना॑त॒ताय॑ धृ॒ष्णवे॑॥
उ॒भा॒भ्यामु॑त ते॒ नमो॑ बा॒हुभ्यां॑ तव॒ धन्व॑ने॥

¹नासिकाभ्यां

बाहुभ्यां नमः॥ (SHOULDERS)

या ते हेतिर्मी॑दुष्ट॒म ह॒स्ते ब॒भूव॑ ते ध॒नुः।
तया॒ऽस्मान् वि॒श्वत॒स्त्वम॑य॒क्ष्मया॒ परि॑भुज॥

उपबाहुभ्यां नमः॥ (ELBOW TO WRIST)

परि॑ णो रु॒द्रस्य॑ हेतिर्वृ॑णक्तु परि॑ त्वे॒षस्य॑ दुर्म॒तिर॑घा॒योः।
अव॑ स्थि॒रा म॒घव॑द्ध्यस्तनुष्व॒ मी॒ढ्वस्तो॒काय॒ तन॑याय मृडय॥
मणिबन्धाभ्यां नमः॥ (WRISTS)

ये ती॒र्थानि॑ प्र॒चर॑न्ति सृ॒काव॑न्तो निष॒ङ्गिणः॑।
तेषां॑ सहस्र॒योज॑नेऽव॒धन्वा॑नि तन्मसि॥

हस्ताभ्यां नमः॥ (HANDS)

स॒द्योजा॑तं प्र॑पद्यामि स॒द्योजा॑ताय॒ वै नमो॑ नमः॥
भ॒वे भ॑वे॒ नाति॑ भवे भवस्व॒ माम्। भ॒वोद्भ॑वाय॒ नमः॥

अङ्गुष्ठाभ्यां नमः॥ (ROLL RING FINGERS ON THUMBS)

वा॒मदे॒वाय॒ नमो॑ ज्ये॒ष्ठाय॒ नमः॑ श्रे॒ष्ठाय॒ नमो॑ रु॒द्राय॒ नमः॑
का॒लाय॒ नमः॑ कल॑विक॒रणा॒य नमो॑ बल॑विक॒रणा॒य नमो॑
ब॒लाय॒ नमो॑ बल॑प्रमथ॒नाय॒ नमः॑ सर्व॑भूतदम॒नाय॒ नमो॑
म॒नोन्म॑नाय॒ नमः॥

तर्जनीभ्यां नमः॥ (ROLL THUMBS ON INDEX FINGERS)

अ॒घोरे॑भ्योऽथ॒ घोरे॑भ्यो॒ घोर्घो॑र॒तरे॑भ्यः।
सर्वे॑भ्यः सर्व॑शर्वे॑भ्यो॒ नम॑स्ते अस्तु रु॒द्ररू॑पेभ्यः॥
मध्यमाभ्यां नमः॥ (ROLL THUMBS ON MIDDLE FINGERS)

तत्पुरुषाय विद्महे महादेवाय धीमहि।
तन्नो रुद्रः प्रचोदयात्॥

अनामिकाभ्यां नमः॥ (ROLL THUMBS ON RING FINGERS)

ईशानः सर्वविद्यानामीश्वरः सर्वभूतानां ब्रह्माधिपतिर्ब्रह्मणो-
ऽधिपतिर्ब्रह्मा शिवो मे अस्तु सदाशिवोम्॥

कनिष्ठिकाभ्यां नमः॥ (ROLL THUMBS ON LITTLE FINGERS)

नमो हिरण्यबाहवे हिरण्यवर्णाय हिरण्यरूपाय
हिरण्यपतयेऽम्बिकापतये उमापतये पशुपतये नमो नमः॥

करतलकरपृष्ठाभ्यां नमः॥ (RUB PALMS OVER ONE ANOTHER, FRONT

AND BACK)

नमो वः किरिकेभ्यो देवानां हृदयेभ्यः॥

हृदयाय नमः॥ (HEART)

नमो गुणेभ्यो गुणपतिभ्यश्च वो नमः॥

पृष्ठाय नमः॥ (BACK)

नमस्तक्ष्मभ्यो रथकारेभ्यश्च वो नमः॥

कक्षाभ्यां नमः॥ (ARMPIT TO WAIST)

नमो हिरण्यबाहवे सेनान्यै दिशां च पतये नमः॥

पार्श्वाभ्यां नमः॥ (TRUNK)

विज्यं धनुः कपर्दिनो विशल्यो बाणवां उत।

अनेशनस्येषव आभुरस्य निषङ्गथिः॥

जठराय नमः॥ (STOMACH)

हिरण्यगर्भः समवर्तताग्रे भूतस्य जातः पतिरेक आसीत्।

सदाधार पृथिवीं द्यामुतेमां कस्मै देवाय हविषां विधेम॥

नाभ्यै नमः॥ (NAVEL)

मीढुष्टम् शिवंतम शिवो नः सुमनां भव।
परमे वृक्ष आयुधं निधाय कृत्तिं वसान् आ चरं पिनाकं
बिभ्रदा गंहि॥

कट्यै नमः॥ (WAIST)

ये भूतानामधिपतयो विशिखासः कपर्दिनः।
तेषां सहस्रयोजनेऽवधन्वानि तन्मसि॥

गुह्याय नमः॥ (UPPER REPRODUCTIVE ORGANS)

ये अत्रेषु विविध्यन्ति पात्रेषु पिबन्तो जनान्।
तेषां सहस्रयोजनेऽवधन्वानि तन्मसि॥

अण्डाभ्यां नमः॥ (LOWER REPRODUCTIVE ORGANS)

स शिरा जातवेदा अक्षरं परमं पदम्।
वेदानां शिरसि माता आयुष्मन्तं करोतु माम्॥

अपानाय नमः॥ (ANUS)

मा नो महान्तमुत मा नो अर्भकं मा न उक्षन्तमुत मा
न उक्षितम्।

मा नो वधीः पितरं मोत मातरं प्रिया मा नस्तनुवो रुद्र
रीरिषः॥

ऊरुभ्यां नमः॥ (THIGHS)

एष ते रुद्रभागस्तं जुषस्व तेनावसेनं पुरो मूजवतोऽती-

ह्यवततधन्वा पिनाकहस्तः कृत्तिवासाः॥

जानुभ्यां नमः॥ (KNEES)

स॒ꣳसृष्ट॑जि॒त्सोम॑पा बा॒हुश॑ध्यूर्ध्वध॑न्वा प्रति॑हिताभि॒रस्ता॑॥
बृह॑स्पते॒ परि॑दीया॒ रथे॑न रक्षो॒हाऽमित्रा॑ꣳ अप॒बाध॑मानः॥

जङ्घाभ्यां नमः॥ (KNEE TO ANKLES)

विश्वं॑ भूतं॑ भुव॑नं चि॒त्रं बहु॑धा जा॒तं जाय॑मानं च॒ यत्।
सर्वो॑ ह्येष रु॒द्रस्तस्मै॑ रु॒द्राय॑ नमो॑ अस्तु॥

गुल्फाभ्यां नमः॥ (ANKLES)

ये प॒थां प॑थि॒रक्षय॑ ऐल॒बृदा॑ य॒व्युधः॑।
तेषां॑ सह॒स्रयोज॑नेऽव॒धन्वा॑नि तन्मसि॥

पादाभ्यां नमः॥ (FEET)

अध्य॑वोचदधि॒वृक्ता प्र॑थ॒मो दै॒व्यो भि॒षक्।
अही॑ꣳश्च॒ सर्वा॑ञ्ज॒म्भय॑न्त्सर्वा॑श्च यातु॒धान्यः॑॥

कवचाय हुम्॥ (CROSS HANDS ACROSS CHEST WITH TIPS OF FINGERS

TOUCHING SHOULDERS)

नमो॑ बि॒ल्मिने॑ च कव॒चिने॑ च॒ नमः॑ श्रुताय॑ च श्रुतसे॒नाय॑
च॥

उपकवचाय हुम्॥ (REPEAT THE ABOVE AT ELBOW LEVEL)

नमो॑ अस्तु॒ नील॑ग्रीवाय॒ सह॒स्राक्षाय॑ मी॒ढुषे॑॥
अथो॒ ये अ॑स्य॒ सत्वा॑नोऽहं॒ तेभ्यो॑ऽकरं॒ नमः॑॥

नेत्रत्रयाय वौषट्॥ (TOUCH INDEX, MIDDLE, RING FINGERS ACROSS THE

THREE EYES)

प्र मुञ्च धन्वन्स्त्वमुभयो रार्त्रियोज्याम्।
याश्च ते हस्त इषवः परा ता भगवो वप॥
अस्त्राय फट्॥ (SLAP INDEX AND MIDDLE FINGERS OF RIGHT HAND ON

LEFT PALM)

य एतावन्तश्च भूयाः सश्च दिशो रुद्रा वितस्थिरे।
तेषाः सहस्रयोजनेऽवधन्वानि तन्मसि॥
इति दिग्बन्धः॥ (SNAP MIDDLE AND THUMB WITH CLICKING SOUNDS

AROUND SELF)



॥मूर्धादिपादान्त दशाक्षरी दशाङ्ग (द्वितीयो) न्यासः॥

ॐ मूर्ध्ने नमः। नं नासिकाय² नमः। मों ललाटाय नमः।
भं मुखाय नमः। गं कण्ठाय नमः। वं हृदयाय नमः। तें
दक्षिणहस्ताय नमः। रुं वामहस्ताय नमः। द्रां नाभ्यै नमः।
यं पादाभ्यां नमः।

॥पादादिमूर्धान्त पञ्चाङ्ग (तृतीयो) न्यासः॥

सद्योजातं प्रपद्यामि सद्योजाताय वै नमो नमः।
भवे भवे नाति भवे भवस्व माम्। भवोद्भवाय नमः॥
पादाभ्यां नमः॥

वामदेवाय नमो ज्येष्ठाय नमः श्रेष्ठाय नमो रुद्राय नमः
कालाय नमः कलविकरणाय नमो बलविकरणाय नमो

²नासिकाभ्यां

बलाय॑ नमो॒ बल॑प्रमथनाय॒ नमः॒ सर्व॑भूतदमनाय॒ नमो॒
म॒नोन्म॑नाय॒ नमः॑॥

ऊरु॑भ्यां नमः॥

अ॒घोरे॑भ्योऽथ॒ घोरे॑भ्यो॒ घोर॑घोर॒तरे॑भ्यः।

सर्वे॑भ्यः सर्व॒शर्वे॑भ्यो॒ नम॑स्ते अस्तु रु॒द्ररू॑पेभ्यः॥

हृद॑याय नमः॥

तत्पु॑रुषाय वि॒द्महे॑ महादे॒वाय॑ धीमहि।

तन्नो॑ रु॒द्रः प्रचो॑दयात्॥

मुखा॑य नमः॥

ई॒शानः॑ सर्व॒विद्या॑नामीश्वरः॒ सर्व॑भूता॒नां ब्र॒ह्माधि॑पतिर्ब्रह्म॒णो-
ऽधि॑पतिर्ब्रह्मा॑ शि॒वो मे॑ अस्तु सदाशि॒वोम्॥

हंस॑ हंस॑ मूर्ध्ने॑ नमः॥



॥हंसगायत्री॥

अस्य॑ श्री-हंसगायत्री॒ महाम॑न्त्रस्य। अव्यक्त॑ परब्रह्म
ऋषिः। अव्यक्त॑ गायत्री छन्दः। परम॑हंसो देवता॥ हंसां
बीजम्। हंसीं शक्तिः। हंसूं कीलकम्॥

परम॑हंस-प्रसाद-सिद्ध्यर्थे॑ जपे विनियोगः॥

हंसां॑ अङ्गु॒ष्ठाभ्यां॑ नमः। हंसीं॑ तर्जनी॒भ्यां॑ नमः। हंसूं॑
मध्यमा॒भ्यां॑ नमः। हंसै॑ अनामिका॒भ्यां॑ नमः। हंसौ॑
कनिष्ठिका॒भ्यां॑ नमः। हंसः॑ करतलकरपृष्ठा॒भ्यां॑ नमः। हंसां॑

हृदयाय नमः। हंसीं शिरसे स्वाहा। हंसूं शिखायै वषट्।
हंसैं कवचाय हुम्। हंसौं नेत्रत्रयाय वौषट्। हंसः अस्त्राय
फट्। भूर्भुवस्सुवरोम् इति दिग्बन्धः॥

॥ध्यानम्॥

गमागमस्थं गमनादिशून्यं चिद्रूपदीपं तिमिरापहारम्।
पश्यामि ते सर्वजनान्तरस्थं नमामि हंसं परमात्मरूपम्॥

हंसहंसात् परमहंसः सोऽहं हंसः॥

हंसु हंसाय विद्महे परमहंसाय धीमहि।

(एवं त्रिः)

तन्नो हंसः प्रचोदयात्॥

हंस हंसेति यो ब्रूयाद्धसो नाम सदाशिवः।

एवं न्यासविधिं कृत्वा ततः सम्पुटमारभेत्॥



॥दिक् सम्पुटन्यासः॥

ॐ भूर्भुवः सुवरोम्।

[ॐ] लं। त्रातारमिन्द्रमवितारमिन्द्रः हवेहवे सुहवः
शूरमिन्द्रम्।

हुवे नु शक्रं पुरुहूतमिन्द्रः स्वस्ति नो मघवां धात्विन्द्रः॥

[ॐ] लं भूर्भुवः सुवः। इन्द्राय वज्रहस्ताय सुराधिपतय
ऐरावतवाहनाय साङ्गाय सायुधाय सशक्तिपरिवाराय
सर्वालङ्कारभूषिताय उमामहेश्वरपार्षदाय नमः।

पूर्वदिग्भागे ललाटस्थाने लं इन्द्राय नमः। इन्द्रः सुप्रीतो
वरदो भवतु॥ [इन्द्रः संरक्षतु॥]

॥१॥

ॐ भूर्भुवः सुवरोम्।

[नं] रं। त्वन्नो अग्ने वरुणस्य विद्वान् देवस्य हेडोऽव
यासिसीष्ठाः।

यजिष्ठो वह्नितमः शोशुचानो विश्वा द्वेषांसि प्रमुमुग्ध्युस्मत्॥

[नं] रं भूर्भुवः सुवः। अग्नये शक्तिहस्ताय तेजोऽधिपतये-
ऽजवाहनाय साङ्गाय सायुधाय सशक्तिपरिवाराय
सर्वालङ्कारभूषिताय उमामहेश्वरपार्षदाय नमः।

आग्नेयदिग्भागे नेत्रयोः स्थाने रं अग्नये नमः। अग्निः सुप्रीतो
वरदो भवतु॥ [अग्निः संरक्षतु॥] ॥ २ ॥

ॐ भूर्भुवः सुवरोम्।

[मों] हं। सुगं नः पन्थामभयं कृणोतु। यस्मिन्नक्षत्रे यम
एति राजा॥

यस्मिन्नेनमभ्यर्षिश्चन्त देवाः। तदस्य चित्रं हविषां यजाम॥

[मों] हं भूर्भुवः सुवः। यमाय दण्डहस्ताय धर्माधिपतये
महिषवाहनाय साङ्गाय सायुधाय सशक्तिपरिवाराय
सर्वालङ्कारभूषिताय उमामहेश्वरपार्षदाय नमः।

दक्षिणदिग्भागे कर्णयोः स्थाने हं यमाय नमः। यमः सुप्रीतो
वरदो भवतु॥ [यमः संरक्षतु॥] ॥ ३ ॥

ॐ भूर्भुवः सुवरोम्।

[भं] षं। असुन्वन्तमयं जमानमिच्छ स्तेनस्येत्यां
तस्करस्यान्वेषि।

अन्यमस्मदिच्छ सा तं इत्या नमो देवि निर्ऋते तुभ्यमस्तु॥

[भं] षं भूर्भुवः सुवः। निर्ऋतये खङ्गहस्ताय रक्षोधिपतये
नरवाहनाय साङ्गाय सायुधाय सशक्तिपरिवाराय सर्वालङ्कार-
भूषिताय उमामहेश्वरपार्षदाय नमः।

निर्ऋतिदिग्भागे मुखस्थाने षं निर्ऋतये नमः। निर्ऋतिः
सुप्रीतो वरदो भवतु॥ [निर्ऋतिः संरक्षतु॥] ॥४॥

ॐ भूर्भुवः सुवरोम्।

[गं] वं। तत्त्वां यामि ब्रह्मणा वन्दमानस्तदा शास्ते यजमानो
हविर्भिः।

अहेडमानो वरुणेह बोध्युरुशंस मा न आयुः प्रमोषीः॥

[गं] वं भूर्भुवः सुवः। वरुणाय पाशहस्ताय जलाधिपतये
मकरवाहनाय साङ्गाय सायुधाय सशक्तिपरिवाराय
सर्वालङ्कारभूषिताय उमामहेश्वरपार्षदाय नमः।

पश्चिमदिग्भागे बाह्वोः स्थाने वं वरुणाय नमः। वरुणः
सुप्रीतो वरदो भवतु॥ [वरुणः संरक्षतु॥] ॥५॥

ॐ भूर्भुवः सुवरोम्।

[वं] यं। आ नो नियुद्धिः शतिनीभिरध्वरम्। सहस्रिणीभिरुप-
याहि यज्ञम्।

वायो अस्मिन् हविषि मादयस्व। यूयं पात स्वस्तिभिः सदा
नः॥

[वं] यं भूर्भुवः सुवः। वायवे साङ्कुशध्वजहस्ताय प्राणाधिपतये
मृगवाहनाय साङ्गाय सायुधाय सशक्तिपरिवाराय

सर्वालङ्कारभूषिताय उमामहेश्वरपार्षदाय नमः।

वायव्यदिग्भागे नासिकास्थाने³ यं वायवे नमः। वायुः
सुप्रीतो वरदो भवतु॥ [वायुः संरक्षतु॥] ॥६॥

ॐ भूर्भुवः सुवरोम्।

[ते] सं। वयं सोम व्रते तव। मनस्तनूषु बिभ्रतः।

प्रजावन्तो अशीमहि॥

[ते] सं भूर्भुवः सुवः। सोमाय अमृतकलशहस्ताय
नक्षत्राधिपतये अश्ववाहनाय साङ्गाय सायुधाय
सशक्तिपरिवाराय सर्वालङ्कारभूषिताय उमामहेश्वर-
पार्षदाय नमः।

उत्तरदिग्भागे हृदयस्थाने सं सोमाय नमः। सोमः सुप्रीतो
वरदो भवतु॥ [सोमः संरक्षतु॥] ॥७॥

ॐ भूर्भुवः सुवरोम्।

[रुं] शं। (ऋक्) तमीशानं जगंतस्तस्थुषस्पतिम्। धियं
जिन्वमवसे हूमहे वयम्।

पूषा नो यथा वेदसामसंदृधे रक्षिता पायुरदब्धः स्वस्तये॥

[रुं] शं भूर्भुवः सुवः। ईशानाय त्रिशूलहस्ताय भूताधिपतये
वृषभवाहनाय साङ्गाय सायुधाय सशक्तिपरिवाराय
सर्वालङ्कारभूषिताय उमामहेश्वरपार्षदाय नमः।

ईशानदिग्भागे नाभिस्थाने शं ईशानाय नमः। ईशानः
सुप्रीतो वरदो भवतु॥ [ईशानः संरक्षतु॥] ॥८॥

³नासिकयोः स्थाने

ॐ भूर्भुवः सुवरोम्।

[द्रां] खं। (ऋक्) अस्मे रुद्रा मेहना पर्वतासो वृत्रहत्ये
भरंहूतो सजोषाः ।

यः शंसते स्तुवते धायि पञ्च इन्द्रज्येष्ठा अस्माँ अवन्तु
देवाः॥

[द्रां] खं भूर्भुवः सुवः। ब्रह्मणे पद्महस्ताय विद्याधिपतये
हंसवाहनाय साङ्गाय सायुधाय सशक्तिपरिवाराय
सर्वालङ्कारभूषिताय उमामहेश्वरपार्षदाय नमः।

ऊर्ध्वदिग्भागे मूर्ध्निस्थाने खं ब्रह्मणे नमः। ब्रह्मा सुप्रीतो
वरदो भवतु॥ [ब्रह्मा संरक्षतु॥] ॥९॥

ॐ भूर्भुवः सुवरोम्।

[यं] ह्रीं। स्योना पृथिवि भवाऽनृक्षरा निवेशनी।

यच्छानः शर्म सप्रथाः॥

[यं] ह्रीं भूर्भुवः सुवः। विष्णवे चक्रहस्ताय नागाधिपतये
गरुडवाहनाय साङ्गाय सायुधाय सशक्तिपरिवाराय
सर्वालङ्कारभूषिताय उमामहेश्वरपार्षदाय नमः।

अधोदिग्भागे पादयोः स्थाने ह्रीं विष्णवे नमः। विष्णुः
सुप्रीतो वरदो भवतु॥ [विष्णुः संरक्षतु॥] ॥१०॥



॥ षोडशाङ्गरौद्रीकरणम् ॥

ॐ भूर्भुवः सुवः। नमः शम्भवे च मयोभवे च नमः
 शङ्कराय च मयस्कराय च नमः शिवाय च शिवतराय च॥
 ॐ अं। विभूरसि प्रवाहणो रौद्रेणानीकेन पाहि माँऽग्रे
 पिपृहि मा मा मा हिंसीः॥ अं [ॐ] भूर्भुवः सुवरोम्।
 शिखास्थाने रुद्राय नमः॥१॥

ॐ भूर्भुवः सुवः। नमः शम्भवे च मयोभवे च नमः शङ्कराय
 च मयस्कराय च नमः शिवाय च शिवतराय च॥
 ॐ आं। वह्निरसि हव्यवाहनो रौद्रेणानीकेन पाहि माँऽग्रे
 पिपृहि मा मा मा हिंसीः॥ आं [ॐ] भूर्भुवः सुवरोम्।
 शिरस्थाने रुद्राय नमः॥२॥

ॐ भूर्भुवः सुवः। नमः शम्भवे च मयोभवे च नमः शङ्कराय
 च मयस्कराय च नमः शिवाय च शिवतराय च॥
 ॐ इं। श्वात्रोऽसि प्रचेता रौद्रेणानीकेन पाहि माँऽग्रे पिपृहि
 मा मा मा हिंसीः॥ इं [ॐ] भूर्भुवः सुवरोम्। मूर्ध्निस्थाने
 रुद्राय नमः॥३॥

ॐ भूर्भुवः सुवः। नमः शम्भवे च मयोभवे च नमः शङ्कराय
 च मयस्कराय च नमः शिवाय च शिवतराय च॥
 ॐ ईं। तुथोऽसि विश्ववेदा रौद्रेणानीकेन पाहि माँऽग्रे
 पिपृहि मा मा मा हिंसीः॥ ईं [ॐ] भूर्भुवः सुवरोम्।
 ललाटस्थाने रुद्राय नमः॥४॥

ॐ भूर्भुवः सुवः। नमः शम्भवे च मयोभवे च नमः शङ्कराय
च मयस्कराय च नमः शिवाय च शिवतराय च॥

ॐ उं। उशिगंसि कवी रौद्रेणानीकेन पाहि माँऽग्रे पिपृहि
मा मा मां हिंसीः॥ उं [ॐ] भूर्भुवः सुवरोम्। नेत्रयोः⁴
स्थाने रुद्राय नमः॥५॥

ॐ भूर्भुवः सुवः। नमः शम्भवे च मयोभवे च नमः शङ्कराय
च मयस्कराय च नमः शिवाय च शिवतराय च॥

ॐ उं। अङ्गारिरसि बम्भारी रौद्रेणानीकेन पाहि माँऽग्रे
पिपृहि मा मा मां हिंसीः॥ उं [ॐ] भूर्भुवः सुवरोम्।
कर्णयोः स्थाने रुद्राय नमः॥६॥

ॐ भूर्भुवः सुवः। नमः शम्भवे च मयोभवे च नमः शङ्कराय
च मयस्कराय च नमः शिवाय च शिवतराय च॥

ॐ ऋं। अवस्युरसि दुवस्वान् रौद्रेणानीकेन पाहि माँऽग्रे
पिपृहि मा मा मां हिंसीः॥ ऋं [ॐ] भूर्भुवः सुवरोम्।
मुखस्थाने रुद्राय नमः॥७॥

ॐ भूर्भुवः सुवः। नमः शम्भवे च मयोभवे च नमः शङ्कराय
च मयस्कराय च नमः शिवाय च शिवतराय च॥

ॐ ऋं। शुन्ध्यूरसि मार्जालीयो रौद्रेणानीकेन पाहि माँऽग्रे
पिपृहि मा मा मां हिंसीः॥ ऋं [ॐ] भूर्भुवः सुवरोम्।
कण्ठस्थाने रुद्राय नमः॥८॥

ॐ भूर्भुवः सुवः। नमः शम्भवे च मयोभवे च नमः शङ्कराय
च मयस्कुराय च नमः शिवाय च शिवतराय च॥

ॐ लं। सम्राडसि कृशानू रौद्रेणानीकेन पाहि मांऽग्रे पिपृहि
मा मा मां हिंसीः॥ लं [ॐ] भूर्भुवः सुवरोम्। बाहोः
स्थाने रुद्राय नमः॥९॥

ॐ भूर्भुवः सुवः। नमः शम्भवे च मयोभवे च नमः शङ्कराय
च मयस्कुराय च नमः शिवाय च शिवतराय च॥

ॐ लं। परिषद्योऽसि पवमानो रौद्रेणानीकेन पाहि मांऽग्रे
पिपृहि मा मा मां हिंसीः॥ लं [ॐ] भूर्भुवः सुवरोम्।
हृदयस्थाने रुद्राय नमः॥१०॥

ॐ भूर्भुवः सुवः। नमः शम्भवे च मयोभवे च नमः शङ्कराय
च मयस्कुराय च नमः शिवाय च शिवतराय च॥

ॐ एं। प्रतक्कोऽसि नभस्वान् रौद्रेणानीकेन पाहि मांऽग्रे
पिपृहि मा मा मां हिंसीः॥ एं [ॐ] भूर्भुवः सुवरोम्।
नाभिस्थाने रुद्राय नमः॥११॥

ॐ भूर्भुवः सुवः। नमः शम्भवे च मयोभवे च नमः शङ्कराय
च मयस्कुराय च नमः शिवाय च शिवतराय च॥

ॐ ऐं। असम्मृष्टोऽसि हव्यसूदो रौद्रेणानीकेन पाहि मांऽग्रे
पिपृहि मा मा मां हिंसीः॥ ऐं [ॐ] भूर्भुवः सुवरोम्।
कटिस्थाने रुद्राय नमः॥१२॥

ॐ भूर्भुवः सुवः। नमः शम्भवे च मयोभवे च नमः शङ्कराय
च मयस्कराय च नमः शिवाय च शिवतराय च॥

ॐ ॐ। ऋतधामाऽसि सुवर्ज्योती रौद्रेणानीकेन पाहि
माऽग्ने पिपृहि मा मा मा हिंसीः॥ ॐ [ॐ] भूर्भुवः
सुवरोम्। ऊरुस्थाने रुद्राय नमः॥१३॥

ॐ भूर्भुवः सुवः। नमः शम्भवे च मयोभवे च नमः शङ्कराय
च मयस्कराय च नमः शिवाय च शिवतराय च॥

ॐ औं। ब्रह्मज्योतिरसि सुवर्धामा रौद्रेणानीकेन पाहि
माऽग्ने पिपृहि मा मा मा हिंसीः॥ औं [ॐ] भूर्भुवः
सुवरोम्। जानुस्थाने रुद्राय नमः॥१४॥

ॐ भूर्भुवः सुवः। नमः शम्भवे च मयोभवे च नमः शङ्कराय
च मयस्कराय च नमः शिवाय च शिवतराय च॥

ॐ अं। अजोऽस्येकपाद्रौद्रेणानीकेन पाहि माऽग्ने पिपृहि
मा मा मा हिंसीः॥ अं [ॐ] भूर्भुवः सुवरोम्। जङ्घास्थाने
रुद्राय नमः॥१५॥

ॐ भूर्भुवः सुवः। नमः शम्भवे च मयोभवे च नमः शङ्कराय
च मयस्कराय च नमः शिवाय च शिवतराय च॥

ॐ अः। अहिरसि बुध्नियो रौद्रेणानीकेन पाहि माऽग्ने
पिपृहि मा मा मा हिंसीः॥ अः [ॐ] भूर्भुवः सुवरोम्।
पादयोः स्थाने रुद्राय नमः॥१६॥

त्वगस्थिगतैः सर्वपापैः प्रमुच्यते। सर्वभूतेष्वपराजितो भवति।

ततो भूत-प्रेत-पिशाच-ब्रह्मराक्षस-यक्ष-यमदूत-शाकिनी-डाकिनी-सर्प-श्वापद-वृश्चिक-तस्कराद्युपद्रवाद्युपघाताः। सर्वे ज्वलन्तं पश्यन्तु। मां रक्षन्तु। यजमानं रक्षन्तु। सर्वान् महाजनान् रक्षन्तु॥



॥गुह्यादि मस्तकान्तं षडङ्ग (चतुर्थो) न्यासः॥

मनो॒ ज्योतिर्जुषता॒माज्यं॒ विच्छिन्नं॒ यज्ञं॑ समि॒मं दधातु॑।
या इ॒ष्टा उ॒षसो॑ नि॒म्रुचंश्च॒ ताः सन्द॑धामि ह॒विषा॑ घृतेन॑॥
गुह्याय नमः॥१॥

अबो॑ध्य॒ग्निः समि॒धा जना॑नां॒ प्रति॑ धे॒नुमि॑वाऽऽय॒तीमु॒षासम्॑।
य॒ह्वा इ॒व प्र॒यामु॒ञ्जिहा॑नाः॒ प्रभा॑नवः॒ सिस्र॑ते॒ नाक॑मच्छं॥
नाभ्यै नमः॥२॥

अ॒ग्निर्मूर्धा॑ दि॒वः क॒कुत्प॑तिः पृथि॒व्या अ॒यम्।
अ॒पां॑ रेता॑ंसि जिन्वति॥ हृदयाय नमः॥३॥

मूर्धानं॑ दि॒वो अ॑रतिं पृथि॒व्या वैश्वान॑रमृ॒ताय॑ जा॒तम॑ग्निम्।
क॒विं॑ स॒म्राज॑मति॒थिं जना॑नामा॒सन्ना पात्रं॑ जनयन्त दे॒वाः॥
कण्ठाय नमः॥४॥

म॒र्माणि॑ ते॒ वर्म॑भिश्छादयामि॒ सोम॑स्त्वा॒ राजा॑ऽमृते॑ना॒भि॒वस्ता॑म्।

उ॒रोर्वरी॑यो वरि॑वस्ते अस्तु जय॑न्तं त्वामनु॑ मदन्तु दे॒वाः॥
मुखाय नमः॥५॥

जा॒तवे॑दा यदि॑ वा पा॒व॒कोऽसि॑। वै॒श्वान॒रो यदि॑ वा
वैद्यु॑तोऽसि॑।

शं प्र॒जाभ्यो॑ यज॑मानाय लो॒कम्। ऊ॒र्जं पु॒ष्टिं दद॑द्भ्याव॑वृ॒थ्स्व॥
शिर॑से नमः॥६॥



॥ आत्मरक्षा ॥

(तैत्तिरीयब्राह्मणे अष्टकं - २/प्रश्नः - ३/अनुवाकः - ११)

ब्रह्मा॑त्म॒न्वद॑सृजत। तद॑कामयत। समा॒त्मना॑ पद्येयेति॑।
आत्म॒न्नात्म॒न्नित्याम॑न्नयत। तस्मै॑ दश॒म॑ हूतः प्रत्य॑शृणोत्।
स दश॑हूतोऽभवत्। दश॑हूतो ह॒ वै नामै॑षः। तं वा ए॒तं दश॑हूत॒ः
सन्त॑म॒। दश॑होतेत्याचक्षते प॒रोक्षे॑ण। प॒रोक्ष॑प्रिया इव॒ हि
दे॒वाः॥

आत्म॒न्नात्म॒न्नित्याम॑न्नयत। तस्मै॑ सप्त॒म॑ हूतः
प्रत्य॑शृणोत्। स सप्त॑हूतोऽभवत्। सप्त॑हूतो ह॒ वै नामै॑षः। तं
वा ए॒तं सप्त॑हूत॒ः सन्त॑म॒। सप्त॑होतेत्याचक्षते प॒रोक्षे॑ण।
प॒रोक्ष॑प्रिया इव॒ हि दे॒वाः॥

आत्म॒न्नात्म॒न्नित्याम॑न्नयत। तस्मै॑ ष॒ष्ठ॑ हूतः प्रत्य॑शृणोत्।
स षड्दू॑तोऽभवत्। षड्दू॑तो ह॒ वै नामै॑षः। तं वा ए॒तं षड्दू॑त॒ः
सन्त॑म॒। षड्दू॑होतेत्याचक्षते प॒रोक्षे॑ण। प॒रोक्ष॑प्रिया इव॒ हि दे॒वाः॥

आत्मन्नात्मन्नित्यामन्त्रयत्। तस्मै पञ्चमं हूतः
 प्रत्यशृणोत्। स पञ्चहूतोऽभवत्। पञ्चहूतो ह वै नामैषः।
 तं वा एतं पञ्चहूतं सन्तम्। पञ्चहोतेत्याचक्षते पुरोक्षेण।
 पुरोक्षप्रिया इव हि देवाः॥

आत्मन्नात्मन्नित्यामन्त्रयत्। तस्मै चतुर्थं हूतः
 प्रत्यशृणोत्। स चतुरहूतोऽभवत्। चतुरहूतो ह वै
 नामैषः। तं वा एतं चतुरहूतं सन्तम्। चतुर्होतेत्याचक्षते
 पुरोक्षेण। पुरोक्षप्रिया इव हि देवाः॥

तमब्रवीत्। त्वं वै मे नेदिष्ठं हूतः प्रत्यश्रौषीः।
 त्वयैनानाख्यातार इति। तस्मान्नु हैनांश्चतुरहोतार
 इत्याचक्षते। तस्माच्छुश्रूषुः पुत्राणां हृद्यतमः। नेदिष्ठो
 हृद्यतमः। नेदिष्ठो ब्रह्मणो भवति। य एवं वेद।
 आत्मने नमः॥

॥शिवसङ्कल्पः॥

येनेदं भूतं भुवनं भविष्यत् परिगृहीतममृतेन सर्वम्।
 येन यज्ञस्त्रायते सप्तहोता तन्मे मनः शिवसङ्कल्पमस्तु॥१॥

येन कर्माणि प्रचरन्ति धीरा यतो वाचा मनसा चारु
 यन्ति। यथ्सम्मिमतमनुसंयन्ति प्राणिनस्तन्मे मनः

शिवसङ्कल्पमस्तु॥२॥

येन कर्माण्यपसो मनीषिणो यज्ञे कृण्वन्ति विदथेषु धीराः।

यदपूर्वं यक्षमन्तः प्रजानां तन्मे मनः शिवसङ्कल्पमस्तु॥३॥

यत्प्रज्ञानमुत चेतो धृतिश्च यज्योतिरन्तरमृतं प्रजासु।

यस्मान्न ऋते किं च न कर्म क्रियते तन्मे मनः

शिवसङ्कल्पमस्तु॥४॥

सुषारथिरश्वानिव यन्मनुष्यान्नेनीयतेऽभीशुभिर्वाजिन इव।

हृत्प्रतिष्ठं यदजिरं जविष्ठं तन्मे मनः शिवसङ्कल्पमस्तु॥५॥

यस्मिनृचः साम यजूंषि यस्मिन् प्रतिष्ठिता

रथनाभाविंवाराः। यस्मिंश्चित्तं सर्वमोतं प्रजानां तन्मे

मनः शिवसङ्कल्पमस्तु॥६॥

यदत्र षष्ठं त्रिशतं सुवीरं यज्ञस्य गुह्यं नवनावमायम्।

दशं पञ्च त्रिंशतं यत्परं च तन्मे मनः

शिवसङ्कल्पमस्तु॥७॥

यज्जाग्रतो दूरमुदैति दैवं तदु सुप्तस्य तथैवैति। दूरङ्गमं

ज्योतिषां ज्योतिरेकं तन्मे मनः शिवसङ्कल्पमस्तु॥८॥

येनेदं विश्वं जगतो बभूव ये देवापि महतो जातवैदाः।

तदेवाग्निस्तमसो ज्योतिरेकं तन्मे मनः

शिवसङ्कल्पमस्तु॥९॥

येन द्यौः पृथिवी चान्तरिक्षं च ये पर्वताः प्रदिशो दिशश्च।

येनेदं जगद्ध्याप्तं प्रजानां तन्मे मनः शिवसङ्कल्पमस्तु॥१०॥

ये मनो हृदयं ये च देवा ये दिव्या आपो ये सूर्यरश्मिः। ते

श्रोत्रे चक्षुषी सञ्चरन्तं तन्मे मनः शिवसङ्कल्पमस्तु॥११॥

अचिन्त्यं चाप्रमेयं च व्यक्ताव्यक्तपरं च यत्।
 सूक्ष्मात्सूक्ष्मतरं ज्ञेयं तन्मे मनः शिवसङ्कल्पमस्तु॥१२॥
 एका च दश शतं च सहस्रं चायुतं च
 नियुतं च प्रयुतं चार्बुदं च न्यर्बुदं च समुद्रश्च मध्यं चान्तश्च
 परार्धश्च तन्मे मनः शिवसङ्कल्पमस्तु॥१३॥
 ये पञ्च पञ्चादश शतं सहस्रमयुतं न्यर्बुदं च। ते
 अग्निचित्येष्टकास्तं शरीरं तन्मे मनः
 शिवसङ्कल्पमस्तु॥१४॥
 वेदाहमेतं पुरुषं महान्तमादित्यवर्णं तमसः परस्तात्। यस्य
 योनिं परिपश्यन्ति धीरास्तन्मे मनः शिवसङ्कल्पमस्तु॥१५॥
 यस्येदं धीराः पुनन्ति कवयो ब्रह्माणमेतं त्वा वृणत इन्दुम्।
 स्थावरं जङ्गमं द्यौराकाशं तन्मे मनः
 शिवसङ्कल्पमस्तु॥१६॥

परात्परतरं चैव यत्पराच्चैव यत्परम्।
 यत्परात्परतो ज्ञेयं तन्मे मनः शिवसङ्कल्पमस्तु॥१७॥

परात्परतरो ब्रह्मा तत्परात्परतो हरिः।
 तत्परात्परतोऽधीशस्तन्मे मनः शिवसङ्कल्पमस्तु॥१८॥

या वेदादिषु गायत्री सर्वव्यापी महेश्वरी।
 ऋग्यजुः सामाथर्वैश्च तन्मे मनः शिवसङ्कल्पमस्तु॥१९॥

यो वै देवं महादेवं प्रणवं परमेश्वरम्।
यः सर्वे सर्ववेदैश्च तन्मे मनः शिवसङ्कल्पमस्तु॥ २० ॥

प्रयतुः प्रणवोङ्कारं प्रणवं पुरुषोत्तमम्।
ओङ्कारं प्रणवात्मानं तन्मे मनः शिवसङ्कल्पमस्तु॥ २१ ॥

योऽसौ सर्वेषु वेदेषु पठ्यते ह्यज इश्वरः।
अकार्यो निर्गुणो ह्यात्मा तन्मे मनः शिवसङ्कल्पमस्तु॥ २२ ॥

गोभिर्जुष्टं धनेन ह्यायुषा च बलेन च।
प्रजया पशुभिः पुष्कराक्षं तन्मे मनः शिवसङ्कल्पमस्तु॥ २३ ॥

कैलासशिखरे रम्ये शङ्करस्य शिवालये।
देवतास्तत्र मोदन्ते तन्मे मनः शिवसङ्कल्पमस्तु॥ २४ ॥
विश्वतश्चक्षुरुत विश्वतोमुखो विश्वतोहस्त उत विश्वतस्पात्।
सं बाहुभ्यां नमति सम्पतत्रैर्द्यावापृथिवी जनयन्देव
एकस्तन्मे मनः शिवसङ्कल्पमस्तु॥ २५ ॥

त्र्यम्बकं यजामहे सुगन्धिं पुष्टिवर्धनम्।
उर्वारुकमिव बन्धनान्मृत्योर्मुक्षीय मामृतात्तन्मे मनः
शिवसङ्कल्पमस्तु॥ २६ ॥

चतुरो वेदानधीयीत सर्वशास्त्रमयं विदुः।
इतिहासपुराणानां तन्मे मनः शिवसङ्कल्पमस्तु॥ २७ ॥
मा नो महान्तमुत मा नो अर्भकं मा न उक्षन्तमुत मा न

उक्षितम्। मा नो वधीः पितरं मोत मातरं प्रिया मा
 नस्तनुवो रुद्र रीरिषस्तन्मे मनः शिवसङ्कल्पमस्तु॥२८॥
 मा नस्तोके तनये मा न आयुषि मा नो गोषु मा नो
 अश्वेषु रीरिषः। वीरान्मा नो रुद्र भामितोऽवधीरुहविष्मन्तो
 नमसा विधेम ते तन्मे मनः शिवसङ्कल्पमस्तु॥२९॥
 ऋतं सत्यं परं ब्रह्म पुरुषं कृष्णपिङ्गलम्।
 ऊर्ध्वरेतं विरूपाक्षं विश्वरूपाय वै नमो
 नमस्तन्मे मनः शिवसङ्कल्पमस्तु॥३०॥
 कद्रुद्राय प्रचेतसे मीढुष्टमाय तव्यसे।
 वो चेम् शन्तमं हृदे। सर्वो ह्येष रुद्रस्तस्मै रुद्राय नमो
 अस्तु तन्मे मनः शिवसङ्कल्पमस्तु॥३१॥
 ब्रह्मजज्ञानं प्रथमं पुरस्ताद्विसीमतः सुरुचो वेन आवः।
 सबुध्रिया उपमा अस्य विष्ठाः सतश्च योनिमसतश्च
 विवस्तन्मे मनः शिवसङ्कल्पमस्तु॥३२॥
 यः प्राणतो निमिषतो महित्वैक इद्राजा जगतो बभूव।
 य ईशे अस्य द्विपदश्चतुष्पदः कस्मै देवाय
 हविषा विधेम तन्मे मनः शिवसङ्कल्पमस्तु॥३३॥
 य आत्मदा बलदा यस्य विश्वं उपासते प्रशिषं यस्य देवाः।
 यस्य छायाऽमृतं यस्य मृत्युः कस्मै देवाय
 हविषा विधेम तन्मे मनः शिवसङ्कल्पमस्तु॥३४॥
 यो रुद्रो अग्नौ यो अप्सु य ओषधीषु यो रुद्रो विश्वा

भुव॑नाऽऽवि॒वेश॒ तस्मै॑ रु॒द्राय॒ नमो॑ अस्तु॒ तन्मे॒ मनः॑
 शि॒वसं॑ङ्क॒ल्पम॑स्तु॥ ३५॥
 ग॒न्ध॒द्वा॒रां दु॑राध॒रूपां॑ नि॒त्यपु॑ष्टां॒ करी॑षिणी॑म्। ई॒श्वरी॑
 सर्व॑भू॒तानां॑
 तामि॒होप॑ह्वये॒ श्रियं॑ तन्मे॒ मनः॑ शि॒वसं॑ङ्क॒ल्पम॑स्तु॥ ३६॥
 य इ॒दं शि॒वसं॑ङ्क॒ल्पं स॒दा ध्या॑यन्ति॒ ब्राह्म॑णाः।
 ते परं॒ मोक्षं॑ गमिष्यन्ति॒ तन्मे॒ मनः॑ शि॒वसं॑ङ्क॒ल्पम॑स्तु॥
 हृद॑याय॒ नमः॑॥



॥ पुरुषसूक्तम् ॥

ॐ स॒हस्र॑शी॒र्षा पुरु॑षः। स॒हस्रा॒क्षः स॒हस्र॑पात्। स भूमिं॑
 वि॒श्वतो॑ वृ॒त्वा। अत्य॑तिष्ठद्व॒शाङ्गु॑लम्॥ पुरु॑ष ए॒वेदं॑ सर्व॑म्।
 यद्भू॑तं यच्च॒ भव्य॑म्। उ॒तामृ॑त॒त्वस्ये॑शानः। यदत्रै॑नाति॒रोह॑ति॥
 ए॒तावा॑नस्य॒ महि॑मा। अतो॒ ज्याया॑श्च॒ पूरु॑षः।

पादो॑ऽस्य॒ विश्वा॑ भू॒तानि॑। त्रि॒पाद॑स्यामृतं॒ दिवि॑॥ त्रि॒पादूर्ध्व॑
 उदै॑त्पुरु॑षः। पादो॑ऽस्ये॒हाऽऽभ॑वात्पुनः॑। ततो॒ विश्व॑ङ्म॒क्राम॑त्।
 सा॒श॒ना॒न॒श॒ने अ॒भि॥ तस्मा॑द्वि॒राड॑जायत। वि॒राजो॒ अधि॑
 पूरु॑षः। स जा॒तो अत्य॑रिच्यत। प॒श्चाद्भूमि॑मथो॒ पुरः॑॥

यत्पुरु॑षेण॒ हवि॑षा॑। दे॒वा य॒ज्ञम॑तन्वत। व॒सन्तो॑
 अ॑स्यासी॒दाज्य॑म्। ग्री॒ष्म इ॒ध्मः श॒रद्ध॑विः॥ स॒प्तास्या॑ऽऽ-

सन्परि॒धयः॑। त्रिः स॒प्त स॒मिधः॑ कृ॒ताः। दे॒वा यद्य॒ज्ञं तं॒न्वा॒नाः।
अ॒ब॒ध्नन्पु॒रुषं॑ प॒शुम्॥ तं य॒ज्ञं ब॒रु॒हिषि॑ प्रौक्षन्। पु॒रुषं॑
जा॒तम॑ग्र॒तः।

तेन॑ दे॒वा अय॑जन्त। सा॒ध्या ऋ॒षयश्च॑ ये॥ तस्मा॑द्य॒ज्ञात्सर्व॑-
हु॒तः। सम्भृ॑तं पृषदा॒ज्यम्। प॒शूँस्ताँश्च॑क्रे वा॒यव्यान्।
आ॒र॒ण्यान्प्रा॒म्याश्च॑ ये॥ तस्मा॑द्य॒ज्ञात्सर्व॑हु॒तः। ऋचः॑ सा॒मानि॑
ज॒ज्ञिरे। छन्दाँ॑सि ज॒ज्ञिरे॒ तस्मा॑त्।

यजु॑स्तस्मा॑दजायत॥ तस्मा॑द॒श्वा अजा॑यन्त। ये के
चो॒भ्याद॑तः। गा॒वो ह ज॒ज्ञिरे॒ तस्मा॑त्। तस्मा॑ज्जा॒ता
अ॒जाव॑यः॥ यत्पु॒रुषं॑ व्य॒दधुः। क॒ति॒धा व्य॑कल्पयन्। मुखं
कि॒मस्य॑ कौ बा॒हू। का॒वूरू पा॑दावुच्येते॥ ब्रा॒ह्म॒णोऽस्य॑
मुख॑मासीत्। बा॒हू रा॑ज॒न्यः कृ॒तः।

ऊ॒रू तद॑स्य॒ यद्वैश्यः॑। प॒द्भ्याँ शू॒द्रो अजा॑यत॥ च॒न्द्रमा॑
मन॑सो जा॒तः। चक्षोः॑ सू॒र्यो अजा॑यत। मु॒खादिन्द्र॑श्चा॒ग्निश्च॑।
प्रा॒णाद्वा॒युरा॑जायत॥ ना॒भ्या आ॑सीद॒न्तरि॑क्षम्। शी॒र्ष्णो
द्यौः सम॑वर्तत। प॒द्भ्यां भू॒मिर्दि॑शः श्रोत्रा॑त्। तथा॑ लो॒काँ
अ॑कल्पयन्॥

वेदा॒हमे॒तं पु॒रुषं॑ म॒हान्त॑म्। आ॒दि॒त्यव॑र्णं तम॑स॒स्तु
पा॒रे॥ सर्वा॑णि रू॒पाणि॑ वि॒चित्य॑ धी॒रः। ना॒मानि॑
कृ॒त्वाऽभि॑वदन् यदास्ते॑॥ धा॒ता पु॒रस्ता॑द्यमु॒दाज॑हार।
श॒क्रः प्रवि॑द्वान्प्रदि॒शश्च॑त॒स्रः। तमे॒वं वि॒द्वान॒मृतं॑ इ॒ह भ॑वति।

नान्यः पन्था अयनाय विद्यते॥ यज्ञेन यज्ञमयजन्त देवाः।
 तानि धर्माणि प्रथमान्यासन्। ते ह नाकं महिमानः सचन्ते।
 यत्र पूर्वे साध्याः सन्ति देवाः॥
 शिरसे स्वाहा॥



॥उत्तरनारायणम्॥

अद्भ्यः सम्भूतः पृथिव्यै रसाच्च। विश्वकर्मणः समवर्तताधि।
 तस्य त्वष्टा विदधद्रूपमेति। तत्पुरुषस्य विश्वमाजानमग्रे॥
 वेदाहमेतं पुरुषं महान्तम्। आदित्यवर्णं तमसः परस्तात्।
 तमेवं विद्वानमृतं इह भवति। नान्यः पन्था विद्यतेयऽनाय॥
 प्रजापतिश्चरति गर्भे अन्तः। अजायमानो बहुधा विजायते।
 तस्य धीराः परिजानन्ति योनिम्। मरीचीनां पदमिच्छन्ति
 वेधसः॥ यो देवेभ्य आतपति। यो देवानां पुरोहितः। पूर्वो यो
 देवेभ्यो जातः। नमो रुचाय ब्राह्मये॥ रुचं ब्राह्मं जनयन्तः।
 देवा अग्रे तदब्रुवन्। यस्त्वैवं ब्राह्मणो विद्यात्। तस्य देवा
 असन् वशे॥ ह्रीश्च ते लक्ष्मीश्च पत्न्यौ। अहोरात्रे पार्श्वे।
 नक्षत्राणि रूपम्। अश्विनौ व्यात्तम्। इष्टं मनिषाण। अमुं
 मनिषाण। सर्वं मनिषाण॥

शिखायै वषट्॥



॥अप्रतिरथम्॥

(तैत्तिरीयसंहितायां काण्डः - ४/प्रश्नः - ६/अनुवाकः - ४)

आशुः शिशानो वृषभो न युध्मो घनाघनः
 क्षोभेणश्चर्षणीनाम्। सङ्क्रन्दनोऽनिमिष एकवीरः शतं
 सेनां अजयत् साकमिन्द्रः। सङ्क्रन्दनेनानिमिषेण जिष्णुना
 युत्कारेण दुश्चवनेन धृष्णुना। तदिन्द्रेण जयत् तत्सहध्वं
 युधो नर इषुहस्तेन वृष्णा। स इषुहस्तैः सनिषङ्गिभिर्वशी
 सः स्रष्टा स युध इन्द्रो गुणेन। सः सृष्टजिह्वसोमपा
 बाहुशध्यूर्ध्वधन्वा प्रतिहिताभिरस्ता।

बृहस्पते परि दीया रथेन रक्षोहाऽमित्राः अपबाधमानः।
 प्रभञ्जन्त्सेनाः प्रमृणो युधा जयन्तस्माकमेध्यविता रथानाम्।
 गोत्रभिदं गोविदं वज्रबाहुं जयन्तमज्मं प्रमृणन्तमोजसा।
 इमं सजाता अनु वीरयध्वमिन्द्रः सखायोऽनु सः
 रभध्वम्। बलविज्ञायः स्थविरः प्रवीरः सहस्वान् वाजी
 सहमान उग्रः। अभिर्वीरो अभिसत्त्वा सहोजा जैत्रमिन्द्र
 रथमा तिष्ठ गोवित्। अभि गोत्राणि सहसा गाहमानोऽदायो
 वीरः शतमन्युरिन्द्रः।

दुश्चवनः पृतनाषाड्युध्योऽस्माकं सेनां अवतु प्र युध्सु।
 इन्द्र आसां नेता बृहस्पतिर्दक्षिणा यज्ञः पुर एतु सोमः।
 देवसेनानामभिभञ्जतीनां जयन्तीनां मरुतो यन्त्वग्रे। इन्द्रस्य
 वृष्णो वरुणस्य राज्ञ आदित्यानां मरुताः शर्ध उग्रम्।

म॒हाम॑न॒सां भुव॑नच्य॒वानां॑ घोषो॑ दे॒वानां॑ जय॑तामुद॒स्थात्।
अ॒स्माक॑मिन्द्रः॒ समृ॑तेषु ध्व॒जेष्व॒स्माकं॑ या इष॑वस्ता जय॑न्तु।

अ॒स्माकं॑ वी॒रा उत्त॑रे भव॑न्त्वस्मानु॑ देवा अवता॒ हवै॑षु।
उद्ध॑र्षय मघव॒न्नायु॑धान्युत् सत्त्वे॑नां माम॒कानां॑ महा॑सि।
उद्ध॑त्रहन् वा॒जिनां॑ वाजि॒नान्यु॑द्रथा॒नां जय॑तामेतु॒ घोषः॑। उप॒
प्रेत॑ जय॑ता नरः स्थि॒रा वः॑ सन्तु बा॒हवः॑। इन्द्रो॑ वः शर्म॑
यच्छ॑त्त्वनाधृष्या यथाऽस॑थ। अव॑सृष्टा॒ परा॑ पत॒ शर॑व्ये
ब्रह्म॑संशिता।

गच्छा॑मित्रान् प्रवि॑श॒ मैषां॑ कं च॒नोच्छि॑षः। मर्मा॑णि
ते॒ वर्म॑भिश्छादयामि॒ सोम॑स्त्वा॒ राजा॑ऽमृते॒नाभि॑वस्ताम्।
उ॒रोर्वरी॑यो वरि॑वस्ते अस्तु॒ जय॑न्तं त्वाम॑नु॒ मद॑न्तु दे॒वाः।
यत्र॑ बा॒णाः स॒म्पत॑न्ति कुमा॒रा वि॑शिखा इ॒वा इन्द्रो॑ न॒स्तत्र॑
वृ॒त्रहा॑ वि॒श्वाहा॑ शर्म॑ यच्छतु॥ कव॑चाय हुम्॥



॥प्रतिपूरुषम् (सं०)॥

(तेत्तिरीयसंहितायां काण्डः - १/प्रश्नः - ८/अनुवाकः - ६)

प्र॒ति॒पू॒रु॒षमे॑क॒कपा॒ला॒न्निर्व॑पत्ये॒कमति॑रिक्तं याव॑न्तो गृ॒ह्याः॑
स्म॒स्तेभ्यः॑ क॒म॒करं॑ पशूनां॑ शर्मा॑सि॒ शर्म॑ यज॑मानस्य
शर्म॑ मे य॒च्छैकं॑ ए॒व रु॒द्रो न॑ द्वितीयाय तस्थ आ॒खु॒स्तै
रु॒द्र प॒शुस्तं॑ जुष॒स्वैष॑ ते॒ रु॒द्र भा॒गः स॒ह स्व॒स्त्राऽम्बि॑कया॒

तं जुषस्व भेषजं गवेऽश्वाय पुरुषाय भेषजमथो अस्मभ्यं
 भेषजं सुभेषजं यथाऽसंति। सुगं मेषाय मेष्ट्या अवांम्ब
 रुद्रमदिमह्यव देवं त्र्यम्बकम्। यथा नः श्रेयसः करद्वथा नो
 वस्यसः करद्वथा नः पशुमतः करद्वथा नो व्यवसाययात्।
 त्र्यम्बकं यजामहे सुगन्धिं पुष्टिवर्धनम्। उर्वारुकमिव
 बन्धनान्मृत्योर्मुक्षीय माऽमृतात्॥ एष ते रुद्रभागस्तं जुषस्व
 तेनावसेन पुरो मूजवतोऽतीह्यवततधन्वा पिनाकहस्तः
 कृत्तिवासाः॥

॥प्रतिपूरुषम् (ब्रा०)॥

(तैत्तिरीयब्राह्मणे अष्टकं - १/प्रश्नः - ६/अनुवाकः - १०)

प्रतिपूरुषमेककपालान्निर्वपति। जाता एव प्रजा
 रुद्रान्निर्वदयते। एकमतिरिक्तम्। जनिष्यमाणा एव
 प्रजा रुद्रान्निर्वदयते। एककपाला भवन्ति। एकधैव रुद्रं
 निर्वदयते। नाभिघारयति। यदभिघारयेत्। अन्तरवचारिणं
 रुद्रं कुर्यात्। एकोल्मुकेन यन्ति। तद्धि रुद्रस्य भागधेयम्।
 इमां दिशं यन्ति। एषा वै रुद्रस्य दिक्। स्वायामेव दिशि
 रुद्रं निर्वदयते। रुद्रो वा अपशुकाया आहुत्यै नातिष्ठत।
 असौ ते पशुरिति निर्दिशेद्यं द्विष्यात्। यमेव द्वेष्टि। तमस्मै
 पशुं निर्दिशति। यदि न द्विष्यात्। आखुस्ते पशुरिति
 ब्रूयात्। न ग्राम्यान् पशून् हिनस्ति। नारण्यान्। चतुष्पथे

जुहोति। एष वा अंग्रीनां पङ्क्तिशो नाम। अग्नित्वेव
 जुहोति। मध्यमेन पर्णेन जुहोति। सुगध्यैषा। अथो खलु।
 अन्तमेनैव होतव्यम्। अन्त एव रुद्रं निरवदयते। एष ते
 रुद्र भागः सह स्वस्त्राऽम्बिकयेत्याह। शरद्वा अस्याम्बिका
 स्वसा। तथा वा एष हिनस्ति। यः हिनस्ति। तयैवैनः
 सह शमयति। भेषजं गव इत्याह। यावन्त एव ग्राम्याः
 पशवः। तेभ्यो भेषजं करोति। अवाम्ब रुद्रमदिमहीत्याह।
 आशिषमेवैतामाशास्ते। त्र्यम्बकं यजामह इत्याह।
 मृत्योर्मुक्षीय माऽमृतादिति वावैतदाह। उत्किरन्ति। भगस्य
 लीप्सन्ते। मूते कृत्वाऽऽसंजन्ति। यथा जनं यतेऽवसं
 करोति। तादृगेव तत्। एष ते रुद्र भाग इत्याह निरवत्यै।
 अप्रतीक्षमायन्ति। अपः परिषिञ्चति। रुद्रस्यान्तरहित्यै।
 प्र वा एतेऽस्माल्लोकाच्च्यवन्ते। ये त्र्यम्बकैश्चरन्ति। आदित्यं
 चरुं पुनरेत्य निर्वपति। इयं वा अदितिः। अस्यामेव
 प्रतितिष्ठन्ति।

नेत्रत्रयाय वौषट्॥



॥शतरुद्रीयम् (सं०)॥

(तैत्तिरीयसंहितायां काण्डः - १/प्रश्नः - ३/अनुवाकः - १४)

त्वमग्रे रुद्रो असुरो महो दिवस्त्वः शर्धो मारुतं पृक्ष
 ईशिषे। त्वं वातैररुणैर्यासि शङ्खयस्त्वं पूषा विधुतः पांसि नु

त्मना॑। आ वो॒ राजा॑नमध्व॒रस्य॑ रु॒द्रः॑ होता॑रः॑ सत्य॒यज॑ः॑
 रोद॑स्योः। अ॒ग्निं पु॒रा त॑नयि॒त्नोर॒चित्ता॒द्धिर॑ण्यरूपमवसे
 कृणु॑ध्वम्। अ॒ग्निर्होता॑ नि ष॑सादा॒ यजी॑यानुपस्थे॒ मातुः॑
 सु॒रभा॑वुं लो॒के। युवा॑ क॒विः पु॑रुनिष्ठ ऋ॒तावा॑ ध॒र्ता
 कृ॑ष्टीनामु॒त मध्य॑ इ॒द्धः।

सा॒ध्वीम॑क॒र्देव॑वी॒तिं नो॑ अ॒द्य य॒ज्ञस्य॑ जि॒ह्वा॒मवि॑दाम्
 गु॒ह्या॑म्। स आ॒युरा॒ङ्गात्सु॑रभिर्वसा॒नो भ॒द्राम॑क॒र्देव॑हू॒तिं नो॑
 अ॒द्य। अ॒क्र॒न्दद॒ग्निः स्त॒नय॑न्निव॒ द्यौः क्षा॒मा रे॒रिह॑द्वी॒रुधः॑
 सम॒ञ्ज॒न्। स॒द्यो ज॑ज्ञा॒नो वि॑ हीमि॒द्धो अ॒ख्य॒दा रोद॑सी
 भा॒नुना॑ भात्य॒न्तः। त्वे व॑सू॒नि पु॒र्वणी॑क हो॒तर्दो॑षा व॒स्तो॒रेरि॑रे
 य॒ज्ञिया॑सः।

क्षामे॑व वि॒श्वा भु॑वनानि॒ यस्मि॑न्त्सः॑ सौभ॑गानि दधिरे
 पा॑वके। तुभ्यं॒ ता अ॑ङ्गिरस्तम॒ विश्वाः॑ सु॒क्षित॑यः पृथ॑क्।
 अ॒ग्ने का॑मा॒य येमि॑रे। अ॒श्याम॑ तं का॒मम॑ग्ने तवो॒त्यश्या॑मं
 र॒यिः र॑यिवः सु॒वीर॑म्। अ॒श्याम॑ वा॒जम॑भि वा॒जय॑न्तोऽश्या॑मं
 द्यु॒म्नम॑जराऽज॒रन्ते॑। श्रेष्ठं॑ यविष्ठ भा॒रता॑ऽग्ने॑ द्यु॒मन्त॑मा भ॑र।

वसो॑ पु॒रुस्पृ॑हः॑ र॒यिम्। स श्वि॑तानस्त॒न्यतू॑ रो॒चन॑स्था
 अ॒जरे॑भिर्नान॒दद्भि॑र्यविष्ठः। यः पा॑वकः पु॒रुत॑मः पु॒रूणि॑
 पृ॒थून्य॑ग्नि॒रनु॑याति भ॒र्वन्। आयु॑ष्टे वि॒श्वतो॑ दध॒दय॑म॒ग्निर्वरे॑ण्यः।
 पु॒नस्ते प्रा॑ण आ॒य॑ति॒ परा॑ यक्ष्मः॑ सु॒वामि॑ ते। आ॒युर्दा॑ अ॒ग्ने
 ह॒विषो॑ जुषा॒णो घृ॒तप्र॑तीको घृ॒तयो॑निरेधि। घृ॒तं पी॒त्वा मधु॑

चारु॒ गव्यं॑ पि॒तेव॑ पु॒त्रम॒भिर॑क्षतादि॒मम्।

तस्मै॑ ते प्रति॒हर्यते॑ जा॒तवे॑दो विच॑र॒षणे। अ॒ग्ने जना॑मि
सुष्टु॑तिम्। दि॒वस्परि॑ प्रथ॒मं ज॑ज्ञे अ॒ग्निर॒स्मद्वि॑तीयं॒ परि॑
जा॒तवे॑दाः। तृ॒तीयम॑प्सु नृम॒णा अ॑ज॒स्रमि॒न्धान॑ ए॒नं
जर॑ते स्वा॒धीः। शुचिः॑ पाव॒क व॒न्द्योऽग्ने॑ बृ॒हद्वि॑रोच॒से। त्वं
घृ॒तेभि॒राहु॑तः। दृ॒शानो॑ रु॒क्म उ॒र्व्या व्य॑द्यौ॒द्गुर्म॑र॒षमा॑युः श्रि॒ये
रु॒चानः॑। अ॒ग्निर॒मृतो॑ अभ॒वद्व॒योभि॒र्यदे॑नं॒ द्यौर॑ज॒नय॑त्सु॒रेताः॑।

आ य॒दिषे॑ नृ॒पतिं॑ तेज॒ आन॑द्बु॒चि रे॒तो निषि॑क्तं॒ द्यौर॒भीकै॑।
अ॒ग्निः श॑र्ध॒मन॑व॒द्यं यु॒वानं॑ स्वा॒धियं॑ ज॒नय॑त्सू॒दय॑च्च। स
ते॒जीय॑सा॒ मन॑सा॒ त्वोत॑ उ॒त शि॑क्ष॒ स्वप॑त्यस्य॒ शि॒क्षोः। अ॒ग्ने
रा॒यो नृ॑त॒मस्य॑ प्र॒भूतो॑ भू॒याम॑ ते सुष्टु॒तय॑श्च॒ वस्वः॑। अ॒ग्ने
सह॑न्त॒मा भ॑र द्यु॒मस्य॑ प्रा॒सहा॑ र॒यिम्।

वि॒श्वा यश्च॑र॒षणी॒रभ्या॑सा वा॒जेषु॑ सा॒सह॑त्। तम॑ग्ने पृ॒तना॒
सह॑ः र॒यिः सह॑स्व॒ आ भ॑र। त्वं॑ हि स॒त्यो अ॒द्भुतो॑
दा॒ता वा॑ज॒स्य गो॑म॒तः। उ॒क्षान्ना॑य व॒शान्ना॑य सोम॑पृ॒ष्ठाय॑
वे॒धसे॑। स्तोमैर्वि॑धेमा॒ग्नये॑। व॒द्म हि सू॒नो अ॒स्यद्व॑सद्वा च॒क्रे
अ॒ग्निर्ज॑नुषाऽज्माऽन्न॑म्। स त्वं न॑ ऊ॒र्जस॑न् ऊ॒र्ज धा॑ रा॒जेव॑
जे॒रवृ॑के क्षे॒ष्यन्तः॑।

अ॒ग्न आ॒यूषि॑ पव॒स आ सु॒वोर्ज॑मिषं च नः॑। आ॒रे
बा॑धस्व दु॒च्छुना॑म्। अ॒ग्ने पव॑स्व॒ स्वपा॑ अ॒स्मे वर्चः॑ सु॒वीर्य॑म्।

दध॒त्पोष॑ꣳ र॒यिं म॒यि। अ॒ग्नें पा॒वक॑ रो॒चिषा॑ म॒न्द्रया॑ दे॒व
जि॒ह्वाया॑। आ दे॒वान् व॑क्षि॒ यक्षि॑ च। स नः॑ पा॒वक॑ दी॒दिवोऽग्ने॑
दे॒वाꣳ इ॒हाऽऽव॑ह। उ॒प य॒ज्ञꣳ ह॒विश्च॑ नः। अ॒ग्निः शु॒चिं
व्र॒तत॑मः शु॒चिर्वि॒प्रः शु॒चिः क॒विः। शु॒चीं रो॒चत॑ आ॒हुतः॑। उ॒द॒ग्ने
शु॒चय॑स्त॒व शु॒क्रा भ्रा॑जन्त ई॒रते॑। त॒व ज्योती॑ꣳष्य॒र्चयः॑॥

॥ शतरुद्रीयम् (ब्रा०) ॥

(तैत्तिरीयब्राह्मणे काठके प्रश्नः - २/अनुवाकः - २)

त्वम॑ग्ने रु॒द्रो अ॒सुरो॑ म॒हो दि॒वः। त्वꣳ श॒र्धो मा॑रु॒तं
पृ॒क्ष ई॑शिषे। त्वं वा॒तैर॒रुणै॑र्या॒सि श॑ङ्ग॒यः। त्वं पू॒षा वि॑ध॒तः
पा॑सि॒ नु त्म॑ना। दे॒वा दे॒वेषु॑ श्रय॒ध्वम्। प्रथ॑मा द्वि॒तीये॑षु
श्रय॒ध्वम्। द्वि॒तीया॑स्तृ॒तीये॑षु श्रय॒ध्वम्। तृ॒तीया॑श्चतु॒र्थेषु॑
श्रय॒ध्वम्। च॒तुर्थाः प॑ञ्च॒मेषु॑ श्रय॒ध्वम्। प॒ञ्च॒माः ष॒ष्ठेषु॑
श्रय॒ध्वम्॥ ष॒ष्ठाः स॑प्त॒मेषु॑ श्रय॒ध्वम्। स॑प्त॒मा अ॑ष्ट॒मेषु॑
श्रय॒ध्वम्। अ॒ष्ट॒मा न॑व॒मेषु॑ श्रय॒ध्वम्। न॑व॒मा द॑श॒मेषु॑
श्रय॒ध्वम्। द॑श॒मा ए॑काद॒शेषु॑ श्रय॒ध्वम्। ए॒का॒द॒शा द्वा॑द॒शेषु॑
श्रय॒ध्वम्। द्वा॒द॒शा त्रयो॑द॒शेषु॑ श्रय॒ध्वम्। त्रयो॑द॒शाश्चतु॑र्द॒शेषु॑
श्रय॒ध्वम्। च॒तुर्द॑शाः प॑ञ्चद॒शेषु॑ श्रय॒ध्वम्। प॒ञ्च॒द॒शाः
षोड॑शेषु॑ श्रय॒ध्वम्॥ षोड॑शाः स॑प्तद॒शेषु॑ श्रय॒ध्वम्।
स॑प्तद॒शा अ॑ष्टाद॒शेषु॑ श्रय॒ध्वम्। अ॒ष्टा॒द॒शा ए॑कान्न॒विꣳशेषु॑
श्रय॒ध्वम्। ए॒का॒न्न॒विꣳशा विꣳशेषु॑ श्रय॒ध्वम्। विꣳशा
ए॑क॒विꣳशेषु॑ श्रय॒ध्वम्। ए॒क॒विꣳशा द्वा॑विꣳशेषु॑ श्रय॒ध्वम्।

द्वाविंशसंयोजितेषु श्रयध्वम्। त्रयोविंशश्चतुर्विंशेषु
 श्रयध्वम्। चतुर्विंशः पञ्चविंशेषु श्रयध्वम्। पञ्चविंशः
 षड्विंशेषु श्रयध्वम्॥ षड्विंशः सप्तविंशेषु श्रयध्वम्।
 सप्तविंशा अष्टविंशेषु श्रयध्वम्। अष्टविंशा
 ऐकान्तत्रिंशेषु श्रयध्वम्। ऐकान्तत्रिंशस्त्रिंशेषु
 श्रयध्वम्। त्रिंशा ऐकत्रिंशेषु श्रयध्वम्। ऐकत्रिंशा
 द्वात्रिंशेषु श्रयध्वम्। द्वात्रिंशस्त्रिंशस्त्रिंशेषु श्रयध्वम्।
 देवास्त्रिंशैकादशास्त्रिंशस्त्रिंशः। उत्तरे भवत। उत्तरवर्त्मान्
 उत्तरसत्त्वानः। यत्काम इदं जुहोमि। तन्मे समृध्यताम्।
 वयं स्याम पतयो रयीणाम्। भूर्भुवः स्वः स्वाहा॥
 ॐ भूर्भुवस्सुवरोमिति दिग्बन्धः॥ अस्त्राय फट्॥

॥ पञ्चाङ्गम् ॥

हंसः शुचिषद्वसुरन्तरिक्षसद्धोता वेदिषदतिथिर्दुरोणसत्।
 नृषद्वरसदृत्सद्धोमसदब्जा गोजा ऋतजा अद्रिजा ऋतं
 बृहत्॥

प्रतद्विष्णुः स्तवते वीर्याय। मृगो न भीमः कुचरो गिरिष्ठाः।
 यस्योरुषु त्रिषु विक्रमणेषु। अधिक्षियन्ति भुवनानि विश्वा॥

त्र्यम्बकं यजामहे सुगन्धिं पुष्टिवर्धनम्।
 उर्वारुकमिव बन्धनान्मृत्योर्मुक्षीय माऽमृतात्॥

तथ्सवितुर्वृणीमहे। वयं देवस्य भोजनम्।
 श्रेष्ठं सर्वधातमम्। तुरं भगस्य धीमहि॥

विष्णुर्योनिं कल्पयतु। त्वष्टां रूपाणि पिंशतु।
आसिंश्चतु प्रजापतिः। धाता गर्भं दधातु ते॥



॥ अष्टाङ्ग-नमस्काराः ॥

हिरण्यगर्भः समवर्तताग्रे भूतस्य जातः पतिरेकं आसीत्।
सदाधार पृथिवीं द्यामुतेमां कस्मै देवाय हविषा विधेम॥
[उरसा] उमामहेश्वराभ्यां नमः॥१॥

यः प्राणतो निमिषतो महित्वैक इद्राजा जगतो बभूव।
य ईशे अस्य द्विपदश्चतुष्पदः कस्मै देवाय हविषा विधेम॥
[शिरसा] उमामहेश्वराभ्यां नमः॥२॥

ब्रह्मजज्ञानं प्रथमं पुरस्ताद्विसीमतः सुरुचो वेन आवः।
सबुध्रिया उपमा अस्य विष्टाः सतश्च योनिमसतश्च विवः॥१॥
[दृष्ट्या] उमामहेश्वराभ्यां नमः॥३॥

मही द्यौः पृथिवी च न इमं यज्ञं मिमिक्षताम्। पिपृतान्नो
भरीमभिः॥

[मनसा] उमामहेश्वराभ्यां नमः॥४॥

उपश्वासय पृथिवीमुत द्यां पुरुत्रा ते मनुतां विष्टितं जगत्।
स दुन्दुभे सजूरिन्द्रेण देवैर्दूराद्वीयो अपसेधु शत्रून्॥
[वचसा] उमामहेश्वराभ्यां नमः॥५॥

अग्ने नय सुपथा राये अस्मान् विश्वानि देव वयुनानि

विद्वान्। युयो॒ध्यस्म॑ञ्जु॒हुरा॒णमे॒नो भूयि॑ष्ठां ते॒ नम॑ उ॒क्तिं वि॒धेम॥
[पञ्चाम्] उमामहेश्वराभ्यां नमः॥६॥

या ते॑ अ॒ग्ने रु॒द्रिया॑ त॒नूस्तया॑ नः पाहि॒ तस्या॑स्ते॒ स्वाहा॑॥
[कराभ्याम्] उमामहेश्वराभ्यां नमः॥७॥

इ॒मं य॑मप्र॒स्तर॑माहि॒ सीदा॑ऽङ्गि॒रोभिः पि॒तृभिः संवि॑दानः।
आत्वा॒ मन्त्राः॑ कवि॒शुस्ता॑ व॒हन्त्वे॒ना रा॑जन् ह॒विषा॑ मादयस्व॥
[कर्णाभ्याम्] उमामहेश्वराभ्यां नमः॥८॥



॥लघुन्यासे श्री-रुद्रध्यानम्॥

अथाऽऽत्मानं शिवात्मानं श्री-रुद्र रूपं ध्यायेत्॥
शुद्धस्फटिकसङ्काशं त्रिनेत्रं पञ्चवक्त्रकम्।
गङ्गाधरं दशभुजं सर्वाभरणभूषितम्॥
नीलग्रीवं शशाङ्काङ्कं नागयज्ञोपवीतिनम्।
व्याघ्रचर्मोत्तरीयं च वरेण्यमभयप्रदम्॥
कमण्डल्वक्षसूत्राणां धारिणं शूलपाणिनम्।
ज्वलन्तं पिङ्गलजटाशिखामुद्योतधारिणम्॥
वृषस्कन्धसमारूढम् उमादेहार्धधारिणम्।
अमृते नाप्नुतं शान्तं दिव्यभोगसमन्वितम्॥
दिग्देवता समायुक्तं सुरासुरनमस्कृतम्।
नित्यं च शाश्वतं शुद्धं ध्रुवमक्षरमव्ययम्॥
सर्वव्यापिनमीशानं रुद्रं वै विश्वरूपिणम्॥

एवं ध्यात्वा द्विजः सम्यक् ततो यजनमारभेत्॥

अथातो रुद्र स्नानार्चनाभिषेकविधिं व्याख्यास्यामः।
आदित एव तीर्थे स्नात्वा उदेत्य शुचिः प्रयतो ब्रह्मचारी
शुक्लवासा ईशानस्य प्रतिकृतिं कृत्वा तस्य दक्षिणप्रत्यग्देशे
देवाभिमुखः स्थित्वा आत्मनि देवताः स्थापयेत्॥

॥लघुन्यासे देवता-स्थापनम्॥

प्रजनने ब्रह्मा तिष्ठतु। पादयोर्विष्णुस्तिष्ठतु। हस्तयोर्हरस्तिष्ठतु।
बाह्वोरिन्द्रस्तिष्ठतु। जठरे अग्निस्तिष्ठतु। हृदये शिवस्तिष्ठतु।
कण्ठे वसवस्तिष्ठन्तु। वक्त्रे सरस्वती तिष्ठतु। नासिकयोर्-
वायुस्तिष्ठतु। नयनयोश्चन्द्रादित्यौ तिष्ठेताम्। कर्णयोरश्विनौ
तिष्ठेताम्। ललाटे रुद्रास्तिष्ठन्तु। मूर्ध्यादित्यास्तिष्ठन्तु।
शिरसि महादेवस्तिष्ठतु। शिखायां वामदेवस्तिष्ठतु।
पृष्ठे पिनाकी तिष्ठतु। पुरतः शूली तिष्ठतु। पार्श्वयोः
शिवाशङ्करौ तिष्ठेताम्। सर्वतो वायुस्तिष्ठतु। ततो बहिः
सर्वतोऽग्निज्वालामाला-परिवृतस्तिष्ठतु। सर्वेष्वङ्गेषु सर्वा
देवता यथास्थानं तिष्ठन्तु। मां रक्षन्तु। [सर्वान् महाजनान्
सकुटुम्बं रक्षन्तु॥]

अ॒ग्नि॒र्मे वा॒चि श्रि॒तः। वा॒ग्धृ॒दये। हृ॒दयं॑ मयि॑। अ॒हम॒मृतै॑।
अ॒मृतं॑ ब्रह्म॑णि। (जिह्वा)

वा॒युर्मे प्रा॒णे श्रि॒तः। प्रा॒णो हृ॒दये। हृ॒दयं॑ मयि॑। अ॒हम॒मृतै॑।
अ॒मृतं॑ ब्रह्म॑णि। (नासिका)

सूर्यो मे चक्षुषि श्रितः। चक्षुरहृदये। हृदयं मयि।
 अहममृतै। अमृतं ब्रह्मणि। (नेत्रे)
 चन्द्रमा मे मनसि श्रितः। मनो हृदये। हृदयं मयि।
 अहममृतै। अमृतं ब्रह्मणि। (वक्षः)
 दिशो मे श्रोत्रे श्रिताः। श्रोत्रं हृदये। हृदयं मयि।
 अहममृतै। अमृतं ब्रह्मणि। (श्रोत्रे)
 आपो मे रेतसि श्रिताः। रेतो हृदये। हृदयं मयि।
 अहममृतै। अमृतं ब्रह्मणि। (गुह्यम्)
 पृथिवी मे शरीरे श्रिता। शरीरं हृदये। हृदयं मयि।
 अहममृतै। अमृतं ब्रह्मणि। (शरीरम्)
 ओषधिवनस्पतयो मे लोमसु श्रिताः। लोमानि हृदये।
 हृदयं मयि। अहममृतै। अमृतं ब्रह्मणि। (लोमानि)
 इन्द्रो मे बले श्रितः। बलं हृदये। हृदयं मयि। अहममृतै।
 अमृतं ब्रह्मणि। (बाहू)
 पर्जन्यो मे मूर्ध्नि श्रितः। मूर्धा हृदये। हृदयं मयि।
 अहममृतै। अमृतं ब्रह्मणि। (शिरः)
 ईशानो मे मन्यौ श्रितः। मन्युरहृदये। हृदयं मयि।
 अहममृतै। अमृतं ब्रह्मणि। (हृदयम्)
 आत्मा मे आत्मनि श्रितः। आत्मा हृदये। हृदयं मयि।
 अहममृतै। अमृतं ब्रह्मणि। (हृदयम्)
 पुनर्म आत्मा पुनरायुरागात्। पुनः प्राणः पुनराकूतमागात्।

वैश्वान॒रो र॒श्मिभि॑र्वावृ॒धानः॑। अ॒न्तस्ति॑ष्ठत्व॒मृत॑स्य गो॒पाः॥
(सर्वा॑ण्यङ्गानि संस्पृश्य स्थापनं कृत्वा मानसैराराधयेत्॥)



॥आत्मपूजा॥

आराधितो मनुष्यैस्त्वं सिद्धैर्देवासुरादिभिः।

आराधयामि भक्त्या त्वाऽनुग्रहाण महेश्वर॥

॥कलशेषु साम्बपरमेश्वर ध्यानम्॥

ध्यायेन्निरामयं वस्तुं सर्गस्थितिलयादिकम्।

निर्गुणं निष्कलं नित्यं मनोवाचामगोचरम्॥१॥

गङ्गाधरं शशिधरं जटामकुटशोभितम्।

श्वेतभूतित्रिपुण्ड्रेण विराजितललाटकम्॥२॥

लोचनत्रयसम्पन्नं स्वर्णकुण्डलशोभितम्।

स्मेराननं चतुर्बाहुं मुक्ताहारोपशोभितम्॥३॥

अक्षमालां सुधाकुम्भं चिन्मयीं मुद्रिकामपि।

पुस्तकं च भुजैर्दिव्यैर्दधानं पार्वतीपतिम्॥४॥

श्वेताम्बरधरं श्वेतं रत्नसिंहासनस्थितम्।

सर्वाभीष्टप्रदातारं वटमूलनिवासिनम्॥५॥

वामाङ्कसंस्थितां गौरीं बालार्कायुतसन्निभाम्।

जपाकुसुमसाहस्रसमानश्रियमीश्वरीम् ।

सुवर्णरत्नखचितमकुटेन विराजिताम्॥६॥

ललाटपट्टसंराजत्संलग्नतिलकाञ्चिताम् ।
 राजीवायतनेत्रान्तां नीलोत्पलदलेक्षणाम् ॥ ७ ॥
 सन्तप्तहेमखचित-ताटङ्काभरणान्विताम् ।
 ताम्बूलचर्वणरतरक्तजिह्वाविराजिताम् ॥ ८ ॥
 पताकाभरणोपेतां मुक्ताहारोपशोभिताम् ।
 स्वर्णकङ्कणसंयुक्तैश्चतुर्भिर्बाहुभिर्युताम् ॥ ९ ॥
 सुवर्णरत्नखचित-काञ्चीदामविराजिताम् ।
 कदलीललितस्तम्भ-सन्निभोरुयुगान्विताम् ॥ १० ॥
 श्रिया विराजितपदां भक्तत्राणपरायणाम् ।
 अन्योन्याश्लिष्टहृद्वाहू गौरीशङ्करसंज्ञकम् ॥ ११ ॥
 सनातनं परं ब्रह्म परमात्मानमव्ययम् ।
 आवाहयामि जगतामीश्वरं परमेश्वरम् ॥ १२ ॥
 मङ्गलायतनं देवं युवानमति सुन्दरम् ।
 ध्यायेत्कल्पतरुर्मूले सुखासीनं सहोमया ॥ १३ ॥
 आगच्छाऽऽगच्छ भगवन् देवेश परमेश्वर ।
 सच्चिदानन्द भूतेश पार्वतीश नमोऽस्तु ते ॥ १४ ॥



॥ षोडशोपचार पूजा ॥

नमस्ते रुद्र मन्यव उतो त इषवे नमः । नमस्ते अस्तु
 धन्वने बाहुभ्यामुत ते नमः ॥ ॐ ह्रीं नमः शिवाय । सद्योजातं
 प्रपद्यामि ।

या त॒ इषुः शि॒वत॑मा शि॒वं ब॒भूव॑ ते॒ धनुः॑ । शि॒वा शं॒ख्यां या॑
तव॒ तया॑ नो रु॒द्र मृ॒डय॑ ॥ ॐ ह्रीं न॒मः शि॒वाय॑ । स॒द्योजा॒ताय॑
वै नमो॒ नमः॑ । आ॒सनं॑ स॒मर्प॑यामि ॥ २ ॥

या ते॑ रु॒द्र शि॒वा त॒नूर॑घो॒राऽपा॑पकाशिनी । तया॑ नस्त॒नुवा॑
शन्त॑मया॒ गिरि॑शन्ता॒भिचा॑कशीहि ॥ ॐ ह्रीं न॒मः शि॒वाय॑ । भ॒वे
भ॒वे ना॒ति भ॒वे भ॒वस्व॒ माम् । पा॒दयोः॑ पा॒द्यं स॒मर्प॑यामि ॥ ३ ॥

यामिषुं॑ गिरि॒शन्त॒ हस्ते॒ बिभ॑र्ष्यस्त॒वे । शि॒वां गिरि॑त्र॒ तां
कुरु॒ मा हिं॑सीः पु॒रुषं॑ जग॑त् ॥ ॐ ह्रीं न॒मः शि॒वाय॑ ।
भ॒वोद्भ॑वाय॒ नमः॑ ॥ अ॒र्घ्यं स॒मर्प॑यामि ॥ ४ ॥

शि॒वेन॑ वच॑सा त्वा॒ गिरि॑शाच्छा॒वदाम॑सि । यथा॑ नः
सर्व॑मि॒ज्जग॑दय॒क्ष्मं सु॒मना॑ अस॑त् ॥ ॐ ह्रीं न॒मः शि॒वाय॑ ।
वा॒मदे॒वाय॑ नमः॑ । आ॒चम॑नीयं स॒मर्प॑यामि ॥ ५ ॥

अ॒ध्य॒वोच॑दधि॒वक्ता॑ प्र॒थ॒मो दै॒व्यो भि॑षक् । अही॑श्च
सर्वा॑ञ्ज॒म्भय॒न्त्सर्वा॑श्च या॒तुधा॒न्यः ॥ ॐ ह्रीं न॒मः शि॒वाय॑ ।
ज्ये॒ष्ठाय॑ नमः॑ । मधु॒पर्कं॑ स॒मर्प॑यामि ॥ ६ ॥

अ॒सौ यस्ता॒म्रो अ॒रुण॑ उ॒त ब॒भ्रुः सु॑म॒ङ्गलः॑ । ये चे॒मां रु॒द्रा
अ॒भितो॑ दि॒क्षु श्रि॒ताः स॑हस्र॒शोऽवै॑षां॒ हेड॑ ईमहे ॥ ॐ ह्रीं
न॒मः शि॒वाय॑ । श्रे॒ष्ठाय॑ नमः॑ । स्ना॒नं स॒मर्प॑यामि । स्ना॒नान॑न्तरम्
आ॒चम॑नीयं स॒मर्प॑यामि ॥ ७ ॥

अ॒सौ योऽव॑स॒र्पति॑ नील॑ग्रीवो॒ विलो॑हितः । उ॒तैनं॑ गो॒पा
अ॒दृश॑न्न॒दृश॑न्नुद॒हार्यः॑ । उ॒तैनं॑ वि॒श्वा भू॑तानि॒ स दृ॒ष्टो मृ॒डया॑ति

नः॥ ॐ ह्रीं नमः शिवाय। रुद्राय नमः। वस्त्रोत्तरीयं
समर्पयामि॥८॥

नमो अस्तु नीलग्रीवाय सहस्राक्षाय मीढुषे। अथो ये
अस्य सत्त्वानोऽहं तेभ्योऽकरं नमः॥ ॐ ह्रीं नमः शिवाय।
कालाय नमः। यज्ञोपवीताभरणानि समर्पयामि॥९॥

प्र मुञ्च धन्वन्स्त्वमुभयोरार्त्तियोज्याम्। याश्च ते हस्त
इषवः परा ता भगवो वप॥ ॐ ह्रीं नमः शिवाय।
कलविकरणाय नमः। दिव्यपरिमलगन्धान् धारयामि।
गन्धस्योपरि अक्षतान् समर्पयामि॥१०॥

अवतत्य धनुस्त्वः सहस्राक्ष शतैषुधे। निशीर्य शल्यानां
मुखा शिवो नः सुमना भव॥ ॐ ह्रीं नमः शिवाय।
बलविकरणाय नमः। पुष्पैः पूजयामि॥११॥

ॐ भवाय देवाय नमः। ॐ शर्वाय देवाय नमः। ॐ
ईशानाय देवाय नमः। ॐ पशुपतये देवाय नमः। ॐ रुद्राय
देवाय नमः। ॐ उग्राय देवाय नमः। ॐ भीमाय देवाय
नमः। ॐ महते देवाय नमः॥ ॐ भवस्य देवस्य पत्न्यै नमः।
ॐ शर्वस्य देवस्य पत्न्यै नमः। ॐ ईशानस्य देवस्य पत्न्यै
नमः। ॐ पशुपतेर्देवस्य पत्न्यै नमः। ॐ रुद्रस्य देवस्य पत्न्यै
नमः। ॐ उग्रस्य देवस्य पत्न्यै नमः। ॐ भीमस्य देवस्य
पत्न्यै नमः। ॐ महतो देवस्य पत्न्यै नमः॥

विज्यं धनुः कपर्दिनो विशल्यो बाणवाः उत। अनेशन्न-

स्येषव आभुरस्य निषङ्गथिः॥ ॐ ह्रीं नमः शिवाय। बलाय नमः। धूपमाघ्रापयामि॥१२॥

या ते हेतिर्मीदुष्टम् हस्ते बभूव ते धनुः। तयाऽस्मान् विश्वतस्त्वमयक्ष्मया परिभुज॥ ॐ ह्रीं नमः शिवाय। बलप्रमथनाय नमः। अलङ्कारदीपं सन्दर्शयामि॥१३॥

ॐ भूर्भुवः सुवः। + ब्रह्मणे स्वाहा। नमस्ते अस्त्वायुधायानां तताय धृष्णवे। उभाभ्यामुत ते नमो बाहुभ्यां तव धन्वने॥ ॐ ह्रीं नमः शिवाय। सर्वभूतदमनाय नमः। () निवेदयामि। मध्ये मध्ये अमृतपानीयं समर्पयामि। अमृतापिधानमसि।

हस्तप्रक्षालनं समर्पयामि। पादप्रक्षालनं समर्पयामि। निवेदनानन्तरम् आचमनीयं समर्पयामि॥१४॥

परि ते धन्वनो हेतिरस्मान्वृणक्तु विश्वतः। अथो य इषुधिस्तवाऽऽरे अस्मन्नि धेहि तम्॥ ॐ ह्रीं नमः शिवाय। मनोन्मनाय नमः। कर्पूरताम्बूलं समर्पयामि॥१५॥

नमस्ते अस्तु भगवन् विश्वेश्वराय महादेवाय त्र्यम्बकाय त्रिपुरान्तकाय त्रिकाग्निकालाय कालाग्निरुद्राय नीलकण्ठाय मृत्युञ्जयाय सर्वेश्वराय सदाशिवाय श्रीमन्महादेवाय नमः॥ कर्पूरनीराजनं दर्शयामि॥१६॥

॥ रक्षा ॥

बृहत्सामं क्षत्रभृद्वृद्ध वृष्णियं त्रिष्टुभौजः शुभितमुग्रवीरम्।

इन्द्रस्तोमेन पञ्चदशेन मध्यमिदं वातेन सगरेण रक्ष॥
रक्षां धारयामि॥



॥श्रीरुद्रनाम त्रिशती॥

नमो हिरण्यबाहवे नमः। सेनान्यै नमः।
दिशां च पतये नमः। नमो वृक्षेभ्यो नमः।
हरिकेशेभ्यो नमः। पशूनां पतये नमः।
नमः सस्पर्शराय नमः। त्विषीमते नमः।
पृथीनां पतये नमः। नमो बभ्रुशाय नमः।
विव्याधिने नमः। अन्नानां पतये नमः।
नमो हरिकेशाय नमः। उपवीतिने नमः।
पुष्टानां पतये नमः। नमो भवस्य हेतुये नमः।
जगतां पतये नमः। नमो रुद्राय नमः।
आतताविने नमः। क्षेत्राणां पतये नमः।
नमः सूताय नमः। अहन्त्याय नमः।
वनानां पतये नमः। नमो रोहिताय नमः।
स्थपतये नमः। वृक्षाणां पतये नमः।
नमो मन्त्रिणे नमः। वाणिजाय नमः।
कक्षाणां पतये नमः। नमो भुवन्तये नमः।
वारिवस्कृताय नमः। ओषधीनां पतये नमः।
नम उच्चैर्घोषाय नमः। आक्रन्दयते नमः।

प॒त्ती॒नां पत॑ये नमः॑। नमः॑ कृ॒त्स्न॒वी॒ताय॒ नमः॑।
धा॒व॒न्ते नमः॑। स॒त्त्व॒नां पत॑ये नमः॑॥

नमः॑ स॒ह॒मा॒नाय॒ नमः॑। नि॒व्या॒धि॒ने नमः॑।
आ॒व्या॒धि॒नी॒नां पत॑ये नमः॑। नमः॑ क॒कु॒भा॒य॒ नमः॑।
नि॒ष॒ङ्गि॒णे नमः॑। स्ते॒ना॒नां पत॑ये नमः॑।
नमो॑ नि॒ष॒ङ्गि॒णे नमः॑। इ॒षु॒धि॒म॒ते नमः॑।
त॒स्क॒रा॒णां पत॑ये नमः॑। नमो॑ व॒श्व॒ते नमः॑।
प॒रि॒व॒श्व॒ते नमः॑। स्ता॒यू॒नां पत॑ये नमः॑।
नमो॑ नि॒चे॒र॒वे नमः॑। प॒रि॒च॒रा॒य॒ नमः॑।
अ॒र॒ण्या॒नां पत॑ये नमः॑। नमः॑ सू॒का॒वि॒भ्यो नमः॑।
जि॒घा॒ँस॒द्भ्यो नमः॑। मु॒ष्ण॒तां पत॑ये नमः॑।
नमो॑ऽसि॒म॒द्भ्यो नमः॑। न॒क्तं च॒र॒द्भ्यो नमः॑।
प्र॒कृ॒न्ता॒नां पत॑ये नमः॑। नम॑ उ॒ष्णी॒षि॒ने नमः॑।
गि॒रि॒च॒रा॒य॒ नमः॑। कु॒लु॒श्वा॒नां पत॑ये नमः॑।
नम॑ इ॒षु॒म॒द्भ्यो नमः॑। ध॒न्वा॒वि॒भ्यश्च॒ नमः॑। वो॒ नमः॑।
नम॑ आ॒त॒न्वा॒ने॒भ्यो नमः॑। प्र॒ति॒द॒धा॒ने॒भ्यश्च॒ नमः॑। वो॒ नमः॑।
नम॑ आ॒य॒च्छ॒द्भ्यो नमः॑। वि॒सृ॒ज॒द्भ्यश्च॒ नमः॑। वो॒ नमः॑।
नमो॑ऽस्य॒द्भ्यो नमः॑। वि॒ध्य॒द्भ्यश्च॒ नमः॑। वो॒ नमः॑।
नम॑ आ॒सी॒ने॒भ्यो नमः॑। श॒या॒ने॒भ्यश्च॒ नमः॑। वो॒ नमः॑।
नमः॑ स्व॒प॒द्भ्यो नमः॑। जाग्र॑द्भ्यश्च॒ नमः॑। वो॒ नमः॑।
नम॑स्तिष्ठ॑द्भ्यो नमः॑। धा॒व॒द्भ्यश्च॒ नमः॑। वो॒ नमः॑।

नमः स॒भाभ्यो॒ नमः॑। स॒भाप॑तिभ्यश्च॒ नमः॑। वो॒ नमः॑।
 नमो॒ अश्वे॑भ्यो॒ नमः॑। अश्व॑पतिभ्यश्च॒ नमः॑। वो॒ नमः॑॥

नम॑ आ॒व्याधि॑नीभ्यो॒ नमः॑। वि॒विध्य॑न्तीभ्यश्च॒ नमः॑।
 वो॒ नमः॑।

नम॑ उ॒गणा॑भ्यो॒ नमः॑। तृ॒हृती॑भ्यश्च॒ नमः॑। वो॒ नमः॑।
 नमो॑ गृ॒थ्सेभ्यो॒ नमः॑। गृ॒थ्सप॑तिभ्यश्च॒ नमः॑। वो॒ नमः॑।
 नमो॑ ब्रा॒तैभ्यो॒ नमः॑। ब्रा॒तप॑तिभ्यश्च॒ नमः॑। वो॒ नमः॑।
 नमो॑ गु॒णेभ्यो॒ नमः॑। गु॒णप॑तिभ्यश्च॒ नमः॑। वो॒ नमः॑।
 नमो॑ वि॒रूपे॑भ्यो॒ नमः॑। वि॒श्वरूपे॑भ्यश्च॒ नमः॑। वो॒ नमः॑।
 नमो॑ म॒हद्भ्यो॒ नमः॑। क्षु॒ल्लके॑भ्यश्च॒ नमः॑। वो॒ नमः॑।
 नमो॑ र॒थिभ्यो॒ नमः॑। अ॒रथे॑भ्यश्च॒ नमः॑। वो॒ नमः॑।
 नमो॑ र॒थेभ्यो॒ नमः॑। र॒थप॑तिभ्यश्च॒ नमः॑। वो॒ नमः॑।
 नमः॑ से॒नाभ्यो॒ नमः॑। से॒नानि॑भ्यश्च॒ नमः॑। वो॒ नमः॑।
 नमः॑ क्ष॒त्तृभ्यो॒ नमः॑। स॒ङ्ग॒हीतृ॑भ्यश्च॒ नमः॑। वो॒ नमः॑।
 नम॑स्तक्ष॑भ्यो॒ नमः॑। र॒थका॑रेभ्यश्च॒ नमः॑। वो॒ नमः॑।
 नमः॑ कु॒ला॒लेभ्यो॒ नमः॑। क॒र्मरि॑भ्यश्च॒ नमः॑। वो॒ नमः॑।
 नमः॑ पु॒ञ्जिष्टे॑भ्यो॒ नमः॑। नि॒षादे॑भ्यश्च॒ नमः॑। वो॒ नमः॑।
 नम॑ इषु॑कृद्भ्यो॒ नमः॑। ध॒न्व॒कृद्भ्यश्च॒ नमः॑। वो॒ नमः॑।
 नमो॑ मृ॒ग॒युभ्यो॒ नमः॑। श्व॒निभ्य॑श्च॒ नमः॑। वो॒ नमः॑।
 नमः॑ श्व॒भ्यो॒ नमः॑। श्व॒पति॑भ्यश्च॒ नमः॑। वो॒ नमः॑॥

नमो॑ भ॒वाय॑ च॒ नमः॑। रु॒द्राय॑ च॒ नमः॑।
 नमः॑ श॒र्वाय॑ च॒ नमः॑। प॒शुप॑तये च॒ नमः॑।
 नमो॑ नील॑ग्रीवाय च॒ नमः॑। शि॒ति॒क॒ण्ठाय॑ च॒ नमः॑।
 नमः॑ क॒पर्दि॑ने च॒ नमः॑। व्यु॑त्त॒केशाय॑ च॒ नमः॑।
 नमः॑ स॒हस्रा॑क्षाय च॒ नमः॑। श॒तध॑न्वने च॒ नमः॑।
 नमो॑ गि॒रि॒शाय॑ च॒ नमः॑। शि॒पि॒वि॒ष्टाय॑ च॒ नमः॑।
 नमो॑ मी॒ढुष्ट॑माय च॒ नमः॑। इ॒षु॒मते॑ च॒ नमः॑।
 नमो॑ ह॒स्वाय॑ च॒ नमः॑। वा॒म॒नाय॑ च॒ नमः॑।
 नमो॑ बृ॒हते॑ च॒ नमः॑। वर्षी॑यसे च॒ नमः॑।
 नमो॑ वृ॒द्धाय॑ च॒ नमः॑। सं॒वृ॒ध्वने॑ च॒ नमः॑।
 नमो॑ अ॒ग्नि॒याय॑ च॒ नमः॑। प्र॒थ॒माय॑ च॒ नमः॑।
 नम॑ आ॒शवे॑ च॒ नमः॑। अ॒जि॒राय॑ च॒ नमः॑।
 नमः॑ शी॒घ्रि॒याय॑ च॒ नमः॑। शी॒भ्याय॑ च॒ नमः॑।
 नम॑ ऊ॒र्म्याय॑ च॒ नमः॑। अ॒व॒स्व॒न्याय॑ च॒ नमः॑।
 नमः॑ स्त्रो॒त॒स्याय॑ च॒ नमः॑। द्वी॒प्याय॑ च॒ नमः॑॥

नमो॑ ज्ये॒ष्ठाय॑ च॒ नमः॑। क॒नि॒ष्ठाय॑ च॒ नमः॑।
 नमः॑ पूर्॒व॒जाय॑ च॒ नमः॑। अ॒प॒र॒जाय॑ च॒ नमः॑।
 नमो॑ म॒ध्य॒माय॑ च॒ नमः॑। अ॒प॒ग॒ल्भाय॑ च॒ नमः॑।
 नमो॑ जघ॒न्याय॑ च॒ नमः॑। बु॒ध्रि॒याय॑ च॒ नमः॑।
 नमः॑ सो॒भ्याय॑ च॒ नमः॑। प्र॒ति॒स॒र्याय॑ च॒ नमः॑।

नमो॒ याम्या॑य च॒ नमः॑। क्षे॒म्या॑य च॒ नमः॑।
 नम॑ उ॒र्वर्या॑य च॒ नमः॑। ख॒ल्या॑य च॒ नमः॑।
 नमः॑ श्लो॒क्या॑य च॒ नमः॑। अ॒वसा॑न्याय च॒ नमः॑।
 नमो॒ वन्या॑य च॒ नमः॑। क॒क्ष्या॑य च॒ नमः॑।
 नमः॑ श्र॒वाय॑ च॒ नमः॑। प्र॒तिश्र॑वाय च॒ नमः॑।
 नम॑ आ॒शुषे॑णाय च॒ नमः॑। आ॒शुर॑थाय च॒ नमः॑।
 नमः॑ शू॒राय॑ च॒ नमः॑। अ॒वभि॑न्दते च॒ नमः॑।
 नमो॒ वर्मि॑णे च॒ नमः॑। व॒रूथि॑ने च॒ नमः॑।
 नमो॒ बि॒ल्मि॑ने च॒ नमः॑। क॒वचि॑ने च॒ नमः॑।
 नमः॑ श्रु॒ताय॑ च॒ नमः॑। श्रु॒तसे॑नाय च॒ नमः॑॥

नमो॒ दुन्दु॑भ्याय च॒ नमः॑। आ॒ह॒न॒न्या॑य च॒ नमः॑।
 नमो॒ धृ॒ष्णवे॑ च॒ नमः॑। प्र॒मृ॒शाय॑ च॒ नमः॑।
 नमो॒ दू॒ताय॑ च॒ नमः॑। प्र॒हि॒ताय॑ च॒ नमः॑।
 नमो॒ निष॑ङ्गिणे च॒ नमः॑। इ॒षु॒धि॒मते॑ च॒ नमः॑।
 नम॑स्ती॒क्ष्णेष॑वे च॒ नमः॑। आ॒यु॒धि॒ने च॒ नमः॑।
 नमः॑ स्वा॒यु॒धाय॑ च॒ नमः॑। सु॒धन्व॑ने च॒ नमः॑।
 नमः॑ स्रु॒त्याय॑ च॒ नमः॑। प॒थ्या॑य च॒ नमः॑।
 नमः॑ का॒ट्या॑य च॒ नमः॑। नी॒प्या॑य च॒ नमः॑।
 नमः॑ सू॒द्याय॑ च॒ नमः॑। स॒र॒स्याय॑ च॒ नमः॑।
 नमो॒ ना॒द्याय॑ च॒ नमः॑। वै॒श॒न्ताय॑ च॒ नमः॑।

नमः कूप्याय च नमः। अवट्याय च नमः।
 नमो वर्ष्पाय च नमः। अवर्ष्पाय च नमः।
 नमो मेघ्याय च नमः। विद्युत्याय च नमः।
 नम ईध्रियाय च नमः। आतप्याय च नमः।
 नमो वात्याय च नमः। रेष्मियाय च नमः।
 नमो वास्तव्याय च नमः। वास्तुपाय च नमः॥

नमः सोमाय च नमः। रुद्राय च नमः।
 नमस्ताम्राय च नमः। अरुणाय च नमः।
 नमः शङ्गाय च नमः। पशुपतये च नमः।
 नम उग्राय च नमः। भीमाय च नमः।
 नमो अग्रेवधाय च नमः। दूरेवधाय च नमः।
 नमो हन्त्रे च नमः। हनीयसे च नमः।
 नमो वृक्षेभ्यो नमः। हरिकेशेभ्यो नमः।
 नमस्ताराय नमः। नमः शम्भवे च नमः।
 मयोभवे च नमः। नमः शङ्कराय च नमः।
 मयस्कराय च नमः। नमः शिवाय च नमः।
 शिवतराय च नमः। नमस्तीर्थ्याय च नमः।
 कल्याय च नमः। नमः पार्याय च नमः।
 अवार्याय च नमः। नमः प्रतरणाय च नमः।
 उत्तरणाय च नमः। नम आतार्याय च नमः।

आ॒ला॒द्याय॑ च॒ नमः॑। नमः॑ श॒ष्प्याय॑ च॒ नमः॑।
 फे॒न्याय॑ च॒ नमः॑। नमः॑ सि॒क्त्याय॑ च॒ नमः॑।
 प्र॒वा॒ह्याय॑ च॒ नमः॑॥

नमः॑ इ॒रि॒ण्याय॑ च॒ नमः॑। प्र॒प॒थ्याय॑ च॒ नमः॑।
 नमः॑ कि॒शिलाय॑ च॒ नमः॑। क्ष॒य॒णाय॑ च॒ नमः॑।
 नमः॑ क॒पर्दि॒ने च॒ नमः॑। पु॒ल॒स्तये॑ च॒ नमः॑।
 नमो॑ गो॒ष्ठ्याय॑ च॒ नमः॑। गृ॒ह्याय॑ च॒ नमः॑।
 नम॑स्त॒ल्प्याय॑ च॒ नमः॑। गे॒ह्याय॑ च॒ नमः॑।
 नमः॑ का॒ट्याय॑ च॒ नमः॑। गृ॒ह्रे॒ष्ठाय॑ च॒ नमः॑।
 नमो॑ हृ॒द॒य्याय॑ च॒ नमः॑। नि॒वे॒ष्याय॑ च॒ नमः॑।
 नमः॑ पा॒स॒व्याय॑ च॒ नमः॑। र॒ज॒स्याय॑ च॒ नमः॑।
 नमः॑ शु॒ष्क्याय॑ च॒ नमः॑। ह॒रि॒त्याय॑ च॒ नमः॑।
 नमो॑ लो॒प्याय॑ च॒ नमः॑। उ॒ल॒प्याय॑ च॒ नमः॑।
 नमः॑ ऊ॒र्व्याय॑ च॒ नमः॑। सू॒र्म्याय॑ च॒ नमः॑।
 नमः॑ प॒र्ण्याय॑ च॒ नमः॑। प॒र्ण॒श॒द्याय॑ च॒ नमः॑।
 नमो॑ऽप॒गु॒रमा॑णाय च॒ नमः॑। अ॒भि॒घ्न॒ते च॒ नमः॑।
 नमः॑ आ॒खि॒वद॑ते च॒ नमः॑। प्र॒खि॒वद॑ते च॒ नमः॑। नमो॑ वो॒
 नमः॑।
 कि॒रि॒केभ्यो॑ नमः॑। दे॒वाना॑ हृ॒दये॑भ्यो॑ नमः॑।
 नमो॑ वि॒क्षी॒णके॑भ्यो॑ नमः॑। नमो॑ वि॒चि॒न्व॒त्के॑भ्यो॑ नमः॑।

नमं आनिर्हृतेभ्यो नमः। नमं आमीवत्केभ्यो नमः।



॥प्रदक्षिणम्॥

द्रापे अन्धसस्पते दरिद्रन्नीललोहित। एषां पुरुषाणामेषां
पशूनां मा भेर्माऽरो मो एषां किं चनाऽऽमत्॥ या ते रुद्र
शिवा तनूः शिवा विश्वाहभेषजी। शिवा रुद्रस्य भेषजी तया
नो मृड जीवसे॥ इमा रुद्राय तवसे कपर्दिने क्षयद्वीराय
प्रभरामहे मतिम्॥ यथा नः शमसद्विपदे चतुष्पदे विश्वं
पुष्टं ग्रामे अस्मिन्ननातुरम्॥ मृडा नो रुद्रोत नो मयस्कृधि
क्षयद्वीराय नमसा विधेम ते। यच्छं च योश्च मनुरायजे पिता
तदश्याम तव रुद्र प्रणीतौ॥ मा नो महान्तमुत मा नो अर्भकं
मा न उक्षन्तमुत मा न उक्षितम्। मा नो वधीः पितरं मोत
मातरं प्रिया मा नस्तनुवो रुद्र रीरिषः॥ मा नस्तोके तनये मा
न आयुषि मा नो गोषु मा नो अश्वेषु रीरिषः। वीरान्मा नो रुद्र
भामितोऽवधीर्हविष्मन्तो नमसा विधेम ते॥ आरात्ते गोघ्न
उत पूरुषघ्ने क्षयद्वीराय सुम्रमस्मे ते अस्तु। रक्षा च नो अधि
च देव ब्रूयधा च नः शर्म यच्छ द्विबर्हाः॥ स्तुहि श्रुतं गतंसदं
युवानं मृगं न भीममुपहृलुमुग्रम्। मृडा जरित्रे रुद्र स्तवानो
अन्यन्ते अस्मन्निवपन्तु सेनाः॥ परिणो रुद्रस्य हेतिर्वृणक्तु
परि त्वेषस्य दुर्मतिरघायोः। अव स्थिरा मघवद्व्यस्तनुष्व

मीढ्वस्तो॒काय॒ तन॑याय मृ॒डय॥ मीढु॑ष्टम् शिव॑तम शि॒वो नः॑
 सु॒मना॑ भव। प॒रमे॑ वृक्ष आ॒युधं॑ नि॒धाय॒ कृत्तिं॑ वसा॒न् आ
 च॑र पिना॑कं बिभ्र॒दा ग॑हि॥ वि॒किरि॑द् विलो॑हित॒ नम॑स्ते
 अस्तु॑ भगवः। यास्तै॑ सह॒स्रं हे॒तयो॑ऽन्यम॒स्मन्नि॑व॒पन्तु॑ ताः॥
 सह॒स्राणि॑ सह॒स्रधा॑ बा॒हुवो॑स्तव हे॒तयः॑। तासा॒मीशा॑नो भगवः
 परा॒चीना॒ मुखा॑ कृधि॥ प्रदक्षिणं कृत्वा॥



॥ नमस्काराः ॥

स॒हस्रा॑णि सह॒स्रशो॑ ये रु॒द्रा अधि॑ भू॒म्याम्। तेषा॑ं
 सह॒स्रयो॒जने॑ऽव॒धन्वा॑नि तन्मसि। श्री-महादे॒वादि॒भ्यो
 नमः॥ १ ॥

अ॒स्मिन् म॑ह॒त्यर्ण॑वे॒ऽन्तरि॑क्षे भू॒वा अधि॑। तेषा॑ं
 सह॒स्रयो॒जने॑ऽव॒धन्वा॑नि तन्मसि। श्री-महादे॒वादि॒भ्यो
 नमः॥ २ ॥

नील॑ग्री॒वाः शि॒ति॒कण्ठाः॑ श॒र्वा अधः॑, क्ष॑माच॒राः।
 तेषा॑ं सह॒स्रयो॒जने॑ऽव॒धन्वा॑नि तन्मसि। श्री-महादे॒वादि॒भ्यो
 नमः॥ ३ ॥

नील॑ग्री॒वाः शि॒ति॒कण्ठा॒ दिवः॑ रु॒द्रा उप॑श्रिताः। तेषा॑ं
 सह॒स्रयो॒जने॑ऽव॒धन्वा॑नि तन्मसि। श्री-महादे॒वादि॒भ्यो
 नमः॥ ४ ॥

ये वृ॒क्षेष्ु॑ स॒स्मिञ्जरा॒ नील॑ग्री॒वा विलो॑हिताः। तेषा॑ं

सहस्रयोजनेऽवधन्वानि तन्मसि। श्री-महादेवादिभ्यो
नमः॥ ५॥

ये भूतानामधिपतयो विशिखासः कपर्दिनः। तेषां
सहस्रयोजनेऽवधन्वानि तन्मसि। श्री-महादेवादिभ्यो
नमः॥ ६॥

ये अन्त्रेषु विविध्यन्ति पात्रेषु पिबन्तो जनान्। तेषां
सहस्रयोजनेऽवधन्वानि तन्मसि। श्री-महादेवादिभ्यो
नमः॥ ७॥

ये पथां पथिरक्षय ऐलबृदा युव्युधः। तेषां सहस्रयोजने-
ऽवधन्वानि तन्मसि। श्री-महादेवादिभ्यो नमः॥ ८॥

ये तीर्थानि प्रचरन्ति सृकावन्तो निषङ्गिणः। तेषां
सहस्रयोजनेऽवधन्वानि तन्मसि। श्री-महादेवादिभ्यो
नमः॥ ९॥

य एतावन्तश्च भूयांसश्च दिशो रुद्रा वितस्थिरे।
तेषां सहस्रयोजनेऽवधन्वानि तन्मसि। श्री-महादेवादिभ्यो
नमः॥ १०॥

नमो रुद्रेभ्यो ये पृथिव्यां येषामन्नमिषवस्तेभ्यो दश
प्राचीर्दश दक्षिणा दश प्रतीचीर्दशोदीचीर्दशोर्ध्वास्तेभ्यो
नमस्ते नो मृडयन्तु ते यं द्विष्मो यश्च नो द्वेष्टि तं वो जम्भे
दधामि। श्री-महादेवादिभ्यो नमः॥ ११॥

नमो रुद्रेभ्यो येऽन्तरिक्षे येषां वात इषवस्तेभ्यो दश
प्राचीर्दश दक्षिणा दश प्रतीचीर्दशोदीचीर्दशोर्ध्वास्तेभ्यो नमस्ते

नो॑ मृडयन्तु ते यं द्वि॒ष्मो यश्च॑ नो॒ द्वेष्टि॒ तं वो॒ जम्भे॑ दधामि।
श्री-महादेवादिभ्यो नमः॥१२॥

नमो॑ रु॒द्रेभ्यो॒ ये दि॒वि येषां॑ व॒रुष॑मिष॑व॒स्तेभ्यो॒ दश॒
प्राची॑र्दश॑ दक्षिणा दश॑ प्र॒तीची॑र्दशोर्दी॒चीर्दशो॑र्ध्वास्तेभ्यो॒
नम॑स्ते नो॑ मृडयन्तु ते यं द्वि॒ष्मो यश्च॑ नो॒ द्वेष्टि॒ तं वो॒ जम्भे॑
दधामि। श्री-महादेवादिभ्यो नमः॥१३॥

नमस्कारान् कृत्वा॥



॥चमकानुवाकैः प्रार्थना॥

अ॒ग्रावि॑ष्णू स॒जोष॑से॒मा वर्ध॑न्तु वां गिरः। द्यु॒म्रैर्वा॑जै॒भिरा॑-
ग॑तम्॥ वा॒जंश्च॑ मे प्र॒स॒वश्च॑ मे प्र॒य॒तिश्च॑ मे प्र॒सि॑तिश्च॑ मे
धी॒तिश्च॑ मे क्र॒तुश्च॑ मे स्वर॑श्च॑ मे श्लो॒कश्च॑ मे श्रा॒वश्च॑ मे श्रु॒तिश्च॑
मे ज्यो॒तिश्च॑ मे सु॒व॑श्च॑ मे प्रा॒णश्च॑ मेऽपा॒नश्च॑ मे व्या॒नश्च॑
मेऽसु॑श्च॑ मे चि॒त्तं च॑ म॒ आ॒धी॑तं च॑ मे वा॒क्त्रं मे॒ मन॑श्च॑ मे
चक्षु॑श्च॑ मे श्रो॒त्रं च॑ मे दक्ष॑श्च॑ मे ब॒लं च॑ म॒ ओज॑श्च॑ मे स॒हश्च॑
म॒ आयु॑श्च॑ मे ज॒रा च॑ म॒ आ॒त्मा च॑ मे त॒नूश्च॑ मे श॒र्म च॑
मे वर्म॑ च॒ मेऽङ्गा॑नि च॒ मेऽस्थानि॑ च॒ मे प॒रू॒षि च॑ मे
शरी॑राणि च॒ मे॥१॥

ज्यै॒ष्ठ्यं च॑ म॒ आधि॑पत्यं च॒ मे म॒न्युश्च॑ मे॒ भाम॑श्च॑ मेऽम॑श्च॑
मेऽम्भ॑श्च॑ मे जे॒मा च॑ मे म॒हि॒मा च॑ मे व॒रि॒मा च॑ मे प्र॒थि॒मा
च॑ मे व॒र्ष्मा च॑ मे द्राघु॒या च॑ मे वृ॒द्धं च॑ मे वृ॒द्धिश्च॑ मे स॒त्यं

च॑ मे श्र॒द्धा च॑ मे जग॑च्च मे॒ धनं॑ च मे॒ वश॑श्च मे॒ त्विषि॑श्च
मे क्री॒डा च॑ मे॒ मोद॑श्च मे॒ जा॒तं च॑ मे॒ जनि॑ष्यमा॒णं च॑ मे
सू॒क्तं च॑ मे॒ सुकृ॑तं च॑ मे॒ वि॒त्तं च॑ मे॒ वेद्यं॑ च मे॒ भू॒तं च॑ मे
भवि॑ष्यच्च॑ मे॒ सुगं॑ च॑ मे॒ सुप॑थं च॑ म॒ ऋद्धं॑ च॑ म॒ ऋद्धि॑श्च मे
कृ॒तं च॑ मे॒ कृ॒तिश्च॑ मे॒ म॒तिश्च॑ मे॒ सुम॑तिश्च॑ मे॥२॥

शं च॑ मे॒ मय॑श्च मे॒ प्रि॒यं च॑ मे॒ऽनु॒काम॑श्च मे॒ काम॑श्च मे
सौम॒न॒सश्च॑ मे॒ भ॒द्रं च॑ मे॒ श्रेय॑श्च मे॒ वस्य॑श्च मे॒ यश॑श्च मे॒
भग॑श्च मे॒ द्रवि॑णं च॑ मे॒ य॒न्ता च॑ मे॒ ध॒र्ता च॑ मे॒ क्षेम॑श्च मे॒
धृ॒तिश्च॑ मे॒ वि॒श्वं च॑ मे॒ मह॑श्च मे॒ सं॒विच्च॑ मे॒ ज्ञा॒त्रं च॑ मे॒ सू॒श्च मे॒
प्र॒सू॒श्च मे॒ सी॒रं च॑ मे॒ ल॒यश्च॑ म॒ ऋ॒तं च॑ मे॒ऽमृ॒तं च॑ मे॒ऽय॒क्ष्मं
च॑ मे॒ऽना॒मय॑च्च मे॒ जी॒वातु॑श्च मे॒ दी॒र्घायु॑त्वं च॑ मे॒ऽन॒मि॒त्रं च॑
मे॒ऽभ॒यं च॑ मे॒ सु॒गं च॑ मे॒ श॒य॒नं च॑ मे॒ सू॒षा च॑ मे॒ सु॒दिनं॑ च॑
मे॥३॥

ऊ॒र्क्कं मे॒ सू॒नृता॑ च॑ मे॒ प॒य॑श्च मे॒ र॒संश्च॑ मे॒ घृ॒तं च॑ मे॒
म॒धुं च॑ मे॒ स॒ग्धि॑श्च मे॒ स॒पी॒तिश्च॑ मे॒ कृ॒षि॑श्च मे॒ वृ॒ष्टि॑श्च मे॒
जै॒त्रं च॑ म॒ औ॒द्भिद्यं॑ च॑ मे॒ र॒यि॑श्च मे॒ रा॒यंश्च॑ मे॒ पु॒ष्टं च॑ मे॒
पु॒ष्टि॑श्च मे॒ वि॒भु च॑ मे॒ प्र॒भु च॑ मे॒ ब॒हु च॑ मे॒ भू॒यंश्च॑ मे॒ पू॒र्णं
च॑ मे॒ पू॒र्ण॒तरं॑ च॑ मे॒ऽक्षि॑तिश्च॑ मे॒ कू॒य॒वाश्च॑ मे॒ऽन्नं॑ च॑ मे॒ऽक्षु॑च्च॑
मे॒ व्री॒ह॒यंश्च॑ मे॒ य॒वा॑श्च मे॒ मा॒षा॑श्च मे॒ ति॒ला॑श्च मे॒ मु॒द्गा॑श्च मे॒
ख॒ल्वा॑श्च मे॒ गो॒धू॒मा॑श्च मे॒ म॒सुरा॑श्च मे॒ प्रि॒यङ्ग॑वश्च॑ मे॒ऽण॑वश्च॑
मे॒ श्या॒माका॑श्च मे॒ नी॒वा॒रा॑श्च मे॥४॥

अश्मां च मे मृत्तिका च मे गिरयश्च मे पर्वताश्च मे
 सिकताश्च मे वनस्पतयश्च मे हिरण्यं च मेऽयश्च मे सीसं
 च मे त्रपुश्च मे श्यामं च मे लोहं च मेऽग्निश्च म आपश्च
 मे वीरुधश्च म ओषधयश्च मे कृष्टपच्यं च मेऽकृष्टपच्यं च
 मे ग्राम्याश्च मे पशव आरण्याश्च यज्ञेन कल्पन्तां वित्तं च
 मे वित्तिश्च मे भूतं च मे भूतिश्च मे वसु च मे वसतिश्च मे
 कर्म च मे शक्तिश्च मेऽर्थश्च म एमश्च म इतिश्च मे गतिश्च
 मे॥५॥

अग्निश्च म इन्द्रश्च मे सोमश्च म इन्द्रश्च मे सविता च
 म इन्द्रश्च मे सरस्वती च म इन्द्रश्च मे पूषा च म इन्द्रश्च
 मे बृहस्पतिश्च म इन्द्रश्च मे मित्रश्च म इन्द्रश्च मे वरुणश्च
 म इन्द्रश्च मे त्वष्टा च म इन्द्रश्च मे धाता च म इन्द्रश्च मे
 विष्णुश्च म इन्द्रश्च मेऽश्विनौ च म इन्द्रश्च मे मरुतश्च म
 इन्द्रश्च मे विश्वे च मे देवा इन्द्रश्च मे पृथिवी च म इन्द्रश्च
 मेऽन्तरिक्षं च म इन्द्रश्च मे द्यौश्च म इन्द्रश्च मे दिशश्च म
 इन्द्रश्च मे मूर्धा च म इन्द्रश्च मे प्रजापतिश्च म इन्द्रश्च मे॥६॥

अ०शुश्च मे रश्मिश्च मेऽदाभ्यश्च मेऽधिपतिश्च म
 उपा०शुश्च मेऽन्तर्यामश्च म ऐन्द्रवायवश्च मे मैत्रावरुणश्च
 म आश्विनश्च मे प्रतिप्रस्थानश्च मे शुक्रश्च मे मन्थी च
 म आग्रयणश्च मे वैश्वदेवश्च मे ध्रुवश्च मे वैश्वानरश्च म
 ऋतुग्रहाश्च मेऽतिग्राह्याश्च म ऐन्द्राग्रश्च मे वैश्वदेवश्च मे

मरुत्वतीयाँश्च मे माहेन्द्रश्च म आदित्यश्च मे सावित्रश्च मे
सारस्वतश्च मे पौष्णश्च मे पालीवतश्च मे हारियोजनश्च
मे॥७॥

इध्मश्च मे बर्हिश्च मे वेदिश्च मे धिष्ण्याश्च मे सुचश्च मे
चमसाश्च मे ग्रावाणश्च मे स्वरवश्च म उपरवाश्च मेऽधिषवणे च
मे द्रोणकलशश्च मे वायव्यानि च मे पूतभृच्च म आधवनीयश्च
म आग्नीध्रं च मे हविर्धानं च मे गृहाश्च मे सदश्च मे
पुरोडाशाँश्च मे पचताश्च मेऽवभृथश्च मे स्वगाकारश्च मे॥८॥

अग्निश्च मे घर्मश्च मेऽर्कश्च मे सूर्यश्च मे प्राणश्च मेऽश्वमेधश्च
मे पृथिवी च मेऽदितिश्च मे दितिश्च मे द्यौश्च मे शक्नीरङ्गुलयो
दिशश्च मे यज्ञेन कल्पन्तामृक्कं मे सामं च मे स्तोमश्च
मे यजुश्च मे दीक्षा च मे तपश्च म ऋतुश्च मे व्रतं च
मेऽहोरात्रयोर्वृष्ट्या बृहद्रथन्तरे च मे यज्ञेन कल्पेताम्॥९॥

गर्भाश्च मे वथ्साश्च मे त्र्यविश्च मे त्र्यवी च मे दित्यवाच्चं
मे दित्यौही च मे पश्चाविश्च मे पश्चावी च मे त्रिवथ्सश्च मे
त्रिवथ्सा च मे तुर्यवाच्चं मे तुर्यौही च मे पष्ठवाच्चं मे पष्ठौही च
म उक्षा च मे वशा च म ऋषभश्च मे वेहच्चं मेऽनुङ्वां च मे धेनुश्च
म आयुर्यज्ञेन कल्पतां प्राणो यज्ञेन कल्पतामपानो यज्ञेन
कल्पतां व्यानो यज्ञेन कल्पतां चक्षुर्यज्ञेन कल्पतां श्रोत्रं
यज्ञेन कल्पतां मनो यज्ञेन कल्पतां वाग्यज्ञेन कल्पतामात्मा
यज्ञेन कल्पतां यज्ञो यज्ञेन कल्पताम्॥१०॥

एका॑ च मे ति॒स्रश्च॑ मे॒ पञ्च॑ च मे स॒प्त च॑ मे
 नव॑ च म॒ एका॑दश च मे॒ त्रयो॑दश च मे॒ पञ्च॑दश च
 मे स॒प्तद॑श च मे॒ नव॑दश च म॒ एक॑विंशतिश्च मे॒
 त्रयो॑विंशतिश्च मे॒ पञ्च॑विंशतिश्च मे॒ सप्त॑विंशतिश्च मे॒
 नव॑विंशतिश्च म॒ एक॑त्रिंशच्च मे॒ त्रय॑स्त्रिंशच्च मे॒ चत॑स्रश्च
 मेऽष्टौ॑ च॑ मे॒ द्वाद॑श च मे॒ षोड॑श च मे॒ विं॑शतिश्च
 मे॒ चतु॑र्विंशतिश्च मे॒ ऽष्टा॑विंशतिश्च मे॒ द्वा॒त्रिं॑शच्च
 मे॒ षट्त्रिं॑शच्च मे॒ चत्वारि॑ंशच्च॑ मे॒ चतु॑श्चत्वारिंशच्च
 मे॒ ऽष्टा॑चत्वारिंशच्च मे॒ वाज॑श्च प्रस॒वश्चा॑पिजश्च॒ क्रतु॑श्च
 सुव॑श्च मूर्धा च॒ व्यश्नि॑यश्चाऽऽन्त्याय॒नश्चान्त्य॑श्च भौव॒नश्च॒
 भुव॑नश्चाधिपतिश्च॥११॥

महादेवादिभ्यो नमः॥ समस्तोपचारान् समर्पयामि॥

इडा॑ देव॒हूर्म॑नुर्यज्ञ॒नीर्बृ॑हस्पतिरुक्थाम॒दानि॑ श॒सिष॑द्वि॒श्वेदे॒वाः
 सू॒क्त॒वाचः॑ पृथि॑वि मा॒त॒र्मा मां हि॑सी॒र्मधुं॑ म॒निष्ये॑ मधुं
 ज॒निष्ये॑ मधुं वक्ष्यामि॒ मधुं॑ वदिष्यामि॒ मधु॑मतीं दे॒वेभ्यो॑
 वाच॑मुद्यास॒ शुश्रू॑षेण्यां॒ मनु॑ष्येभ्य॒स्तं मां दे॒वा अ॑वन्तु
 शो॒भायै॑ पि॒तरो॑ऽनु॒मद॑न्तु॥

॥ॐ शान्तिः॒ शान्तिः॒ शान्तिः॑॥



अ॒घोरे॑भ्योऽथ॒ घोरे॑भ्यो॒ घोर्घो॑रतरेभ्यः।
 सर्वे॑भ्यः सर्व॒शर्वे॑भ्यो नम॑स्ते अस्तु रु॒द्ररू॑पेभ्यः॥
 तत्पु॑रुषाय वि॒द्महे॑ महादे॒वाय॑ धीमहि॥

तन्नो रुद्रः प्रचोदयात्॥

ईशानः सर्वविद्यानामीश्वरः सर्वभूतानां ब्रह्माधिपतिर्ब्रह्मणो-
ऽधिपतिर्ब्रह्मा शिवो मे अस्तु सदाशिवोम्॥

तत्पुरुषाय विद्महे महादेवाय धीमहि।

तन्नो रुद्रः प्रचोदयात्॥ (दशवारं जपेत्।)

महादेवादिभ्यो नमः॥ समस्तोपचारान् समर्पयामि॥



॥ प्रार्थना ॥



॥ श्रीरुद्रजपः ॥

अस्य श्री-रुद्राध्याय-प्रश्न-महामन्त्रस्य। अघोर ऋषिः।
अनुष्टुप् छन्दः। सङ्कर्षणमूर्तिस्वरूपो योऽसावादित्यः
परमपुरुषः स एष रुद्रो देवता॥

नमः शिवायेति बीजम्। शिवतरायेति शक्तिः।

महादेवायेति कीलकम्।

श्री-साम्बसदाशिवप्रसादसिद्ध्यर्थे जपे विनियोगः॥

॥ करन्यासः ॥

ॐ अग्निहोत्रात्मने अङ्गुष्ठाभ्यां नमः।

दर्शपूर्णमासात्मने तर्जनीभ्यां नमः।

चातुर्मास्यात्मने मध्यमाभ्यां नमः।

निरूढपशुबन्धात्मने अनामिकाभ्यां नमः।

ज्योतिष्टोमात्मने कनिष्ठिकाभ्यां नमः।
सर्वक्रत्वात्मने करतलकरपृष्ठाभ्यां नमः।

॥ अङ्गन्यासः ॥

अग्निहोत्रात्मने हृदयाय नमः।
दर्शपूर्णमासात्मने शिरसे स्वाहा।
चातुर्मास्यात्मने शिखायै वषट्।
निरूढपशुबन्धात्मने कवचाय हुं।
ज्योतिष्टोमात्मने नेत्रत्रयाय वौषट्।
सर्वक्रत्वात्मने अस्त्राय फट्।
भूर्भुवस्सुवरोमिति दिग्बन्धः।

॥ ध्यानम् ॥

आपाताल-नभः-स्थलान्त-भुवन-ब्रह्माण्डमाविस्फुरत्
ज्योतिः स्फाटिक-लिङ्ग-मौलि-विलसत्-पूर्णेन्दु-वान्तामृतैः।
अस्तोकाप्लुतमेकमीशमनिशं रुद्रानुवाकान् जपन्
ध्यायेदीप्सितसिद्धये ध्रुवपदं विप्रोऽभिषिञ्चेच्छिवम्॥

ब्रह्माण्ड-व्याप्त-देहा भसित-हिमरुचा भासमाना भुजङ्गैः
कण्ठे कालाः कपर्दा-कलित-शशि-कलाश्चण्ड-कोदण्ड-हस्ताः।
त्र्यक्षा रुद्राक्षमालाः प्रकटित-विभवाः शाम्भवा मूर्तिभेदाः
रुद्राः श्रीरुद्रसूक्त-प्रकटित-विभवा नः प्रयच्छन्तु सौख्यम्॥

॥पञ्चपूजा॥

लं पृथिव्यात्मने गन्धं समर्पयामि।

हं आकाशात्मने पूष्पैः पूजयामि।

यं वाय्वात्मने धूपमाघ्रापयामि।

रं अग्न्यात्मने दीपं दर्शयामि।

वं अमृतात्मने अमृतं महानैवेद्यं निवेदयामि।

सं सर्वात्मने सर्वोपचारपूजां समर्पयामि।

ॐ गुणानां त्वा गुणपतिः हवामहे कविं कवीनामुप-
मश्रवस्तमम्।

ज्येष्ठराजं ब्रह्मणां ब्रह्मणस्पत आ नः शृण्वन्नृतिभिः सीद-
सादनम्॥

ॐ महागणपतये नमः॥

शं च मे मयश्च मे प्रियं च मेऽनुकामश्च मे कामश्च मे
सौमनसश्च मे भद्रं च मे श्रेयश्च मे वस्यश्च मे यशश्च मे भगश्च
मे द्रविणं च मे यन्ता च मे धर्ता च मे क्षेमश्च मे धृतिश्च मे
विश्वं च मे महश्च मे संविच्च मे ज्ञात्रं च मे सूश्च मे प्रसूश्च
मे सीरं च मे लयश्च मे ऋतं च मेऽमृतं च मेऽयक्ष्मं च
मेऽनामयच्च मे जीवातुश्च मे दीर्घायुत्वं च मेऽनमित्रं च मेऽभयं
च मे सुगं च मे शयनं च मे सूषा च मे सुदिनं च मे॥३॥

॥ॐ शान्तिः शान्तिः शान्तिः॥



॥ रुद्रप्रश्नः ॥

ॐ नमो भगवते रुद्राय॥

नमस्ते रुद्र मन्यव उतो त इषवे नमः। नमस्ते अस्तु
 धन्वने बाहुभ्यामुत ते नमः॥ या त इषुः शिवतमा शिवं
 बभूव ते धनुः। शिवा शरव्या या तव तया नो रुद्र मृडय॥
 या ते रुद्र शिवा तनूरघोराऽपापकाशिनी। तया नस्तनुवा
 शन्तमया गिरिशन्ताभिचाकशीहि॥ यामिषु गिरिशन्त हस्ते
 बिभर्ष्यस्तवे। शिवा गिरित्र तां कुरु मा हिंसीः पुरुषं
 जगत्॥ शिवेन वचसा त्वा गिरिशाच्छावदामसि। यथा
 नः सर्वमिज्जगदयक्ष्मं सुमना असत्॥ अध्यवोचदधिवक्ता
 प्रथमो दैव्यो भिषक्। अहींश्च सर्वाञ्जम्भयन्त्सर्वाश्च
 यातुधान्यः॥ असौ यस्ताम्रो अरुण उत बभ्रुः सुमङ्गलः।
 ये चेमां रुद्रा अभितो दिक्षु श्रिताः सहस्रशोऽवैषां हेडं
 ईमहे॥ असौ योऽवसर्पति नीलग्रीवो विलोहितः। उत्तैनं
 गोपा अदृशन्नदृशन्नुदहार्यः॥ उत्तैनं विश्वा भूतानि स दृष्टो
 मृडयाति नः। नमो अस्तु नीलग्रीवाय सहस्राक्षाय मीढुषे॥
 अथो ये अस्य सत्वानोऽहं तेभ्योऽकरं नमः। प्र मुञ्च
 धन्वनस्त्वमुभयोरार्णियोर्ज्याम्॥ याश्च ते हस्त इषवः परा
 ता भगवो वप। अवतत्य धनुस्त्वं सहस्राक्ष शतेषुधे॥
 निशीर्य शल्यानां मुखा शिवो नः सुमना भव। विज्यं
 धनुः कपर्दिनो विशल्यो बाणवां उत॥ अनेशन्नस्येषव

आभुरस्य निषङ्गथिः। या ते हेतिर्मीदुष्टम् हस्ते बभूव
ते धनुः॥ तयाऽस्मान् विश्वतस्त्वमयक्ष्मया परिबुज।
नमस्ते अस्त्वायुधायानातताय धृष्णवे॥ उभाभ्यामुत ते
नमो बाहुभ्यां तव धन्वने। परि ते धन्वनो हेतिरस्मान्वृणक्तु
विश्वतः॥ अथो य इषुधिस्तवाऽऽरे अस्मन्नि धेहि तम्॥१॥

[नमस्ते अस्तु भगवन् विश्वेश्वराय महादेवाय त्र्यम्बकाय
त्रिपुरान्तकाय त्रिका[ला]ग्निका[ला]य कालाग्निरुद्राय
नीलकण्ठाय मृत्युञ्जयाय सर्वेश्वराय सदाशिवाय
श्रीमन्महादेवाय नमः॥]

नमो हिरण्यबाहवे सेनान्यै दिशां च पतये नमो नमो
वृक्षेभ्यो हरिकेशेभ्यः पशूनां पतये नमो नमः सस्मिञ्जराय
त्विषीमते पथीनां पतये नमो नमो बभ्रुशाय विव्याधिनेऽन्नानां
पतये नमो नमो हरिकेशायोपवीतिने पुष्टानां पतये नमो
नमो भवस्य हेत्यै जगतां पतये नमो नमो रुद्रायातताविने
क्षेत्राणां पतये नमो नमः सूतायाहन्त्याय वनानां पतये
नमो नमो रोहिताय स्थपतये वृक्षाणां पतये नमो नमो
मन्त्रिणे वाणिजाय कक्षाणां पतये नमो नमो भुवन्तये
वारिवस्कृतायौषधीनां पतये नमो नमो उच्चैर्घोषायाक्रन्दयते
पत्तीनां पतये नमो नमः कृत्स्नवीताय धावते सत्वनानां पतये
नमः॥२॥

नमः सहमानाय निव्याधिन आव्याधिनीनां पतये नमो

नमः॑ ककु॒भाय॑ निष॒ङ्गिणै॑ स्ते॒नानां॑ पत॑ये नमो॒ नमो॑ निष॒ङ्गिणं॑
 इषु॒धिम॑ते तस्करा॑णां पत॑ये नमो॒ नमो॑ व॒श्वते॑ परि॒वश्व॑ते
 स्तायू॑नां पत॑ये नमो॒ नमो॑ नि॒चेर॑वे परि॒चरा॑यार॒ण्यानां॑ पत॑ये
 नमो॒ नमः॑ सू॒कावि॑भ्यो जिघाँस॒द्भ्यो मु॑ष्ण॒तां पत॑ये नमो॒
 नमो॑ऽसि॒मद्भ्यो॑ नक्तं॑ चर॒द्भ्यः प्र॑कृ॒न्तानां॑ पत॑ये नमो॒ नमः॑
 उ॒ष्णीषि॑णै॒ गिरि॑च॒राय॑ कुलु॒श्चानां॑ पत॑ये नमो॒ नमः॑ इषु॒मद्भ्यो॑
 धन्वा॑वि॒भ्यश्च॑ वो॒ नमो॒ नमः॑ आ॒तन्वा॑नेभ्यः॒ प्रति॑द॒धाने॑भ्यश्च वो॒
 नमो॒ नमः॑ आ॒यच्छ॑द्भ्यो वि॒सृज॑द्भ्यश्च वो॒ नमो॒ नमो॑ऽस्य॑द्भ्यो
 वि॒ध्य॑द्भ्यश्च वो॒ नमो॒ नमः॑ आ॒सी॑नेभ्यः॒ शया॑नेभ्यश्च वो॒ नमो॒
 नमः॑ स्व॒पद्भ्यो॑ जाग्र॑द्भ्यश्च वो॒ नमो॒ नम॑स्तिष्ठ॑द्भ्यो धा॒व॑द्भ्यश्च
 वो॒ नमो॒ नमः॑ स॒भाभ्यः॑ स॒भाप॑तिभ्यश्च वो॒ नमो॒ नमो॑
 अ॒श्वेभ्यो॑ऽश्व॑पतिभ्यश्च वो॒ नमः॑ ॥ ३ ॥

नमः॑ आ॒व्या॒धिनी॑भ्यो वि॒विध्य॑न्तीभ्यश्च वो॒ नमो॒
 नमः॑ उ॒ग॒णाभ्य॑स्तृ॒ह॒तीभ्य॑श्च वो॒ नमो॒ नमो॑ गृ॒थ्सेभ्यो॑
 गृ॒थ्स॑प॒तिभ्य॑श्च वो॒ नमो॒ नमो॑ ब्रा॒तेभ्यो॑ ब्रा॒त॑पतिभ्यश्च वो॒
 नमो॒ नमो॑ ग॒णेभ्यो॑ ग॒ण॑प॒तिभ्य॑श्च वो॒ नमो॒ नमो॑ वि॒रूपे॑भ्यो
 वि॒श्वरूपे॑भ्यश्च वो॒ नमो॒ नमो॑ म॒हद्भ्यः॑, क्षु॒ल॒केभ्य॑श्च वो॒ नमो॒
 नमो॑ र॒थिभ्यो॑ऽर॒थेभ्य॑श्च वो॒ नमो॒ नमो॑ र॒थेभ्यो॑ र॒थ॑पतिभ्यश्च
 वो॒ नमो॒ नमः॑ से॒नाभ्यः॑ से॒ना॒निभ्य॑श्च वो॒ नमो॒ नमः॑, क्ष॒त्तृभ्यः॑
 स॒ङ्ग्रही॑तृभ्यश्च वो॒ नमो॒ नम॑स्तक्ष॑भ्यो र॒थका॑रेभ्यश्च वो॒ नमो॒
 नमः॑ कु॒लाले॑भ्यः क॒मरि॑भ्यश्च वो॒ नमो॒ नमः॑ पु॒ञ्जिष्टे॑भ्यो

निषादेभ्यश्च वो नमो नम इषुकृद्भ्यो धन्वकृद्भ्यश्च वो नमो
नमो मृगयुभ्यः श्वनिभ्यश्च वो नमो नमः श्वभ्यः श्वपतिभ्यश्च
वो नमः॥४॥

नमो भवाय च रुद्राय च नमः शर्वाय च पशुपतये च
नमो नीलग्रीवाय च शितिकण्ठाय च नमः कपर्दिने च
व्युप्तकेशाय च नमः सहस्राक्षाय च शतधन्वने च नमो
गिरिशाय च शिपिविष्टाय च नमो मीढुष्टमाय चेषुमते च
नमो ह्रस्वाय च वामनाय च नमो बृहते च वर्षीयसे च
नमो वृद्धाय च संवृध्वने च नमो अग्रियाय च प्रथमाय च
नमो आशवे चाजिराय च नमः शीघ्रियाय च शीभ्याय च
नमो ऊर्म्याय चावस्वन्याय च नमः स्रोतस्याय च द्वीप्याय
च॥५॥

नमो ज्येष्ठाय च कनिष्ठाय च नमः पूर्वजाय चापरजाय च
नमो मध्यमाय चापगल्भाय च नमो जघन्याय च बुध्रियाय
च नमः सोभ्याय च प्रतिसर्याय च नमो याम्याय च क्षेम्याय
च नमो उर्वर्याय च खल्याय च नमः श्लोक्याय चावसान्याय
च नमो वन्याय च कक्ष्याय च नमः श्रवाय च प्रतिश्रवाय
च नमो आशुषेणाय चाशुरथाय च नमः शूराय चावभिन्दते
च नमो वर्मिणे च वरूथिने च नमो बिल्मिने च कवचिने
च नमः श्रुताय च श्रुतसेनाय च॥६॥

नमो दुन्दुभ्याय चाऽऽहन्याय च नमो धृष्णवे च प्रमृशाय

च॒ नमो॑ दू॒ताय॑ च॒ प्रहि॑ताय च॒ नमो॑ निष॒ङ्गिणै॑ चेषु॒धि॒मते॑ च॒
 नम॑स्ती॒क्ष्णेष॑वे चाऽऽयु॒धिने॑ च॒ नमः॑ स्वायु॒धाय॑ च सु॒धन्व॑ने
 च॒ नमः॑ स्नु॒त्याय॑ च॒ पथ्या॑य च॒ नमः॑ का॒ट्याय॑ च नी॒प्याय॑
 च॒ नमः॑ सू॒द्याय॑ च सर॒स्याय॑ च॒ नमो॑ ना॒द्याय॑ च वैश॒न्ताय॑
 च॒ नमः॑ कू॒प्याय॑ चाव॒ट्याय॑ च॒ नमो॑ वर्ष्पा॑य चाव॒र्ष्याय॑ च॒
 नमो॑ मे॒घ्याय॑ च विद्यु॒त्याय॑ च॒ नम॑ ई॒ध्रिया॑य चाऽऽत॒प्याय॑ च॒
 नमो॑ वा॒त्याय॑ च॒ रेष्मि॑याय च॒ नमो॑ वास्त॒व्याय॑ च वास्तु॒पाय॑
 च॥७॥

नमः॑ सोमा॑य च रु॒द्राय॑ च॒ नम॑स्ता॒म्राय॑ चारु॒णाय॑ च॒ नमः॑
 श॒ङ्गाय॑ च पशु॒पत॑ये च॒ नम॑ उ॒ग्राय॑ च भी॒माय॑ च॒ नमो॑
 अ॒ग्रेव॑धाय॑ च दू॒रेव॑धाय॑ च॒ नमो॑ ह॒त्रे च॒ हनी॑यसे च॒ नमो॑
 वृ॒क्षेभ्यो॑ हरि॑केशेभ्यो॒ नम॑स्ता॒राय॑ नमः॑ श॒म्भवे॑ च मयो॒भवे॑ च॒
 नमः॑ शङ्क॒राय॑ च मयस्क॒राय॑ च॒ नमः॑ शि॒वाय॑ च शि॒वत॑राय
 च॒ नम॑स्ती॒र्थ्याय॑ च॒ कू॒ल्याय॑ च॒ नमः॑ पा॒र्याय॑ चावा॒र्याय॑ च॒
 नमः॑ प्र॒तर॑णाय चो॒त्तर॑णाय च॒ नम॑ आता॒र्याय॑ चाऽऽला॒द्याय॑
 च॒ नमः॑ श॒ष्याय॑ च॒ फे॒न्याय॑ च॒ नमः॑ सि॒क्त्याय॑ च प्रवा॒ह्याय॑
 च॥८॥

नम॑ इरि॒ण्याय॑ च प्रप॒थ्याय॑ च॒ नमः॑ कि॒शिला॑य च॒
 क्षय॑णाय च॒ नमः॑ कप॒र्दिने॑ च पु॒लस्त॑ये च॒ नमो॑ गो॒ष्ठ्याय॑
 च॒ गृ॒ह्याय॑ च॒ नम॑स्त॒ल्प्याय॑ च॒ गे॒ह्याय॑ च॒ नमः॑ का॒ट्याय॑
 च॒ गह्व॑रे॒ष्ठाय॑ च॒ नमो॑ हृद॒य्याय॑ च निवे॒ष्याय॑ च॒ नमः॑

पा॑स॒व्याय॑ च रज॒स्याय॑ च नमः॑ शु॒ष्क्याय॑ च हरि॒त्याय॑
 च नमो॑ लो॒प्याय॑ चो॒लप्याय॑ च नम॑ ऊ॒र्व्याय॑ च सू॒र्म्याय॑ च
 नमः॑ पु॒र्ण्याय॑ च पर्ण॑श॒द्याय॑ च नमो॑ऽपगु॒रमा॑णाय चाभिघ्न॒ते
 च नम॑ आ॒खि॒वद॒ते च॑ प्र॒खि॒वद॒ते च॑ नमो॑ वः कि॒रि॒केभ्यो॑
 दे॒वाना॑ः हृ॒दये॑भ्यो नमो॑ वि॒क्षी॒णके॑भ्यो नमो॑ वि॒चि॒न्व॒त्केभ्यो॑
 नम॑ आ॒नि॒र॒ह॒तेभ्यो॑ नम॑ आ॒मी॒व॒त्केभ्यः॑ ॥ ९ ॥

द्रा॒पे अ॒न्ध॒स॒स्प॒ते दरि॑द्र॒न्नी॒ल॒लो॒हि॒त। ए॒षां पु॒रु॒षा॒णा॒मे॒षां
 प॑शूनां मा भे॒र्माऽरो॑ मो ए॒षां किं॑ च॒नाऽऽम॑त् ॥ या ते॑ रु॒द्र
 शि॒वा त॒नूः शि॒वा वि॒श्वाह॑भेष॒जी। शि॒वा रु॒द्रस्य॑ भेष॒जी तया॑
 नो मृ॒ड जी॒वसे॑ ॥ इ॒माः रु॒द्राय॑ त॒वसे॑ क॒प॒र्दि॒ने क्ष॑य॒द्वी॒राय॑
 प्र॑भ॒राम॑हे म॒तिम् ॥ यथा॑ नः श॒मसं॑द्वि॒पदे॑ चतु॒ष्पदे॑ वि॒श्वं
 पु॒ष्टं ग्रा॑मे अ॒स्मिन्न॑ना॒तुर॑म् ॥ मृ॒डा नो॑ रु॒द्रो॒त नो॑ मय॑स्कृ॒धि
 क्ष॑य॒द्वी॒राय॑ नम॑सा वि॒धेम॑ ते। यच्छं॑ च॒ योश्च॑ म॒नु॒राय॑जे पि॒ता
 तद॑श्याम॒ तव॑ रु॒द्र प्र॑णी॒तौ ॥ मा नो॑ म॒हान्त॑मु॒त मा नो॑ अ॒र्भ॒कं
 मा न॒ उ॒क्ष॑न्तमु॒त मा न॑ उ॒क्षि॑तम्। मा नो॑ व॒धीः पि॒तरं॑ मो॒त
 मा॒तरं॑ प्रि॒या मा न॑स्त॒नुवो॑ रु॒द्र री॑रिषः ॥ मा न॑स्तो॒के तन॑ये॒ मा
 न॒ आयु॑षि॒ मा नो॑ गो॒षु मा नो॑ अ॒श्वेषु॑ री॒रिषः॑। वी॒रा॒न्मा नो॑
 रु॒द्र भा॑मि॒तो व॑धी॒र॒ह॒विष्म॑न्तो नम॑सा वि॒धेम॑ ते ॥ आ॒रा॒त्ते गो॑घ्न
 उ॒त पू॑रुष॒घ्ने क्ष॑य॒द्वी॒राय॑ सु॒म्रम॑स्मे ते॑ अ॒स्तु। रक्षा॑ च नो॒ अधि॑
 च दे॒व ब्रू॑य॒धा च॑ नः श॒र्म यच्छ॑ द्वि॒ब॒र्हाः ॥ स्तु॒हि श्रु॑तं ग॒र्त॒सदं॑
 यु॒वानं॑ मृ॒गं न॒ भी॒ममु॑प॒ह॒तुमु॑ग्रम्। मृ॒डा ज॑रि॒त्रे रु॒द्र स्त॒वानो॑

अन्यं ते अस्मन्नि वपन्तु सेनाः॥ परिणो रुद्रस्य हेतिर्वृणक्तु
 परि त्वेषस्य दुर्मतिरंघायोः। अव स्थिरा मघवद्व्यस्तनुष्व
 मीढ्वस्तोकाय तनयाय मृडय॥ मीढुष्टम शिवतम शिवो नः
 सुमना भव। परमे वृक्ष आयुधं निधाय कृत्तिं वसान् आ
 चर पिनाकं बिभ्रदा गंहि॥ विकिरिद विलोहित नमस्ते
 अस्तु भगवः। यास्ते सहस्रं हेतयोऽन्यमस्मन्नि वपन्तु ताः॥
 सहस्राणि सहस्रधा बाहुवोस्तव हेतयः। तासामीशानो भगवः
 पराचीना मुखा कृधि॥१०॥

सहस्राणि सहस्रशो ये रुद्रा अधि भूम्याम्। तेषां
 सहस्रयोजनेऽव धन्वानि तन्मसि॥ अस्मिन् महत्यर्णवे-
 ऽन्तरिक्षे भवा अधि॥ नीलग्रीवाः शितिकण्ठाः शर्वा
 अधः, क्षमाचराः॥ नीलग्रीवाः शितिकण्ठा दिवः रुद्रा
 उपश्रिताः॥ ये वृक्षेषु सस्पिञ्जरा नीलग्रीवा विलोहिताः॥
 ये भूतानामधिपतयो विशिखासः कपर्दिनः॥ ये अन्त्रेषु
 विविध्यन्ति पात्रेषु पिबतो जनान्॥ ये पथां पथिरक्षय
 ऐलबृदा यव्युधः॥ ये तीर्थानि प्रचरन्ति सूकावन्तो
 निषङ्गिणः॥ य एतावन्तश्च भूयांसश्च दिशो रुद्रा
 वितस्थिरे॥ तेषां सहस्रयोजनेऽव धन्वानि तन्मसि॥
 नमो रुद्रेभ्यो ये पृथिव्यां येऽन्तरिक्षे ये दिवि येषामन्नं
 वातो वरुणमिषवस्तेभ्यो दश प्राचीर्दश दक्षिणा दश
 प्रतीचीर्दशोदीचीर्दशोर्ध्वास्तेभ्यो नमस्ते नो मृडयन्तु ते यं

द्विष्मो यश्च नो द्वेष्टि तं वो जम्भे दधामि॥११॥

[त्र्यम्बकं यजामहे सुगन्धिं पुष्टिवर्धनम्। उर्वारुकमिव बन्धनान्मृत्योर्मुक्षीय माऽमृतात्॥ यो रुद्रो अग्नौ यो अप्सु य ओषधीषु यो रुद्रो विश्वा भुवनाऽऽविवेश तस्मै रुद्राय नमो अस्तु॥ तमुष्टुहि यः स्विषुः सुधन्वा यो विश्वस्य क्षयति भेषजस्य।

(ऋक्) यक्ष्वा॑म॒हे सौ॑म॒न॒साय॑ रु॒द्रं नमो॑भिर्दे॒वम॑सुरं दुवस्य॥ अ॒यं मे॒ हस्तो॑ भग॒वान॒यं मे॒ भग॑वत्तरः। अ॒यं मे॒ विश्व॑भेष॒जोऽयं॑ शि॒वाभि॑मर्शनः॥

ये ते॑ स॒हस्रं॑म॒युतं॑ पाशा॒ मृत्यो॑ म॒र्त्याय॑ हन्त॒वे। तान् य॒ज्ञस्य॑ मा॒यया॑ सर्वा॒नव॑ यजामहे। मृत्य॒वे स्वाहा॑ मृत्य॒वे स्वाहा॑॥ ओं नमो॑ भगवते रुद्राय विष्णवे मृत्यु॒र्मे पा॒हि। प्रा॒णानां॑ ग्रन्थि॒रसि॑ रुद्रो मा॑ विशा॒न्तकः॑। तेना॒न्नेना॑प्याय॒स्व॥ नमो॑ रुद्राय विष्णवे मृत्यु॒र्मे पा॒हि॥]

॥ ॐ शान्तिः॒ शान्तिः॒ शान्तिः॑ ॥



॥ चमकप्रश्नः ॥

अ॒ग्रावि॑ष्णू स॒जोष॑से॒मा वर्ध॑न्तु वां गिरः॑। द्यु॒मैर्वा॑जै॒भिरा॑गन्तम्॥ वा॒जश्च॑ मे प्रस॒वश्च॑ मे प्र॒यति॑श्च मे प्र॒सिति॑श्च मे धी॒तिश्च॑ मे क्र॒तुश्च॑ मे स्वर॑श्च मे श्लो॒कश्च॑ मे श्रा॒वश्च॑ मे श्रु॒तिश्च॑ मे ज्यो॒तिश्च॑ मे सु॒वश्च॑ मे प्रा॒णश्च॑ मेऽपान॑श्च मे व्या॒नश्च॑

मेऽसु॑श्च मे चित्तं॑ च॒ म॒ आधी॑तं च॒ मे॒ वाक्क्रं॑ मे॒ मन॑श्च मे॒
चक्षु॑श्च मे॒ श्रोत्रं॑ च॒ मे॒ दक्ष॑श्च मे॒ बलं॑ च॒ म॒ ओज॑श्च मे॒ सह॑श्च
म॒ आयु॑श्च मे॒ ज॒रा च॑ म॒ आ॒त्मा च॑ मे॒ त॒नूश्च॑ मे॒ शर्म॑ च
मे॒ वर्म॑ च॒ मेऽङ्गा॑नि च॒ मेऽस्था॑नि च॒ मे॒ परू॑रुषि च॒ मे॒
शरी॑राणि च॒ मे॥

धूपम्। दीपम्। नैवेद्यम्।

नीराजनम्— यो दे॒वानां॑ प्रथ॒मं पु॒रस्ता॒द्विश्वा॒धियो॑ रु॒द्रो
म॒हर्षिः॑।

हि॒र॒ण्य॒ग॒र्भं प॑श्यत॒ जाय॑मान॒ः स नो॑ दे॒वः शु॒भया॒ स्मृत्या॒
संयु॑नक्तु॥

अनेन प्रथम-वार-जपेन भगवान् सर्वात्मकः महादेवः
सुप्रीतः सुप्रसन्नो वरदो भवतु॥१॥

ज्यैष्ठ्यं॑ च॒ म॒ आधि॑पत्यं च॒ मे॒ म॒न्युश्च॑ मे॒ भाम॑श्च मे॒ऽमंश्च॑
मे॒ऽम्भ॑श्च मे॒ जे॒मा च॑ मे॒ महि॑मा च॒ मे॒ वरि॑मा च॒ मे॒ प्रथि॑मा
च॒ मे॒ वर्ष्मा॑ च॒ मे॒ द्राघु॑या च॒ मे॒ वृ॒द्धं च॑ मे॒ वृ॒द्धिश्च॑ मे॒ स॒त्यं
च॒ मे॒ श्र॒द्धा च॑ मे॒ जग॑च्च॒ मे॒ धनं॑ च॒ मे॒ वश॑श्च मे॒ त्विषि॑श्च
मे॒ क्री॒डा च॑ मे॒ मोद॑श्च मे॒ जा॒तं च॑ मे॒ जनि॑ष्यमा॒णं च॑ मे॒
सू॒क्तं च॑ मे॒ सुकृ॑तं च॒ मे॒ वि॒त्तं च॑ मे॒ वेद्यं॑ च॒ मे॒ भू॒तं च॑ मे॒
भवि॑ष्यच्च॒ मे॒ सुगं॑ च॒ मे॒ सुप॑थं च॒ म॒ ऋ॒द्धं च॑ म॒ ऋ॒द्धिश्च॑ मे॒
कू॒प्तं च॑ मे॒ कृ॒प्तिश्च॑ मे॒ म॒तिश्च॑ मे॒ सुम॑तिश्च॒ मे॥

धूपम्। दीपम्। नैवेद्यम्।

नीराजनम्— यस्मात्परं नापरमस्ति किञ्चिद्यस्मान्नाणीयो न
ज्यायोऽस्ति कश्चित्।

वृक्ष इव स्तब्धो दिवि तिष्ठत्येकस्तेनेदं पूर्णं पुरुषेण सर्वम्॥
अनेन द्वितीय-वार-जपेन भगवान् सर्वात्मकः शिवः सुप्रीतः
सुप्रसन्नो वरदो भवतु॥२॥

शं च मे मयश्च मे प्रियं च मेऽनुकामश्च मे कामश्च मे
सौमनसश्च मे भद्रं च मे श्रेयश्च मे वस्यश्च मे यशश्च मे
भगश्च मे द्रविणं च मे युन्ता च मे धर्ता च मे क्षेमश्च मे
धृतिश्च मे विश्वं च मे महश्च मे संविच्च मे ज्ञात्रं च मे सूश्च मे
प्रसूश्च मे सीरं च मे लयश्च मे ऋतं च मेऽमृतं च मेऽयक्ष्मं
च मेऽनामयच्च मे जीवातुश्च मे दीर्घायुत्वं च मेऽनमित्रं च
मेऽभयं च मे सुगं च मे शयनं च मे सूषा च मे सुदिनं च
मे॥

धूपम्। दीपम्। नैवेद्यम्।

नीराजनम्— न कर्मणा न प्रजया धनेन त्यागेनैके
अमृतत्वमानुशुः।

परेण नाकं निहितं गुहायां विभ्राजदेतद्यतयो विशन्ति॥
अनेन तृतीय-वार-जपेन भगवान् सर्वात्मकः श्री-रुद्रः
सुप्रीतः सुप्रसन्नो वरदो भवतु॥३॥

ऊर्क् मे सूनृतां च मे पयश्च मे रसश्च मे घृतं च मे मधु
च मे सग्धिश्च मे सपीतिश्च मे कृषिश्च मे वृष्टिश्च मे जैत्रं च

म॒ औ॒द्भिद्यं॑ च॒ मे र॒यिश्च॑ मे॒ राय॑श्च॒ मे पु॒ष्टं च॑ मे॒ पुष्टि॑श्च॒ मे
वि॒भु च॑ मे॒ प्र॒भु च॑ मे॒ बहु॑ च॑ मे॒ भूय॑श्च॒ मे पूर्णं॑ च॑ मे॒ पूर्ण॑तरं
च॒ मेऽक्षि॑तिश्च॒ मे कू॒यवा॑श्च॒ मेऽन्नं॑ च॒ मेऽक्षु॑च्च॒ मे व्री॒हय॑श्च॒ मे
मे॒ यवा॑श्च॒ मे मा॒षाश्च॑ मे॒ तिला॑श्च॒ मे मु॒द्गाश्च॑ मे॒ ख॒ल्वाश्च॑ मे
गो॒धूमा॑श्च॒ मे म॒सुरा॑श्च॒ मे प्रि॒यङ्ग॑वश्च॒ मेऽण॑वश्च॒ मे श्या॒मका॑श्च॒ मे
मे॒ नी॒वारा॑श्च॒ मे॥

धूपम्। दीपम्। नैवेद्यम्।

नीराजनम्— वेदान्तविज्ञानसुनिश्चितार्थाः सन्न्यास
योगाद्यतयः शुद्धसत्त्वाः।

ते ब्रह्मलोके तु परान्तकाले परामृतात्परिमुच्यन्ति सर्वे॥
अनेन चतुर्थ-वार-जपेन भगवान् सर्वात्मकः शङ्करः सुप्रीतः
सुप्रसन्नो वरदो भवतु॥४॥

अश्मा॑ च॒ मे मृ॒त्तिका॑ च॒ मे गि॒रय॑श्च॒ मे पर्व॑ताश्च॒ मे
सि॒कता॑श्च॒ मे वन॑स्पतयश्च॒ मे हि॒र॒ण्यं च॑ मेऽय॑श्च॒ मे सी॒सं
च॒ मे त्र॑पुश्च॒ मे श्या॒मं च॑ मे॒ लो॒हं च॑ मेऽग्नि॑श्च॒ म॒ आप॑श्च॒ मे
वी॒रुध॑श्च॒ म॒ ओष॑धयश्च॒ मे कृ॒ष्टप॑च्यं च॒ मेऽकृ॑ष्टपच्यं च॒ मे
ग्रा॒म्याश्च॑ मे॒ प॒शव॑ आ॒र॒ण्याश्च॑ य॒ज्ञेन॑ कल्पन्तां वि॒त्तं च॑ मे॒
वि॒त्तिश्च॑ मे॒ भूतं॑ च॒ मे भू॒तिश्च॑ मे॒ वसु॑ च॒ मे वस॑तिश्च॒ मे कर्म॑
च॒ मे श॒क्तिश्च॑ मेऽर्थ॑श्च॒ म॒ ए॒मंश्च॑ म॒ इति॑श्च॒ मे ग॒तिश्च॑ मे॥

धूपम्। दीपम्। नैवेद्यम्।

नीराजनम्— द॒हं वि॒पापं॑ प॒रमे॑ऽश्मभूतं यत्पुण्डरीकं

पुरमध्यसंस्थम्।

तत्रापि दहं गगनं विशोकस्तस्मिन् यदन्तस्तदुपासितव्यम्॥
अनेन पञ्चम-वार-जपेन भगवान् सर्वात्मकः नीललोहितः
सुप्रीतः सुप्रसन्नो वरदो भवतु॥५॥

अग्निश्च म इन्द्रश्च मे सोमश्च म इन्द्रश्च मे सविता च
म इन्द्रश्च मे सरस्वती च म इन्द्रश्च मे पूषा च म इन्द्रश्च
मे बृहस्पतिश्च म इन्द्रश्च मे मित्रश्च म इन्द्रश्च मे वरुणश्च
म इन्द्रश्च मे त्वष्टा च म इन्द्रश्च मे धाता च म इन्द्रश्च मे
विष्णुश्च म इन्द्रश्च मेऽश्विनौ च म इन्द्रश्च मे मरुतश्च म
इन्द्रश्च मे विश्वे च मे देवा इन्द्रश्च मे पृथिवी च म इन्द्रश्च
मेऽन्तरिक्षं च म इन्द्रश्च मे द्यौश्च म इन्द्रश्च मे दिशश्च म
इन्द्रश्च मे मूर्धा च म इन्द्रश्च मे प्रजापतिश्च म इन्द्रश्च मे॥

धूपम्। दीपम्। नैवेद्यम्।

नीराजनम्— यो वेदादौ स्वरः प्रोक्तो वेदान्ते च प्रतिष्ठितः।
तस्य प्रकृतिं लीनस्य यः परः स महेश्वरः॥

अनेन षष्ठम-वार-जपेन भगवान् सर्वात्मकः ईशानः सुप्रीतः
सुप्रसन्नो वरदो भवतु॥६॥

अंशुश्च मे रश्मिश्च मेऽदाभ्यश्च मेऽधिपतिश्च म
उपांशुश्च मेऽन्तर्यामश्च म ऐन्द्रवायवश्च मे मैत्रावरुणश्च
म आश्विनश्च मे प्रतिप्रस्थानश्च मे शुक्रश्च मे मन्थी च
म आग्रयणश्च मे वैश्वदेवश्च मे ध्रुवश्च मे वैश्वानरश्च म
ऋतुग्रहाश्च मेऽतिग्राह्याश्च म ऐन्द्राग्रश्च मे वैश्वदेवश्च मे

मरुत्वतीयाँश्च मे माहेन्द्रश्च म आदित्यश्च मे सावित्रश्च मे
सारस्वतश्च मे पौष्णश्च मे पालीवतश्च मे हारियोजनश्च मे॥

धूपम्। दीपम्। नैवेद्यम्।

नीराजनम्— सद्योजातं प्रपद्यामि सद्योजाताय वै नमो नमः।

भवे भवे नार्ति भवे भवस्व माम्। भवोद्भवाय नमः॥

अनेन सप्तम-वार-जपेन भगवान् सर्वात्मकः विजयः सुप्रीतः
सुप्रसन्नो वरदो भवतु॥७॥

इध्मश्च मे बर्हिश्च मे वेदिश्च मे धिष्ण्याश्च मे सुचश्च मे
चमसाश्च मे ग्रावाणश्च मे स्वरवश्च म उपरवाश्च मेऽधिषवणे च
मे द्रोणकलशश्च मे वायव्यानि च मे पूतभृच्च म आधवनीयश्च
म आग्नीध्रं च मे हविर्धानं च मे गृहाश्च मे सदश्च मे
पुरोडाशाँश्च मे पचताश्च मेऽवभृथश्च मे स्वगाकारश्च मे॥

धूपम्। दीपम्। नैवेद्यम्।

नीराजनम्— वामदेवाय नमो ज्येष्ठाय नमः श्रेष्ठाय
नमो रुद्राय नमः कालाय नमः कलविकरणाय नमो
बलविकरणाय नमो बलाय नमो बलप्रमथनाय नमः
सर्वभूतदमनाय नमो मनोन्मनाय नमः॥

अनेन अष्टम-वार-जपेन भगवान् सर्वात्मकः भीमः सुप्रीतः
सुप्रसन्नो वरदो भवतु॥८॥

अग्निश्च मे घर्मश्च मेऽर्कश्च मे सूर्यश्च मे प्राणश्च मेऽश्वमेधश्च
मे पृथिवी च मेऽदितिश्च मे दितिश्च मे द्यौश्च मे शक्ररीरङ्गुलयो

दिशंश्च मे य॒ज्ञेन॑ कल्पन्ता॒मृक्कं मे॒ सामं च मे॒ स्तोमं॑श्च
मे य॒जुंश्च मे दी॒क्षा च॑ मे॒ तपं॑श्च म ऋ॒तुश्च मे व्र॒तं च॑
मेऽहो॒रात्रयोर्वृ॑ष्ट्या बृ॒हद्रथ॑न्तरे च॑ मे य॒ज्ञेन॑ कल्पेताम्॥

धूपम्। दीपम्। नैवेद्यम्।

नीराजनम्— अ॒घोरे॑भ्योऽथ॒ घोरे॑भ्यो॒ घोर॒घोर॑तरेभ्यः।

सर्वे॑भ्यः सर्व॒शर्वे॑भ्यो नमस्ते अस्तु रु॒द्ररूपे॑भ्यः॥

अनेन नवम-वार-जपेन भगवान् सर्वात्मकः देवदेवः सुप्रीतः
सुप्रसन्नो वरदो भवतु॥९॥

गर्भा॑श्च मे व॒त्साश्च॑ मे त्र्य॒विश्च मे त्र्य॒वी च॑ मे दि॒त्य॒वाच्च॑
मे दि॒त्यौही च॑ मे पश्चा॑विश्च मे पश्चा॒वी च॑ मे त्रि॒व॒त्सश्च॑ मे
त्रि॒व॒त्सा च॑ मे तु॒र्य॒वाच्च॑ मे तु॒र्यौही च॑ मे प॒ष्ठ॒वाच्च॑ मे प॒ष्ठौही च॑
म उ॒क्षा च॑ मे व॒शा च॑ म ऋ॒षभ॑श्च मे वे॒हच्च॑ मेऽन॒ङ्गां च॑ मे धे॒नुश्च॑
म आ॒यु॒र्य॒ज्ञेन॑ कल्पतां प्रा॒णो य॒ज्ञेन॑ कल्पतामपा॒नो य॒ज्ञेन॑
कल्पतां व्या॒नो य॒ज्ञेन॑ कल्पतां चक्षु॑र्य॒ज्ञेन॑ कल्पतां॑ श्रोत्रं
य॒ज्ञेन॑ कल्पतां मनो॑ य॒ज्ञेन॑ कल्पतां वा॒ग्य॒ज्ञेन॑ कल्पतामा॒त्मा
य॒ज्ञेन॑ कल्पतां य॒ज्ञो य॒ज्ञेन॑ कल्पताम्॥

धूपम्। दीपम्। नैवेद्यम्।

नीराजनम्— तत्पुरु॑षाय वि॒द्महे॑ महादे॒वाय॑ धीमहि। तन्नो
रु॒द्रः प्रचो॑दयात्॥

अनेन दशम-वार-जपेन भगवान् सर्वात्मकः भवोद्भवः सुप्रीतः
सुप्रसन्नो वरदो भवतु॥१०॥

एका॑ च मे॒ तिस्र॑श्च॒ मे॒ पञ्च॑ च मे॒ सप्त॑ च॒ मे॒ नव॑ च
 म॒ एका॑दश च मे॒ त्रयो॑दश च मे॒ पञ्च॑दश च मे॒ सप्त॑दश
 च मे॒ नव॑दश च म॒ एक॑विंशतिश्च मे॒ त्रयो॑विंशतिश्च
 मे॒ पञ्च॑विंशतिश्च मे॒ सप्त॑विंशतिश्च मे॒ नव॑विंशतिश्च
 म॒ एक॑त्रिंशच्च मे॒ त्रय॑स्त्रिंशच्च मे॒ चत॑स्रश्च मे॒ ऽष्टौ॑ च॒ मे॒
 द्वा॑दश च मे॒ षोड॑श च मे॒ विं॑शतिश्च॒ मे॒ चतु॑र्विंशतिश्च
 मे॒ ऽष्टा॑विंशतिश्च मे॒ द्वा॑त्रिंशच्च मे॒ षट्त्रिं॑शच्च मे॒
 चत्वारि॑ंशच्च॒ मे॒ चतु॑श्चत्वारिंशच्च मे॒ ऽष्टा॑चत्वारिंशच्च
 मे॒ वाज॑श्च प्रस॒वश्चा॑पिजश्च॒ क्रतु॑श्च सु॒वश्च॒ मूर्धा॑ च॒
 व्य॒श्नि॒यश्चा॑ऽऽन्त्याय॒नश्चान्त्य॑श्च भौ॒व॒नश्च॒ भुव॑न॒श्चाधि॑पतिश्च॥

धूपम्। दीपम्। नैवेद्यम्।

नीराजनम्— ईशानः सर्वविद्यानामीश्वरः सर्वभूतानां
 ब्रह्माधिपतिर्ब्रह्मणोऽधिपतिर्ब्रह्मा शिवो मे अस्तु सदाशिवोम्॥
 अनेन एकादश-वार-जपेन भगवान् सर्वात्मकः
 आदित्यात्मकः श्री-रुद्रः सुप्रीतः सुप्रसन्नो वरदो भवतु॥११॥

[इडां देवहर्मनुर्यज्ञनीर्बृहस्पतिरुक्थामदानि शंसिषद्विश्वे-
 देवाः सूक्तवाचः पृथिवि मातर्मा मां हिंसीर्मधुं मनिष्ये
 मधुं जनिष्ये मधुं वक्ष्यामि मधुं वदिष्यामि मधुमतीं देवेभ्यो
 वाचमुद्यासं शुश्रूषेण्यां मनुष्येभ्यस्तं मां देवा अवन्तु
 शोभायै पितरोऽनुमदन्तु॥]

॥ॐ शान्तिः शान्तिः शान्तिः॥



॥ रुद्रपदपाठः ॥

ॐ। ग॒णाना॑म्। त्वा। ग॒णप॑तिमि॒ति ग॒ण-प॑तिम्। ह॒वाम॑हे।
क॒विम्। क॒वीना॑म्। उ॒पम॑श्र॒वस्त॑म॒मित्यु॑पम॒श्रवः-त॑मम्॥
ज्ये॒ष्ठरा॑जमि॒ति ज्ये॒ष्ठ-रा॑जम्। ब्र॒ह्म॑णाम्। ब्र॒ह्म॑णः। प॒ते।
ए॒ति। नः। शृ॒ण्वन्। ऊ॒तिभि॑रित्यु॒ति-भिः। सी॒द। सा॑द॒नम्॥

नमः॑। ते। रु॒द्र। म॒न्यवे॑। उ॒तो इ॒ति। ते। इ॒षवे॑। नमः॑॥
नमः॑। ते। अ॒स्तु। ध॒न्व॑ने। बा॒हुभ्या॑मि॒ति बा॒हु-भ्या॑म्।
उ॒ता ते। नमः॑॥ या। ते। इ॒षुः। शि॒वत॑मे॒ति शि॒व-त॑मा।
शि॒वम्। ब॒भूव॑। ते। ध॒नुः॥ शि॒वा। श॒र॒व्या॑। या। त॒वा।
त॒या॑। नः। रु॒द्र। मृ॒डय॑॥ या। ते। रु॒द्र। शि॒वा। त॒नूः।
अ॒घो॑रा। अ॒पा॒पका॑शिनीत्य॒पा॒प-का॑शिनी॥ त॒या॑। नः। त॒नुवा॑।
श॒न्त॑म॒येति॑ श॒म-त॑म॒या। गि॒रि॑श॒न्तेति॑ गि॒रि॑-श॒न्त॑। अ॒भी॒ति।
चा॒क॒शी॒हि॑॥ या॒म्। इ॒षुम्॑। गि॒रि॑श॒न्तेति॑ गि॒रि॑-श॒न्त॑।
ह॒स्ते॑। (१)

बिभ॑र्षि। अ॒स्त॑वे॥ शि॒वाम्। गि॒रि॒त्रेति॑ गि॒रि-त्र॑। ता॒म्।
कुरु॑। मा। हि॒॒सीः। पु॒रु॒षम्। ज॒ग॑त्॥ शि॒वेन॑। व॒च॑सा।
त्वा। गि॒रि॑श। अ॒च्छा॑। व॒दाम॑सि॥ यथा॑। नः। स॒र्वम्॑। इ॒त्।
ज॒ग॑त्। अ॒य॒क्ष्मम्। सु॒म॒ना इ॒ति सु॒-म॒नाः। अ॒स॑त्॥ अ॒धी॒ति।
अ॒वो॒च॒त्। अ॒धि॒व॒क्तेत्य॑धि-व॒क्ता। प्र॒थ॒मः। दै॒व्यः। भि॒षक्॥
अ॒हीन्। च। स॒र्वान्। ज॒म्भ॑यन्। स॒र्वाः। च। या॒तु॒धा॒न्य॑ इ॒ति
या॒तु॒धा॒न्यः॥ अ॒सौ। यः। ता॒म्रः। अ॒रु॒णः। उ॒ता ब॒भ्रुः।

सुमङ्गल इति सु-मङ्गलः॥ ये। च। इमाम्। रुद्राः। अभितः।
दिक्षु। (२)

श्रिताः। सहस्रश इति सहस्र-शः। अवेति। एषाम्। हेडः।
ईमहे॥ असौ। यः। अवसर्पतीत्यव-सर्पति। नीलग्रीव इति
नील-ग्रीवः। विलोहित इति वि-लोहितः॥ उत। एनम्। गोपा
इति गो-पाः। अदृशन्। अदृशन्। उदहार्य इत्युद-हार्यः॥ उत।
एनम्। विश्वा। भूतानि। सः। दृष्टः। मृडयाति। नः॥ नमः।
अस्तु। नीलग्रीवायेति नील-ग्रीवाय। सहस्राक्षायेति सहस्र-
अक्षाय। मीदुषे॥ अथो इति। ये। अस्य। सत्वानः। अहम्।
तेभ्यः। अकरम्। नमः॥ प्रेति। मुञ्च। धन्वनः। त्वम्। उभयोः।
आर्त्तियोः। ज्याम्॥ याः। च। ते। हस्ते। इषवः। (३)

परेति। ताः। भगव इति भग-वः। वप॥ अवतत्येत्यव-
तत्य। धनुः। त्वम्। सहस्राक्षेति सहस्र-अक्ष। शतेषुध इति
शत-इषुधे॥ निशीर्येति नि-शीर्य। शल्यानाम्। मुखा। शिवः।
नः। सुमना इति सु-मनाः। भव॥ विज्यमिति वि-ज्यम्।
धनुः। कपर्दिनः। विशल्य इति वि-शल्यः। बाणवानिति
बाण-वान्। उत॥ अनैशन्। अस्य। इषवः। आभुः। अस्य।
निषङ्गथिः॥ या। ते। हेतिः। मीदुष्टमेति मीदुः-तम्। हस्ते।
बभूव। ते। धनुः॥ तया। अस्मान्। विश्वतः। त्वम्। अयक्ष्मया।
परीति। भुज॥ नमः। ते। अस्तु। आयुधाय। अनाततायेत्यना-

त॒ता॒य॒। धृ॒ष्ण॒वे॑॥ उ॒भा॒भ्या॑म्। उ॒त। ते॒। नमः॑। बा॒हु॒भ्या॑मि॒ति
बा॒हु॒भ्या॑म्। तव॑। ध॒न्व॒ने॑॥ प॒री॒ति॒। ते॒। ध॒न्व॒नः॑। हे॒तिः॑।
अ॒स्मान्। वृ॒ण॒क्तु॒। वि॒श्व॒तः॑॥ अथो॒ इति॑। यः। इ॒षु॒धि॒रि॒ती॒षु॒-
धिः॑। तव॑। आ॒रे। अ॒स्मत्। नी॒ति॒। धे॒हि॒। तम्॥ (४)

नमः॑। हि॒र॒ण्य॒बा॒हव॑ इति॒ हि॒र॒ण्य॒-बा॒हवे॑। से॒ना॒न्य॑ इति॒
से॒ना॒न्यै॑। दि॒शाम्। च॒। प॒त॒ये। नमः॑। नमः॑। वृ॒क्षे॒भ्यः॑।
ह॒रि॒केशे॒भ्य॑ इति॒ ह॒रि॒-केशे॒भ्यः॑। प॒शूना॑म्। प॒त॒ये। नमः॑।
नमः॑। स॒स्मि॒ञ्ज॒राय॑। त्वि॒षी॑म॒त् इति॒ त्वि॒षी॑-म॒त्ते। प॒थी॒नाम्।
प॒त॒ये। नमः॑। नमः॑। ब॒भ्रु॒शाय॑। वि॒व्या॒धि॒न् इति॒ वि॒-व्या॒धि॒नै॑।
अ॒न्ना॒नाम्। प॒त॒ये। नमः॑। नमः॑। ह॒रि॒केशा॑येति॒ ह॒रि॒-केशा॑य॒।
उ॒प॒वी॒ति॒न् इत्यु॑प॒-वी॒ति॒नै॑। पु॒ष्टा॒नाम्। प॒त॒ये। नमः॑। नमः॑।
भ॒व॒स्य॑। हे॒त्यै। जग॑ताम्। प॒त॒ये। नमः॑। नमः॑। रु॒द्राय॑।
आ॒त॒ता॒वि॒न् इत्या॑-त॒ता॒वि॒नै॑। क्षे॒त्रा॒णाम्। प॒त॒ये। नमः॑। नमः॑।
सू॒ताय॑। अ॒ह॒न्त्या॑य॒। व॒ना॒नाम्। प॒त॒ये। नमः॑। नमः॑। (५)

रोहि॑ताय॒। स्थ॒प॒त॒ये। वृ॒क्षा॒णा॑म्। प॒त॒ये। नमः॑।
नमः॑। म॒न्त्रि॒णै॑। वा॒णि॒जाय॑। क॒क्षा॒णाम्। प॒त॒ये। नमः॑।
नमः॑। भु॒व॒न्त॒र्यै॑। वा॒रि॒व॒स्कृ॒ताये॑ति॒ वा॒रि॒वः-कृ॒ताय॑।
ओष॑धीनाम्। प॒त॒ये। नमः॑। नमः॑। उ॒च्चै॒र्घो॒षाये॑त्यु॒च्चैः-घो॒षाय॑।
आ॒क्र॒न्द॒य॒त् इत्या॑-क्र॒न्द॒य॒ते। प॒त्ती॒नाम्। प॒त॒ये। नमः॑। नमः॑।
कृ॒त्स्न॒वी॒ताये॑ति॒ कृ॒त्स्न॒-वी॒ताय॑। धा॒व॒ते। स॒त्त्व॒नाम्। प॒त॒ये।
नमः॑॥ (६)

नमः। सहमानाय। निव्याधिन् इति नि-व्याधिने।
 आव्याधिनीनामित्या-व्याधिनीनाम्। पतये। नमः। नमः।
 ककुभाय। निषङ्गिण इति नि-सङ्गिने। स्तेनानाम्। पतये।
 नमः। नमः। निषङ्गिण इति नि-सङ्गिने। इषुधिमत इतीषुधि-
 मते। तस्कराणाम्। पतये। नमः। नमः। वञ्चते। परिवञ्चत
 इति परि-वञ्चते। स्तायूनाम्। पतये। नमः। नमः। निचेरव
 इति नि-चेरवे। परिचरायेति परि-चराय। अरण्यानाम्।
 पतये। नमः। नमः। सूकाविभ्य इति सूकावि-भ्यः।
 जिघांसद् इति जिघांसत्-भ्यः। मुष्णताम्। पतये।
 नमः। नमः। असिमद् इत्यसिमत्-भ्यः। नक्तम्। चरद्
 इति चरत्-भ्यः। प्रकृन्तानामिति प्र-कृन्तानाम्। पतये। नमः।
 नमः। उष्णीषिणे। गिरिचरायेति गिरि-चराय। कुलुश्चानाम्।
 पतये। नमः। नमः। (७)

इषुमद् इतीषुमत्-भ्यः। धन्वाविभ्य इति धन्वावि-भ्यः।
 च। वः। नमः। नमः। आतन्वानेभ्य इत्या-तन्वानेभ्यः।
 प्रतिदधानेभ्य इति प्रति-दधानेभ्यः। च। वः। नमः। नमः।
 आयच्छद् इत्यायच्छत्-भ्यः। विसृजद् इति विसृजत्-भ्यः।
 च। वः। नमः। नमः। अस्यद् इत्यस्यत्-भ्यः। विध्यद्
 इति विध्यत्-भ्यः। च। वः। नमः। नमः। आसीनेभ्यः।
 शयानेभ्यः। च। वः। नमः। नमः। स्वपद् इति स्वपत्-भ्यः।
 जाग्रद् इति जाग्रत्-भ्यः। च। वः। नमः। नमः। तिष्ठद्

इति तिष्ठत्-भ्यः। धावद् इति धावत्-भ्यः। च। वः। नमः।
 नमः। सभाभ्यः। सभापतिभ्य इति सभापति-भ्यः। च। वः।
 नमः। नमः। अश्वेभ्यः। अश्वपतिभ्य इत्यश्वपति-भ्यः। च।
 वः। नमः॥ (८)

नमः। आव्याधिनीभ्य इत्या-व्याधिनीभ्यः। विविध्यन्तीभ्य
 इति वि-विविध्यन्तीभ्यः। च। वः। नमः। नमः। उगणाभ्यः।
 तृहतीभ्यः। च। वः। नमः। नमः। गृथ्सेभ्यः। गृथ्सपतिभ्य
 इति गृथ्सपति-भ्यः। च। वः। नमः। नमः। व्रातेभ्यः।
 व्रातपतिभ्य इति व्रातपति-भ्यः। च। वः। नमः। नमः।
 गुणेभ्यः। गुणपतिभ्य इति गुणपति-भ्यः। च। वः। नमः।
 नमः। विरूपेभ्य इति वि-रूपेभ्यः। विश्वरूपेभ्य इति
 विश्व-रूपेभ्यः। च। वः। नमः। नमः। महद् इति महत्-भ्यः।
 क्षुल्लकेभ्यः। च। वः। नमः। नमः। रथिभ्य इति रथि-भ्यः।
 अरथेभ्यः। च। वः। नमः। नमः। रथेभ्यः। (९)

रथपतिभ्य इति रथपति-भ्यः। च। वः। नमः। नमः।
 सेनाभ्यः। सेनानिभ्य इति सेनानि-भ्यः। च। वः। नमः। नमः।
 क्षत्तृभ्य इति क्षत्तृ-भ्यः। सङ्गृहीतृभ्य इति सङ्गृहीतृ-भ्यः। च।
 वः। नमः। नमः। तक्षभ्य इति तक्ष-भ्यः। रथकारेभ्य इति
 रथ-कारेभ्यः। च। वः। नमः। नमः। कुलालेभ्यः। कर्मरिभ्यः।
 च। वः। नमः। नमः। पुञ्जिष्टेभ्यः। निषादेभ्यः। च। वः। नमः।
 नमः। इषुकृद् इतीषुकृत्-भ्यः। धन्वकृद् इति धन्वकृत्-
 भ्यः। च। वः। नमः। नमः। मृगयुभ्य इति मृगयु-भ्यः। श्वनिभ्य

इति श्वनि-भ्यः। च। वः। नमः। नमः। श्वभ्य इति श्व-भ्यः।
श्वपंतिभ्य इति श्वपंति-भ्यः। च। वः। नमः॥ (१०)

नमः। भवाय। च। रुद्राय। च। नमः। शर्वाय। च।
पशुपतय इति पशु-पतये। च। नमः। नीलग्रीवायेति
नील-ग्रीवाय। च। शितिकण्ठायेति शिति-कण्ठाय। च।
नमः। कपर्दिने। च। व्युत्तकेशायेति व्युत्त-केशाय। च।
नमः। सहस्राक्षायेति सहस्र-अक्षाय। च। शतधन्वन इति
शत-धन्वने। च। नमः। गिरिशाय। च। शिपिविष्टायेति
शिपि-विष्टाय। च। नमः। मीढुष्टमायेति मीढुः-तमाय। च।
इषुमत इतीषु-मते। च। नमः। हुस्वाय। च। वामनाय।
च। नमः। बृहते। च। वर्षीयसे। च। नमः। वृद्धाय। च।
संवृध्वन इति सम्-वृध्वने। च। (११)

नमः। अग्रियाय। च। प्रथमाय। च। नमः। आश्वै।
च। अजिराय। च। नमः। शीघ्रियाय। च। शीभ्याय। च।
नमः। ऊर्म्याय। च। अवस्वन्यायेत्यव-स्वन्याय। च। नमः।
स्रोतस्याय। च। द्वीप्याय। च॥ (१२)

नमः। ज्येष्ठाय। च। कनिष्ठाय। च। नमः। पूर्वजायेति
पूर्व-जाय। च। अपरजायेत्यपर-जाय। च। नमः। मध्यमाय।
च। अपगल्भायेत्यप-गल्भाय। च। नमः। जघन्याय।
च। बुध्नियाय। च। नमः। सोभ्याय। च। प्रतिसर्यायेति
प्रति-सर्याय। च। नमः। याम्याय। च। क्षेम्याय। च।

नमः। उ॒र्व॒र्या॒य। च। ख॒ल्या॒य। च। नमः। श्लो॒क्या॒य।
 च। अ॒व॒सा॒न्या॒येत्य॑व॒सा॒न्या॒य। च। नमः। व॒न्या॒य। च।
 क॒क्ष्या॒य। च। नमः। श्र॒वा॒य। च। प्र॒ति॒श्र॒वा॒येति॑ प्र॒ति॒श्र॒वा॒य।
 च। (१३)

नमः। आ॒शु॒षे॒णा॒येत्या॒शु॒से॒ना॒य। च। आ॒शु॒र॒था॒येत्या॒शु॒र॒था॒य। च। नमः। शू॒रा॒य। च। अ॒व॒भि॒न्द॒त इत्य॑व॒भि॒न्द॒ते।
 च। नमः। व॒र्मि॒णे॑। च। व॒रू॒थि॒ने॑। च। नमः। बि॒ल्मि॒ने॑। च।
 क॒व॒चि॒ने॑। च। नमः। श्रु॒ता॒य। च। श्रु॒त॒से॒ना॒येति॑ श्रु॒त॒से॒ना॒य।
 च॥ (१४)

नमः। दु॒न्दु॒भ्या॒य। च। आ॒ह॒न॒न्या॒येत्या॑ह॒न॒न्या॒य। च।
 नमः। धृ॒ष्ण॒वै॑। च। प्र॒मृ॒शा॒येति॑ प्र॒मृ॒शा॒य। च। नमः।
 दू॒ता॒य। च। प्र॒हि॒ता॒येति॑ प्र॒हि॒ता॒य। च। नमः। नि॒ष॒ङ्गि॒ण॒
 इति॑ नि॒स॒ङ्गि॒ने॑। च। इ॒षु॒धि॒म॒त॒ इती॑षु॒धि॒म॒ते॑। च। नमः।
 ती॒क्ष्णेष॑व॒ इति॑ ती॒क्ष्ण॒इ॒ष॒वे॑। च। आ॒यु॒धि॒ने॑। च। नमः।
 स्वा॒यु॒धा॒येति॑ सु॒आ॒यु॒धा॒य। च। सु॒ध॒न्व॒न॒ इति॑ सु॒ध॒न्व॒ने॑।
 च। नमः। सु॒त्या॒य। च। प॒थ्या॒य। च। नमः। का॒ट्या॒य। च।
 नी॒प्या॒य। च। नमः। सू॒द्या॒य। च। स॒र॒स्या॒य। च। नमः।
 ना॒द्या॒य। च। वै॒श॒न्ता॒य। च। (१५)

नमः। कू॒प्या॒य। च। अ॒व॒ट्या॒य। च। नमः। व॒र्ष्या॒य।
 च। अ॒व॒र्ष्या॒य। च। नमः। मे॒घ्या॒य। च। वि॒द्यु॒त्या॒येति॑ वि॒द्यु॒त्या॒य।
 च। नमः। ई॒ध्रि॒या॒य। च। आ॒त॒प्या॒येत्या॑त॒प्या॒य।

च॒। नमः॑। वा॒त्या॒या। च॒। रे॒ष्मि॒या॒या। च॒। नमः॑। वा॒स्त॒व्या॒या।
च॒। वा॒स्तु॒पा॒येति॑ वा॒स्तु-पा॒या। च॒॥ (१६)

नमः॑। सो॒मा॒या। च॒। रु॒द्रा॒या। च॒। नमः॑। ता॒म्रा॒या।
च॒। अ॒रु॒णा॒या। च॒। नमः॑। श॒ङ्गा॒या। च॒। प॒शु॒प॒त॒य॒ इति॑
प॒शु-प॒त॒ये। च॒। नमः॑। उ॒ग्रा॒या। च॒। भी॒मा॒या। च॒। नमः॑।
अ॒ग्रे॒व॒धा॒येत्य॑ग्रे-व॒धा॒या। च॒। दू॒रे॒व॒धा॒येति॑ दू॒रे-व॒धा॒या। च॒।
नमः॑। ह॒न्त्रे। च॒। ह॒नी॒य॒से। च॒। नमः॑। वृ॒क्षे॒भ्यः। ह॒रि॒के॒शे॒भ्य॒
इति॑ ह॒रि॒-के॒शे॒भ्यः। नमः॑। ता॒रा॒या। नमः॑। श॒म्भ॒व॒ इति॑
श॒म्-भ॒वे॑। च॒। म॒यो॒भ॒व॒ इति॑ म॒यः-भ॒वे॑। च॒। नमः॑। श॒ङ्क॒रा॒येति॑
श॒म्-क॒रा॒या। च॒। म॒य॒स्क॒रा॒येति॑ म॒यः-क॒रा॒या। च॒। नमः॑।
शि॒वा॒या। च॒। शि॒व॒त॒रा॒येति॑ शि॒व-त॒रा॒या। च॒। (१७)

नमः॑। ती॒र्था॒या। च॒। कू॒ल्या॒या। च॒। नमः॑। पा॒र्या॒या।
च॒। अ॒वा॒र्या॒या। च॒। नमः॑। प्र॒त॒र॒णा॒येति॑ प्र-त॒र॒णा॒या।
च॒। उ॒त्त॒र॒णा॒येत्यु॑त्-त॒र॒णा॒या। च॒। नमः॑। आ॒ता॒र्या॒येत्या॑-
ता॒र्या॒या। च॒। आ॒ला॒द्या॒येत्या॑-ला॒द्या॒या। च॒। नमः॑। श॒ष्या॒या।
च॒। फे॒न्या॒या। च॒। नमः॑। सि॒क॒त्या॒या। च॒। प्र॒वा॒ह्या॒येति॑
प्र-वा॒ह्या॒या। च॒॥ (१८)

नमः॑। इ॒रि॒ण्या॒या। च॒। प्र॒प॒थ्या॒येति॑ प्र-प॒थ्या॒या। च॒। नमः॑।
कि॒॒श्लि॒ला॒या। च॒। क्ष॒य॒णा॒या। च॒। नमः॑। क॒प॒र्दि॒ने॑। च॒।
पु॒ल॒स्त॒ये॑। च॒। नमः॑। गो॒ष्ठ्या॒येति॑ गो-स्थ्या॒या। च॒। गृ॒ह्या॒या।
च॒। नमः॑। त॒ल्पा॒या। च॒। गे॒ह्या॒या। च॒। नमः॑। का॒ट्या॒या।

च। ग॒ह्वरे॒ष्टायेति॑ ग॒ह्वरे-स्था॑य। च। नमः॑। हृ॒द॒य्या॑य। च।
 नि॒वे॒ष्या॑येति॑ नि-वे॒ष्या॑य। च। नमः॑। पा॒॒स॒व्या॑य। च।
 र॒ज॒स्या॑य। च। नमः॑। शु॒ष्क्या॑य। च। ह॒रि॒त्या॑य। च। नमः॑।
 लो॒प्या॑य। च। उ॒ल॒प्या॑य। च। (१९)

नमः॑। ऊ॒र्वा॑य। च। सू॒र्या॑य। च। नमः॑। पु॒र्ण्या॑य। च।
 पु॒र्ण॒श॒द्या॑येति॑ पु॒र्ण-श॒द्या॑य। च। नमः॑। अ॒प॒गु॒र॒मा॒णा॑येत्य॒प-
 गु॒र॒मा॒णाय॑। च। अ॒भि॒घ्न॒त इत्य॑भि-घ्न॒ते। च। नमः॑। आ॒खि॒व॒द॒त
 इत्या॑-खि॒द॒ते। च। प्र॒खि॒व॒द॒त इति॑ प्र-खि॒द॒ते। च। नमः॑। वः।
 कि॒रि॒के॒भ्यः॑। दे॒वा॒ना॒म्। हृ॒द॒ये॒भ्यः॑। नमः॑। वि॒क्षी॒ण॒के॒भ्य इति॑
 वि-क्षी॒ण॒के॒भ्यः॑। नमः॑। वि॒चि॒न्व॒त्के॒भ्य इति॑ वि-चि॒न्व॒त्के॒भ्यः॑।
 नमः॑। आ॒नि॒र॒ह॒ते॒भ्य इत्या॑निः-ह॒ते॒भ्यः॑। नमः॑। आ॒मी॒व॒त्के॒भ्य
 इत्या॑-मी॒व॒त्के॒भ्यः॑॥ (२०)

द्रा॒पै॑। अ॒न्य॑सः। पु॒ते। द॒रि॒द्र॒त्। नी॒ल॒लो॒हि॒तेति॑ नी॒ल॒-
 लो॒हि॒त्॥ ए॒षाम्। पु॒रु॒षा॒णाम्। ए॒षाम्। प॒शू॒नाम्। मा। भेः।
 मा। अ॒रः। मो इति॑। ए॒षाम्। किम्। च॒न। आ॒म॒म॒त्॥ या। ते।
 रु॒द्र। शि॒वा। त॒नूः। शि॒वा। वि॒श्वा॒ह॒भे॒ष॒जीति॑ वि॒श्वा॒ह॒-भे॒ष॒जी॥
 शि॒वा। रु॒द्र॒स्य॑। भे॒ष॒जी। तया॑। नः। मृ॒ड। जी॒व॒सै॑॥ इ॒माम्।
 रु॒द्रा॒य। त॒व॒सै॑। क॒प॒दि॒नै॑। क्ष॒य॒द्वी॒रा॒येति॑ क्ष॒य॒त्-वी॒रा॒य। प्रेति॑।
 भ॒रा॒म॒हे। म॒तिम्॥ यथा॑। नः। श॒म्। अ॒स॒त्। द्वि॒प॒द इति॑
 द्वि-प॒दे॑। चतु॑ष्प॒द इति॑ चतुः-प॒दे॑। वि॒श्व॒म्। पु॒ष्टम्। ग्रा॒मे॑।
 अ॒स्मिन्। (२१)

अना॑तुर॒मित्यना॑-तुर॒म्॥ मृ॒डा। नः॑। रु॒द्र। उ॒त। नः॑। मयः॑।
 कृ॒धि। क्षय॑द्वी॒रायेति॑ क्षय॒त्-वी॒राय॑। नम॑सा। वि॒धेम॑। ते॥
 यत्। शम्। च॑। योः। च॑। मनुः॑। आ॒य॒ज इत्या॑-य॒जे। पि॒ता।
 तत्। अ॒श्याम्। तव॑। रु॒द्र। प्र॒णी॒ता॒विति॑ प्र-नी॒तौ॥ मा। नः॑।
 म॒हान्त॑म्। उ॒त। मा। नः॑। अ॒र्भ॒कम्। मा। नः॑। उ॒क्षन्त॑म्। उ॒त।
 मा। नः॑। उ॒क्षित॑म्॥ मा। नः॑। व॒धीः। पि॒तर॑म्। मा। उ॒त।
 मा॒तर॑म्। प्रि॒याः। मा। नः॑। त॒नुवः॑। (२२)

रु॒द्र। री॒रिषः॑॥ मा। नः॑। तो॒के। तन॑ये। मा। नः॑। आ॒यु॒षि।
 मा। नः॑। गो॒षु। मा। नः॑। अ॒श्वेषु॑। री॒रिषः॑॥ वी॒रान्। मा।
 नः॑। रु॒द्र। भा॒मितः॑। व॒धीः। ह॒विष्म॑न्तः। नम॑सा। वि॒धेम॑। ते॥
 आ॒रात्। ते। गो॒घ्न इति॑ गो-घ्ने। उ॒त। पू॒रुष॑घ्न इति॑ पू॒रुष-घ्ने।
 क्षय॑द्वी॒रायेति॑ क्षय॒त्-वी॒राय॑। सु॒म्रम्। अ॒स्मे इति॑। ते। अ॒स्तु॥
 रक्षा॑। च॑। नः॑। अधी॑ति। च॑। दे॒व। ब्रू॒हि। अधा॑। च॑। नः॑।
 शर्म॑। य॒च्छ। द्वि॒बर्हा॑ इति॑ द्वि-बर्हाः॑॥ स्तु॒हि। (२३)

श्रु॒तम्। गर्त॑सद॒मिति॑ गर्त॒-सद॑म्। युवा॑नम्। मृ॒गम्। न।
 भी॒मम्। उ॒प॒ह॒न्तुम्। उ॒ग्रम्॥ मृ॒डा। ज॒रि॒त्रे। रु॒द्र। स्तवा॑नः।
 अ॒न्यम्। ते। अ॒स्मत्। नी॒ति। व॒प॒न्तु। सेनाः॑॥ परी॑ति।
 नः॑। रु॒द्रस्य॑। हे॒तिः। वृ॒ण॒क्तु। परी॑ति। त्वे॒षस्य॑। दु॒र्म॒तिरिति॑
 दुः-म॒तिः। अ॒घा॒यो॒रित्य॑घा-योः॥ अवे॑ति। स्थि॒रा। म॒घव॑द्ध्य
 इति॑ म॒घव॑त्-भ्यः। त॒नुष्व॑। मी॒ढ्वः। तो॒काय॑। तन॑याय।
 मृ॒डय॑॥ मी॒ढु॒ष्टमेति॑ मी॒ढुः-त॑म्। शि॒व॒तमेति॑ शि॒व॒-त॑म्।

शि॒वः। नः॑। सु॒मना॒ इति॑ सु॒मनाः॑। भ॒व॥ प॒र॒मे। वृ॒क्षे।
आयु॑धम्। नि॒धायेति॑ नि॒धाय॑। कृ॒त्तिम्। वसा॑नः। ए॒ति।
च॒र। पिना॑कम्। (२४)

बिभ्र॑त्। ए॒ति। ग॒हि॥ वि॒कि॒रि॒देति॑ वि॒कि॒रि॒द।
वि॒लो॒हि॒तेति॑ वि॒लो॒हि॒त। नमः॑। ते। अ॒स्तु। भ॒ग॒व॒ इति॑
भग॒वः॥ याः। ते। स॒हस्र॑म्। हे॒तयः॑। अ॒न्यम्। अ॒स्मत्।
नी॒ति। व॒प॒न्तु। ताः॥ स॒हस्रा॑णि। स॒हस्र॑धेति॑ स॒हस्र॑धा।
बा॒हु॒वोः। तव॑। हे॒तयः॑॥ तासा॑म्। ईशा॑नः। भ॒ग॒व॒ इति॑
भग॒वः। प॒रा॒चीना॑। मु॒खा। कृ॒धि॥ (२५)

स॒हस्रा॑णि। स॒हस्र॑श इति॑ स॒हस्र॑शः। ये। रु॒द्राः। अधी॑ति।
भू॒म्या॑म्॥ तेषा॑म्। स॒हस्र॑यो॒ज॒न इति॑ स॒हस्र॑यो॒ज॒ने। अवे॑ति।
धन्वा॑नि। त॒न्म॒सि॥ अ॒स्मिन्। म॒ह॒ति। अ॒र्ण॒वे। अ॒न्तरि॑क्षे।
भ॒वाः। अधि॑॥ नील॑ग्री॒वा इति॑ नील॑ग्री॒वाः। शि॒ति॒क॒ण्ठा॒
इति॑ शि॒ति॒क॒ण्ठाः। श॒र्वाः। अधः॑। क्ष॒मा॒च॒राः॥ नील॑ग्री॒वा
इति॑ नील॑ग्री॒वाः। शि॒ति॒क॒ण्ठा॒ इति॑ शि॒ति॒क॒ण्ठाः। दि॒वम्।
रु॒द्राः। उप॑श्रिता इत्युप॑श्रिताः॥ ये। वृ॒क्षे॒षु। स॒स्मि॒ञ्ज॒राः।
नील॑ग्री॒वा इति॑ नील॑ग्री॒वाः। वि॒लो॒हि॒ता इति॑ वि॒लो॒हि॒ताः॥
ये। भू॒ताना॑म्। अधि॑पतय इत्यधि॑प॒त॒यः। वि॒शि॒खा॒स॒ इति॑
वि॒शि॒खा॒सः। क॒प॒र्दि॒नः॥ ये। अ॒न्ने॒षु। वि॒वि॒ध्य॒न्तीति॑ वि॒
वि॒ध्य॒न्ति। पात्रे॑षु। पिब॑तः। ज॒नान्॥ ये। प॒थाम्। प॒थि॒रक्ष॑य
इति॑ प॒थि॒रक्ष॑यः। ऐ॒ल॒बृ॒दाः। य॒व्यु॒धः॥ ये। ती॒र्थानि॑। (२६)

प्रचरन्तीति प्र-चरन्ति। सूकावन्त इति सूका-वन्तः।
 निषङ्गिण इति नि-सङ्गिनः॥ ये। एतावन्तः। च। भूयांसः।
 च। दिशः। रुद्राः। वितस्थिर इति वि-तस्थिरे॥ तेषाम्।
 सहस्रयोजन इति सहस्र-योजने। अवेति। धन्वानि।
 तन्मसि॥ नमः। रुद्रेभ्यः। ये। पृथिव्याम्। ये। अन्तरिक्षे। ये।
 दिवि। येषाम्। अन्नम्। वातः। वरुणम्। इषवः। तेभ्यः। दश।
 प्राचीः। दश। दक्षिणा। दश। प्रतीचीः। दश। उदीचीः। दश।
 ऊर्ध्वाः। तेभ्यः। नमः। ते। नः। मृडयन्तु। ते। यम्। द्विष्मः।
 यः। च। नः। द्वेष्टि। तम्। वः। जम्भे। दधामि॥ (२७)

त्र्यम्बकमिति त्रि-अम्बकम्। यजामहे। सुगन्धिमिति सु-
 गन्धिम्। पुष्टिवर्धनमिति पुष्टि-वर्धनम्॥ उर्वारुकम्। इव।
 बन्धनात्। मृत्योः। मुक्षीय। मा। अमृतात्॥ यः। रुद्रः। अग्नौ।
 यः। अग्निस्वत्यप्-सु। यः। ओषधीषु। यः। रुद्रः। विश्वा।
 भुवना। आविवेशेत्या-विवेश। तस्मै। रुद्राय। नमः। अस्तु॥

॥ ॐ शान्तिः शान्तिः शान्तिः ॥



॥ मन्त्रपुष्पम् ॥

ॐ भद्रं कर्णेभिः शृणुयाम देवाः। भद्रं पश्येमाक्षभिर्यजत्राः।
 स्थिरैरङ्गैस्तुष्टुवाꣳसस्तनूभिः। व्यशेम देवहितं यदायुः।

स्व॒स्ति न॒ इन्द्रो॑ वृ॒द्धश्र॑वाः। स्व॒स्ति नः॑ पू॒षा वि॒श्ववे॑दाः।
 स्व॒स्ति न॒स्ताक्ष॑र्यो अ॒रि॑ष्टनेमिः। स्व॒स्ति नो॒ बृह॑स्पतिर्दधातु॥
 ॐ शान्तिः॑ शान्तिः॑ शान्तिः॑॥

योऽपां॑ पु॒ष्पं वेद॑। पु॒ष्पवान् प्र॒जावा॑न् पशु॒मान् भ॑वति।
 च॒न्द्रमा॒ वा अ॒पां पु॒ष्पम्। पु॒ष्पवान् प्र॒जावा॑न् पशु॒मान् भ॑वति।
 य ए॒वं वेद॑। योऽपामा॒यत॑नं वेद॑। आ॒यत॑नवान् भवति।
 अ॒ग्नि॒र्वा अ॒पामा॒यत॑नम्। आ॒यत॑नवान् भवति। योऽग्नेरा॒यत॑नं
 वेद॑॥

आ॒यत॑नवान् भवति। आपो॒ वा अ॒ग्नेरा॒यत॑नम्।
 आ॒यत॑नवान् भवति। य ए॒वं वेद॑। योऽपामा॒यत॑नं वेद॑।
 आ॒यत॑नवान् भवति। वा॒यु॒र्वा अ॒पामा॒यत॑नम्। आ॒यत॑नवान्
 भवति। यो वा॒योरा॒यत॑नं वेद॑। आ॒यत॑नवान् भवति॥

आपो॒ वै वा॒योरा॒यत॑नम्। आ॒यत॑नवान् भवति। य ए॒वं
 वेद॑। योऽपामा॒यत॑नं वेद॑। आ॒यत॑नवान् भवति। अ॒सौ वै
 तप॑न्नपामा॒यत॑नम्। आ॒यत॑नवान् भवति। योऽमु॒ष्य तप॑त
 आ॒यत॑नं वेद॑। आ॒यत॑नवान् भवति। आपो॒ वा अ॒मुष्य॑ तप॑त
 आ॒यत॑नम्॥

आ॒यत॑नवान् भवति। य ए॒वं वेद॑। योऽपामा॒यत॑नं
 वेद॑। आ॒यत॑नवान् भवति। च॒न्द्रमा॒ वा अ॒पामा॒यत॑नम्।
 आ॒यत॑नवान् भवति। यश्च॒न्द्रम॑स आ॒यत॑नं वेद॑। आ॒यत॑नवान्
 भवति। आपो॒ वै च॒न्द्रम॑स आ॒यत॑नम्। आ॒यत॑नवान् भवति॥

य ए॒वं वेद॑। योऽपामा॒यत॑नं वेद॑। आ॒यत॑नवान् भवति।

नक्षत्राणि वा अपामायतनम्। आयतनवान् भवति। यो नक्षत्राणामायतनं वेद। आयतनवान् भवति। आपो वै नक्षत्राणामायतनम्। आयतनवान् भवति। य एवं वेद॥८२॥

योऽपामायतनं वेद। आयतनवान् भवति। पर्जन्यो वा अपामायतनम्। आयतनवान् भवति। यः पर्जन्यस्याऽऽयतनं वेद। आयतनवान् भवति। आपो वै पर्जन्यस्याऽऽयतनम्। आयतनवान् भवति। य एवं वेद। योऽपामायतनं वेद॥

आयतनवान् भवति। संवत्सरो वा अपामायतनम्। आयतनवान् भवति। यः संवत्सरस्याऽऽयतनं वेद। आयतनवान् भवति। आपो वै संवत्सरस्याऽऽयतनम्। आयतनवान् भवति। य एवं वेद। योऽप्सु नावं प्रतिष्ठितां वेद। प्रत्येव तिष्ठति॥

राजाधिराजाय प्रसह्यसाहिने। नमो वयं वैश्रवणाय कुर्महे। स मे कामान्कामकामाय मह्यम्। कामेश्वरो वैश्रवणो ददातु। कुबेराय वैश्रवणाय। महाराजाय नमः॥

॥ॐ शान्तिः शान्तिः शान्तिः॥

॥दशशान्तयः॥

ॐ भद्रं कर्णेभिः शृणुयाम देवाः। भद्रं पश्येमाक्षभिर्यजत्राः। स्थिरैरङ्गैस्तुष्टुवाꣳसस्तनूभिः। व्यशेम देवहितं यदायुः। स्वस्ति न इन्द्रो वृद्धश्रवाः। स्वस्ति नः पूषा विश्ववेदाः।

स्व॒स्ति न॒स्ता॒क्ष्यो॒ अरि॑ष्टनेमिः। स्व॒स्ति नो॒ बृह॒स्पति॑र्दधातु॥
ॐ शान्तिः॒ शान्तिः॒ शान्तिः॑॥१॥

ॐ नमो॒ ब्रह्म॑णे॒ नमो॑ अस्त्व॒ग्नये॒ नमः॑ पृथि॒व्यै नम॑
ओष॑धीभ्यः। नमो॑ वा॒चे नमो॑ वा॒चस्प॑तये॒ नमो॑ विष्ण॑वे बृह॒ते
करो॑मि॥ ॐ शान्तिः॒ शान्तिः॒ शान्तिः॑॥२॥

नमो॑ वा॒चे या चो॑दि॒ता या चानु॑दि॒ता तस्यै॑ वा॒चे नमो॑ नमो॑
वा॒चे नमो॑ वा॒चस्प॑तये॒ नम॑ ऋषि॒भ्यो म॒त्रकृ॒द्धो म॒त्रप॑तिभ्यो
मा॒ मामृष॑यो म॒त्रकृ॒तो म॒त्रप॑तयः॒ परा॑दुर्मा॒हमृषी॑न्म॒त्रकृ॒तो
म॒त्रप॑तीन्परा॑दां वैश्वदे॒वीं वाच॑मु॒द्यास॑ शि॒वाम॑द॒स्तां जुष्टा॑
दे॒वेभ्यः॑ शर्म॑ मे॒ द्यौः शर्म॑ पृथि॒वी शर्म॑ विश्व॑मि॒दं जग॑त्।
शर्म॑ च॒न्द्रश्च॑ सूर्यश्च॑ शर्म॑ ब्रह्म॑प्रजाप॒ती। भूतं॑ वदिष्ये॒ भुवनं॑
वदिष्ये॒ तेजो॑ वदिष्ये॒ यशो॑ वदिष्ये॒ तपो॑ वदिष्ये॒ ब्रह्म॑ वदिष्ये
स॒त्यं वदिष्ये॒ तस्मा॑ अ॒हमि॑दमु॒पस्तर॑णमु॒पस्तृ॑ण उप॒स्तर॑णं
मे प्र॒जायै॑ पशूनां भूयादुप॒स्तर॑णम॒हं प्र॒जायै॑ पशूनां भूयासं
प्राणा॑पानौ मृत्योर्मा॑ पातं प्राणा॑पानौ मा मा॑ हासिष्टं मधु॑
मनिष्ये॒ मधु॑ जनिष्ये॒ मधु॑ वक्ष्यामि॒ मधु॑ वदिष्यामि॒ मधु॑मतीं
दे॒वेभ्यो॑ वाच॑मु॒द्यास॑ शुश्रूषे॒ण्यां मनु॑ष्येभ्यस्तं मा॑ दे॒वा अ॑वन्तु
शोभा॑यै पि॒तरोऽनु॑मदन्तु। ॐ शान्तिः॒ शान्तिः॒ शान्तिः॑॥३॥

शं नो॒ वातः॑ पवतां मात॒रिश्वा॒ शं न॑स्तपतु सूर्यः॑।
अहा॑निशं भवन्तु नः॒ शः रा॒त्रिः प्र॑तिधीयताम्। शमु॒षा
नो व्यु॑च्छतु शमा॑दित्य उदै॑तु नः। शि॒वा नः॒ शन्त॑मा भव

सुमृडीका सरस्वति। मा ते व्योम सन्दृशि। इडाये वास्त्वसि
 वास्तुमद्वास्तुमन्तो भूयास्म मा वास्तोश्छिथ्स्मह्यवास्तुः
 स भूयाद्योऽस्मान्द्वेष्टि यं च वयं द्विष्मः। प्रतिष्ठासि
 प्रतिष्ठावन्तो भूयास्म मा प्रतिष्ठायोश्छिथ्स्मह्यप्रतिष्ठः स
 भूयाद्योऽस्मान्द्वेष्टि यं च वयं द्विष्मः। आ वात वाहि भेषजं
 वि वात वाहि यद्रपः। त्वं हि विश्वभेषजो देवानां दूत
 ईयसे। द्वाविमौ वातौ वात आ सिन्धोरा परावतः॥

दक्षं मे अन्य आवातु परान्यो वातु यद्रपः। यद्दो
 वातते गृहेऽमृतस्य निधिर्हितः। ततो नो देहि जीवसे
 ततो नो धेहि भेषजम्। ततो नो मह आवह वात आवातु
 भेषजम्। शम्भूर्मयोभूर्नो हृदे प्र ण आयूषि तारिषत्।
 इन्द्रस्य गृहोऽसि तं त्वा प्रपद्ये सगुः साश्वः। सह यन्मे
 अस्ति तेन। भूः प्रपद्ये भुवः प्रपद्ये सुवः प्रपद्ये भूर्भुवः
 सुवः प्रपद्ये वायुं प्रपद्येऽनार्तां देवतां प्रपद्येऽश्मानमाखुणं
 प्रपद्ये प्रजापतेर्ब्रह्मकोशं ब्रह्म प्रपद्य ओं प्रपद्ये। अन्तरिक्षं
 म उर्वन्तरं बृहदग्रयः पर्वताश्च यया वातः स्वस्त्या
 स्वस्तिमान्तया स्वस्त्या स्वस्तिमानंसानि। प्राणापानौ
 मृत्योर्मा पातु प्राणापानौ मा मा हासिष्टं मयि मेधां मयि
 प्रजां मय्यग्निस्तेजो दधातु मयि मेधां मयि प्रजां मयीन्द्र
 इन्द्रियं दधातु मयि मेधां मयि प्रजां मयि सूर्यो भ्राजो
 दधातु॥

द्युभिर्कुभिः परिपातमस्मानरिष्टेभिरश्विना सौभगेभिः।
 तन्नो मित्रो वरुणो मामहन्तामदितिः सिन्धुः पृथिवी
 उत द्यौः। कया नश्चित्र आ भुवदूती सदावृधः सखा।
 कया शचिष्ठया वृता। कस्त्वा सत्यो मदानां म॑हिष्ठो
 मत्स॒दन्ध॑सः। दृढाचि॑दा॒रुजे॑ वसु। अभी षु णः सखी॑नामविता
 ज॑रितृणाम्। श॒तं भ॑वास्यूतिभिः। वयः सुप॒र्णा उप॑सेदुरिन्द्रं
 प्रि॒यमे॑धा ऋष॑यो नाध॑मानाः। अप॑ ध्वा॒न्तमूर्णु॑हि पृ॒धि
 चक्षु॑र्मुमु॒ग्ध्य॑स्मान्निधये॑व ब॒द्धान्॥

शं नो दे॒वीर॒भिष्ट॑य आपो॑ भवन्तु पी॒तये॑। शं योर॒भिस्र॑वन्तु
 नः। ई॒शाना॑ वा॒र्याणां॑ क्षय॑न्तीश्चर्षणी॑नाम्। अ॒पो या॑चामि
 भेष॑जम्। सु॒मित्रा॑ न आप॒ ओष॑धयः सन्तु दुर्मि॒त्रास्तस्मै॑
 भूया॑सुर्योऽस्मान्द्वेष्टि॑ यं च॑ व॒यं द्विष्मः॑। आपो॑ हि ष्ठा
 म॒योभु॑वस्ता न॑ ऊ॒र्जे द॑धातन। म॒हे रणा॑य॒ चक्ष॑से। यो वः
 शि॒वत॑मो॒ रस॑स्तस्य॑ भाजयते॒ह नः॑। उ॒शती॑रिव मा॒तरः॑।
 तस्मा॑ अरं॑ गमाम वो॒ यस्य॑ क्षया॑य जिन्व॑थ॥

आपो॑ ज॒नय॑था च नः। पृथि॒वी शान्ता॑ सा॒ग्निना॑
 शान्ता॑ सा मे॑ शान्ता शुच॑ शमयतु। अ॒न्तरि॑क्षं
 शान्तं॑ तद्वा॒युना॑ शान्तं॑ तन्मे॑ शान्तं॑ शुच॑ शमयतु।
 द्यौः शान्ता॑ सा॒दित्ये॑न॒ शान्ता॑ सा मे॑ शान्ता शुच॑
 शमयतु। पृथि॒वी शान्ति॑र॒न्तरि॑क्षं॒ शान्ति॑र्द्यौः शान्ति॑र्दिशः
 शान्ति॑र॒वान्तर॑दिशाः शान्ति॑र॒ग्निः शान्ति॑र्वा॒युः शान्ति॑रा॒दित्यः॑

शान्तिंश्चन्द्रमाः शान्तिर्नक्षत्राणि शान्तिरापः शान्तिरोषधयः
 शान्तिर्वनस्पतयः शान्तिर्गौः शान्तिरजा शान्तिरश्वः शान्तिः
 पुरुषः शान्तिर्ब्रह्म शान्तिर्ब्राह्मणः शान्तिः शान्तिरेव शान्तिः
 शान्तिर्मे अस्तु शान्तिः। तयाह॥ शान्त्या सर्वशान्त्या मह्यं
 द्विपदे चतुष्पदे च शान्तिं करोमि शान्तिर्मे अस्तु शान्तिः। एह
 श्रीश्च ह्रीश्च धृतिश्च तपो मेधा प्रतिष्ठा श्रद्धा सत्यं धर्मश्चैतानि
 मोत्तिष्ठन्तमनूत्तिष्ठन्तु मा मा॥ श्रीश्च ह्रीश्च धृतिश्च तपो मेधा
 प्रतिष्ठा श्रद्धा सत्यं धर्मश्चैतानि मा मा हासिषुः। उदायुषा
 स्वायुषोदोषधीना॥ रसेनोत्पुर्जन्यस्य शुष्मेणोदस्थाममृता॥
 अनु। तच्चक्षुर्देवहितं पुरस्ताच्छुक्रमुच्चरत्। पश्येम शरदः
 शतं जीवेम शरदः शतं नन्दाम शरदः शतं मोदाम
 शरदः शतं भवाम शरदः शत॥ शृण्वाम शरदः शतं
 प्रब्रवाम शरदः शतमजीताः स्याम शरदः शतं ज्योक्च
 सूर्यं दृशे। य उदंगान्महतोऽर्णवा॥द्विभ्राजमानः सरिरस्य
 मध्याथ्स मा वृषभो लोहिताक्षः सूर्यो विपश्चिन्मनसा पुनातु।
 ब्रह्मणश्चोतन्यसि ब्रह्मण आणी स्थो ब्रह्मण आवपनमसि
 धारितेयं पृथिवी ब्रह्मणा मही धारितमेनेन महदन्तरिक्षं
 दिवं दाधार पृथिवी॥ सदेवां यदहं वेद तदहं धारयाणि
 मा मद्देदोऽधिविस्रंसत्। मेधामनीषे माविशता॥ समीची
 भूतस्य भव्यस्यावरुध्यै सर्वमायुरयाणि सर्वमायुरयाणि।

आभिर्गीर्भिर्यदतो न ऊनमाप्यायय हरिवो वर्धमानः। यदा
स्तोतृभ्यो महि गोत्रा रुजासि भूयिष्ठभाजो अध ते स्याम।
ब्रह्म प्रावादिष्म तन्नो मा हासीत्। ॐ शान्तिः शान्तिः
शान्तिः॥४॥

ॐ सन्त्वा सिञ्चामि यजुषा प्रजामायुर्धनं च॥ ॐ शान्तिः
शान्तिः शान्तिः॥५॥

शं नो मित्रः शं वरुणः। शं नो भवत्वयमा। शं न
इन्द्रो बृहस्पतिः। शं नो विष्णुरुरुक्रमः। नमो ब्रह्मणे।
नमस्ते वायो। त्वमेव प्रत्यक्षं ब्रह्मासि। त्वमेव प्रत्यक्षं ब्रह्म
वदिष्यामि। ऋतं वदिष्यामि। सत्यं वदिष्यामि। तन्मामवतु।
तद्वक्तारमवतु। अवतु माम्। अवतु वक्तारम्। ॐ शान्तिः
शान्तिः शान्तिः॥६॥

ॐ तच्छं योरावृणीमहे। गातुं यज्ञाय। गातुं यज्ञपतये।
दैवीं स्वस्तिरस्तु नः। स्वस्तिर्मानुषेभ्यः। ऊर्ध्वं जिगातु
भेषजम्। शं नो अस्तु द्विपदे। शं चतुष्पदे। ॐ शान्तिः
शान्तिः शान्तिः॥७॥

ॐ सह नाववतु। सह नौ भुनक्तु। सह वीर्यं करवावहै।
तेजस्वि नावधीतमस्तु मा विद्विषावहै। ॐ शान्तिः शान्तिः
शान्तिः॥८॥

ॐ सह नाववतु। सह नौ भुनक्तु। सह वीर्यं करवावहै।
तेजस्वि नावधीतमस्तु मा विद्विषावहै। ॐ शान्तिः शान्तिः

शान्तिः॥९॥

ॐ स॒ह ना॑ववतु। स॒ह नौ॑ भुनक्तु। स॒ह वी॒र्यं॑ करवावहै।
ते॒ज॒स्वि ना॒वधी॑तमस्तु॒ मा वि॑द्विषा॒वहै॑। ॐ शान्तिः॒ शान्तिः॒
शान्तिः॑॥१०॥

